

DIDZA' DXI'A BUZÚAJĚ' LUCAS

Didza' rigu'ë Lucas lu nē'ë Teófilo

¹ Zián nupa chigulún bayudxi ulu'zúaj lu guichi idútë le nácatë, le guca ga zóaru', ² ca na' bila'lé'e nupa ni' dza ni'te, ate' bulu'luí'i rë'u, en bulu'zë didza' que. ³ Teófilo, bönni' tsáhui'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te. ⁴ Ruzúaja' quiu' lu guichi ni para inözinu' naca idútë li lë na' chinazëdu'.

Rulu'inë' gubáz lá'ayi queë' Dios ca si' gálajbi' Juan, bönni' uquilë' bönachi nisa

⁵ Dza ni'te cate' gunná bē'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí'i le Cö' Queë' Abías. Elisabet, nigula queë' Zacarías na' nácanu ca' zxí'ini xi'sóë' Aarón, bönni' gúquië' bixúz lo dza ni'te. ⁶ Nácagaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rnna xtídzë'ë Dios, en le rinná bē' xibá queë'. Caní guca, cuntú nu guca bi inné quégaquië'. ⁷ Cuntú nu zoa bi'i quégaquië', tu' nácanu Elisabet nigula huödx, ate' chinagúlagaquië' irópatë'.

⁸ Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz quégaquië'. ⁹ Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios. ¹⁰ Tsanni ni' ruzégui'ë Zacarías na' yalaj,

gula'cuá' yúgu'të bönachi ní'ilo, tu'lidza Dios. ¹¹ La' ná'sö buluí'i lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsölá'a ibëla bucugu lá'ayi ga na' régui yalaj. ¹² Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'. ¹³ Ní'irö gubáz lá'ayi na' gudxë' lë', gunnë':

—Zacarías, biti' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan. ¹⁴ Gata' quiu' le uzi'u xibé, en udzéjanu', ate' zían nupa ulu'dzeja ládxi'gaca cate' gálajbi' bí'ido' na', ¹⁵ tu' gácatëbi' zxön lahuë' Dios. Biti' gu'ajbi' xisi uva, en calëga tu le rusudxi bönachi, ate' sóalenë'-bi' Dios Bö' Lá'ayi cate' isí lo si' gálajbi'. ¹⁶ Gunë' Juan ni ga ulu'huóáca zían bönachi Israel queë' Xanru'. ¹⁷ Inöruë' lë' ca Xanru', ate' ila'cuá'alén lë' Bö' na', en yöl-la' huáca na' gula'cuá'alén Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nácgaca xuz len zxí'inigaquië', en uzéajni'inë' nupa ta'dá'baga' para ilácgaca tsahuí', en ucözë' bönachi para ila'zí' lu né'eguequi Xanru'.

¹⁸ Zacarías gunábinë' gubáz lá'ayi na', rnnë':

—¿Bizxi gaca bë' para inözda' ilaca lë ni? Chínagúla' neda', en chínagúlanu ca' nigula quia'.

¹⁹ Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusöl-lë'ë neda' para gü'ílëna' li' didza', en usiyönda' li' didza' dxi'a ni. ²⁰ Na'a, tu' cabí guyéajlë'u xtídza'a, icödzu', en bítirö gaca innó' cate' gácarö lë ni. Yúgu'të lë ni udxín cate' idxín dza que.

21 Tsanni ni' raca lë ni, nacuá' bönachi ní'ilo, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi. 22 Cate' burúajë' Zacarías, biti' guca gü'ilenë' légaquië' didza', ate' guléquibe'enë' bilé'enë' tu le buluí'inë' Dios lë' lu lataj lá'ayi. Bulá'a buluí'isë' Zacarías, buzéajni'inë' légaquië', tu' cabí raca innë'.

23 Cate' bizá'a yugu' dza na' ral-la' gunë' dxin Zacarías lahuë' Dios, ní'irö böajë' lidxë'. 24 Gudödi yugu' dza na' Elisabet, nigula queë' Zacarías na', biá'anu-bi' lë'ënu bí'ido', ate' idú gayu' beo' bugá'anasinu ga zoa lídxigaquië'. Guzá' ládxi'nu, rnnanu: 25 "Caní runë' Xanru' quia'. Ruzá' ládxië' quia' bí'ido', en runë' ga bíti'rö utuí'ida' lógaca bönachi."

Rigúxjö'ë gubáz lá'ayi ca si' gálajbi' Jesús

26 Cate' chiguca xopa beo', buluí'i lahuë' gubáz lá'ayi na', tu' gusöl-lë'ë Dios lë cazë' Gabriel, tsejë' Nazaret, tu yödzo luyú Galilea. 27 Dios gusöl-lë'ë lë' ni' tsöjyüë'-bi' tubi' bi'i nigula ra'bando' lëbi' María. Chinazí' lu ná'abi' María utsaga ná'aleni'-në' bönni' lë' José. Nababë' José di'a dza queë' David, bönni' gunná bé'enë' bönachi Israel dza ni'te. 28 Cate' guyázië' Gabriel na' ga zóabi' María, gudxë'-bi':

—Padiux. Dios ruzá' ládxië'ë quiu'. Xanru' Dios zóalenë' li'. Lë cazë' benë' ga nácaru' li' bica' ba ca yúgu'të nigula.

29 Cate' bilé'ebi' María gubáz lá'ayi na', gurö'öbi' böniga tu' nözi didza' na' bë'ë, en rubani ládxi'bi' nacxi sa'yéaj didza' na' bulidzë'-bi' gubáz lá'ayi na'.

30 Ní'irö gubáz lá'ayi na' gudxë'-bi', rnnë':

—María, bití' gádxinu', tu' chibidéli'nu' le ruzá' ládxe'ë Dios quiu'. ³¹ Na'a, tsú'ubi' tubi' bí'ido' lë'u, ate' uzú'-bi' tubi' bi'i bönni'do', ate' gu'u labi' Jesús. ³² Jesús ni tsépisëtë'rë', en si' Lë' Zxí'inë' Dios, Nu nayëpisëtë'rö. Xanru' Dios gunë' ga inná' bë'ë ca na' gunná' bë'ë David, xuz gula gudödi queë'. ³³ Jesús na' inná' bé'etica'sinë' bö'nachi Israel, ate' le inná' bë'ë Lë' catu caz tödi que.

³⁴ Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóalena' bönni'?

³⁵ Bubi'ë didza' gubáz lá'ayi na', rë'ë-bi':

—Guidë' Dios Bö' Lá'ayi ga zu', ate' yöl-la' huáca queë' Dios, Nu nayëpisëtë'rö, sóalen li', le gaca ca tu zzul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxí'inë' Dios. ³⁶ Cá'anqueze Elisabet, nigula dí'a dza quiu', chinuá'anu-bi' lë'ënu tubi' bi'i bönni'do' sal-la' chinagúlanu. Gula'nnë' queënu: “Nácanu nigula huödx”, pero chizéaj xopa beo' nuá'anu-bi' lë'ënu bí'ido' na'. ³⁷ Biti' bi zoa le cabí séqui'në' Dios.

³⁸ Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irö la' buza'të' gubáz lá'ayi na' ga zóabi' María.

María söjyubi'-nu Elisabet

³⁹ La' dza ní'isö guyú'ubi' nöza María, ate' carelö sa'yéajbi' ga naca guí'ado', en bidxinbi' tu yödzo luyú Judea. ⁴⁰ Ni' guyázabi' lidxë' Zacarías, en gúdxibi'-nu Elisabet:

—Padiux.

41 Cate' biyönninu Elisabet didza' na' bë'ëbi' María, la' butátë cuinbi' bi'i huë'ënido' na' yú'ubi' lé'ënu, ate' bidisóalenë'-nu Dios Bõ' Lá'ayi. 42 Ní'irõ bë'ënu Elisabet zidzaj didza', rnnanu:

—¡Chinunë' Dios ga nácaru' li' bica' ba ca yúgu'të nigula, en chinunë' ca' ga nácabí' bica' ba bí'ido' na' yú'ubi' lë'u! 43 ¿Núzxitë neda', zá'anu xinë'ë Xana' quia'? 44 Cate' biyönda' didza' bë'u, bulidzu' neda', lu yöl-la' rudzeja queëbi' la' butátë cuinbi' bi'i huë'ënido' ni yú'ubi' lë'a. 45 ¡Bica' ba li' tu' guyéajlë'u xtídzë'ë gubáz lá'ayi, ate' udxín caz lë na' gudxë' li' uláz queë' Xanru'!

46 Ní'irõ gunabi' María:

¡Idútë le naca' rigú'u Xanru' yöl-la' ba,

47 en rudzeja ládxi'lena'-në' Dios, Nu rusölá neda'!

48 ¡Dios caz buzá' ládxi'ë quia' neda'!

Yu'a lu në'ë, en tsaz naca' huen dxin queë'.

Na'a isí lo, ca naca' quia' ila'nná:

Bica' ba nigula na'.

49 ¡Zxöntëro naca le benë' Dios unná bë' quia'!

¡Lá'ayi naca Lë'!

50 Lë' ruhuéchi' ládxi'tica'së' bönachi tadxi Lë' na'a dza, en dza zá'gaca.

51 Yugu' yöl-la' huáca zxön chibenë' Lë'.

Buzõtjë' nupa gulún zxön yöl-la' réajni'i quéguequi.

52 Bugúë' yöl-la' unná bë' quégaca nupa gulaca lo, en benë' ga gulaca lo nupa gulaca nõxaj ladxi'.

53 Benë' ga bulu'huólaj bulu'dzë'e nupa gula'dún, en bucá'anë' cá'asõ nupa bila'lé'e yöl-la' tsahui'.

54 Gúcalenë' bönachi Israel, nupa na' tun xichinë', tu' yöjnenë' légaquië', en buéchi' ládxi'ë légaquië'.

55 Benë' ca guzxi' lu në'ë gunë' quégaquië' xuz xtó'oru' enca' queë' Abraham, en quégaca di'a dza queë'.

56 María bugá'analenbi'-nu Elisabet idú ca tsonna beo', ate' gudödi ni' böajbi' lídxibi'.

Le guca cate' gúlajbe' Juan, bönni' uquilë' bönachi nisa

57 Cate' bidxín dza ral-la' sóabi' bí'ido' queënu Elisabet, buzóanu-bi' tubi' bi'i bönni'do'.

58 Bila'yöni dzaga yu'u queënu, en yugu' di'a dza queënu ca na' guca, buéchi' ládxë'ë-nu Dios, ate' bulu'dzëjalen lënu. 59 Cate' chiguca xunu' dza zóabi' bí'ido' na', bila'dxinë' di'a dza queënu para ila'chúguië' lu xipëla'bi' bi'i bönni'do' na' lë na' gaca bë' néquibi' queë' Dios, ate' té'ënnë' ilu'ë labi' Zacarías ca na' lë' xúzibi'. 60 Ní'irö bubí'ínu didza' Elisabet, xiná'abi', rnnanu:

—Calëga. Juan si' labi'.

61 Gula'nábinë'-nu, ta'nnë':

—¿Bizx que? Cuntu nu di'a dza quiu' lë' Juan.

62 Ní'irö bulu'lá' bulu'luí'isinë', gula'nábinë' xúzibi' nacxi rë'ënë' gu'ë labi'. 63 Zacarías na' gunabë' tu blágado', ate' buzúajë' lahui caní: Juan lëbi'. Bulu'bábinë' yúgu'të'. 64 La' ní'isö böáljatë ru'ë Zacarías na', en buguítjatë lúdxë'ë, ate' bë'ë didza' le gulu'ë Dios yöl-la' ba. 65 Ní'irö guládxinë', en bulu'bábinë' yúgu'të dzaga yu'u quégaquië', ate' yúgu'të yödzödo' nacuá' lu guí'ado' luyú Judea, guzë didza' ca guca lë ni. 66 Gula'zá' ládxigaca yúgu'të nupa bila'yöni ca na' guca, ta'nná: “¿Nacxi caz gácabi' bi'i bönni'do' ni? Le nácatë Xanru' zóalenë'-bi'.”

Didza' bē'ē Zacarías uláz queē' Dios

67 Ní'irō Dios Bō' Lá'ayi bidisóalenē' Zacarías, xúzibi' Juan, ate' bē'ē didza' uláz queē' Dios, rnnē':

68 ¡Yöl-la' ba Dios, Xángaca bönachi Israel

tu' buduyúē' rē'u, bönachi queē', en böá'uē' rē'u!

69 ¡Gusöl-lē'ē queēru' Bönni' usölē' rē'u,

len yöl-la' huáca zxön queē'!

Bönni' ni guljē' ládajgaca di'a dza queē' David,

huen dxin queē' Dios.

70 ¡Dza ni'te guzxí' lu nē'ē gunē' ga gaca caní!

Raca ca na' gunné' lu ruá'agaquiē' bönni' gulu'ē didza' uláz queē'.

71 Guzxí' lu nē'ē usölē' rē'u

lu ná'agaca nupa tequi rē'u zi',

enca' lu ná'agaca nupa biti' ta'lé'e rē'u dxi'a.

72 Guzxí' lu nē'ē huéchi' ládxe'ē xuz gudödi queēru',

en tsöjnenē' le guzxí' lu nē'ē le naca lá'ayi.

73 Lē ni benē' tsutsu xtídzē'ē, en guzxí' lu nē'ē,

le gunē' queē' Abraham, xuz gudödi queēru',

le naca tu le ral-la' gunē' queēru' rē'u.

74 Guzxí' lu nē'ē usölē' rē'u

lu ná'agaca nupa biti' ta'lé'e rē'u dxi'a

para cabirö gádxiru' gunru' xichinē' Lē',

75 en para gácaru' ba'a ladxi', en idú dxi'a

lahuē' Lē' yúgu'tē dza sóaru' ibanru'.

76 Li', xzí'ina'do', si' lo' bönni' ru'ē didza' uláz queē'

Dios unná bē'

tu' tsöjnöru' ca Xanru' caz, en upó'o nöza ga tödē'.

77 Gunu' ga ila'nözi bönachi queē' ca gaca ulu'lágaca,

en ca na' uniti lahuē' Dios dul-la' nabága'gaca.

78 Caní gaca, tu' ruhuéchi'da' ládxe'ē Dios rē'u,

en runē' ga tsení' queēru' Bönni' na' náquiē' bení idú.

79 Lë' uzení'ë quégaca nupa nacuá' gapa naca chulla,
 en gapa nacuá' nupa chizóa ilátigaca
 para ugu'ë rë'u nōza ga cō'ō dxi lādxi'do'oru'.

⁸⁰ Guzxōnbi' bi'i bōnni'do' na', en bidipa lādxi'bi'.
 Guzóasibi' gapa naca lu lataj cá'asō cate' bidxinrō
 dza buluí'i lobi' lógaca bōnachi Israel.

2

Le guca cate' gúlajbi' Jesús (Mt. 1:18-25)

¹ Lu dza na' gunná bē'ë Augusto César, bōnni' Roma, ila'yaza lu guichi yúgu'tē bōnachi nacuá' yōdzōlió. ² Cate' gusí lo ta'yaza lu guichi caní, rinná bē'ë bōnni' lē' Cirenio luyú Siria. ³ Yúgu'tē bōnachi yōjaca yōdzō que queéguéqui ga na' zeaj nababa para ila'yaza lu guichi. ⁴ Guzé'ë José yōdzō Nazaret luyú Galilea, sa'yéajē' luyú Judea, en bidxinē' yōdzō Belén, ga ni' guljē' David, tu' guljē' José lādajgaca di'a dza queē' David na'. ⁵ Guyijē' José ni' para tsáziē' lu guichi, ate' dzágabi'-nē' María, bi'i nigula nazí' lu ná'abi' utsaga ná'alēnbi' lē', en chizóa sóabi' bí'ido' queēbi'. ⁶ Cate' ni' nacu'ë lu yōdzō Belén, bidxín dza sóabi' bí'ido' queēbi'. ⁷ Buzóanu-bi' tubi' bi'i bōnni'do', bi'ihuáca queēnu. Buchōlinu-bi' yugu' lári'do', ate' gudíxjanu-bi' tu lu yú'udo' ga tun chí'i le táguba' bōa' quégaca bōnachi yú'ugaca nōza. Caní guca, tu' cabí bidzōli lataj ila'cu'ë lu yu'u ga ni' ta'dxín bōnachi yú'ugaca nōza.

*Tu'lú'i lahuē' gubáz lá'ayi queē' Dios ga nacu'ë
 bōnni' tu'yúē'-ba' bō'cu' zxila'*

⁸ Gala' ra' yödzö Belén nacu'ë bönni' tu'yúgaquië'-ba' bö'cu' zxila' la' guixi', tapa chí'igaquië'-ba' chí'i dzö'ölö. ⁹ La' buluí'të lahuë' gubáz lá'ayi queë' Xanru' ga na' nacu'ë. Yöl-la' beni' queë' Xanru' buzení' ga na' nacu'ë, ate' guládxinë'. ¹⁰ Ní'irö gubáz lá'ayi na' gudxë' légaquië', rnnë':

—Biti' gádxili'. Na'a rusiyönda' libí'ili' didza' le gun ga udzėjade'eli', le ulu'zí' ca' xibé yúgu'të bönachi. ¹¹ Na'a chigúlajbi' lu ladzë' David Nu usölá libí'ili'. Nu ni naca Cristo, Xanru'. ¹² Lë ni gaca bé'ëbi'. Udzöllili'-bi' Bí'ido' na', narölibi' yugu' lári'do', en dëbi' tu lu yú'udo' ga tun chí'i le táguba' böa' quégaca bönachi yú'ugaca nöza.

¹³ Ga na' zoë' gubáz lá'ayi na', tsárido'os bulu'luí'i lógaquië' zianró ca' gubáz lá'ayi queë' Dios, narúajgaquië' yehua' yubá, en ta'gu'ë Dios yöl-la' ba, ta'nnë':

¹⁴ ¡Yöl-la' ba Dios zoë' xitsá',
ate' luyú gaca le cuéqui dxi ládxi'do'gaquië'
bönni' raza ládxë'ë Dios légaquië'!

¹⁵ Cate' bulu'zë'ë gubáz lá'ayi na' ga ni' nacu'ë, söjhuöjgaquië' yehua' yubá, ní'irö gulë luzë'ë tuë' ia'tué' bönni' uyú bö'cu' zxila' na', ta'nnë':

—Uyéajtsöca'ru' Belén para ilé'eru' lë ni chiguca ca na' chibusiyönnë' Xanru' rë'u.

¹⁶ La' yöjácatië', ate' yöjxáca'gaquië' María len José, enca' bí'ido' na', dëbi' tu lu yú'udo' ga tun chí'i le táguba' böa' quégaca bönachi yú'ugaca nöza. ¹⁷ Cate' bila'lé'enë' lëbi', gula'guíxjö'ë lë na' si' busiyönnë' gubáz lá'ayi na' légaquië' ca naca queëbi' bí'ido' na'. ¹⁸ Bulu'bani yúgu'të nupa bila'yöni didza' gulu'ë bönni' tu'yúé' bö'cu' zxila'

na'. ¹⁹ María gulú'usö icja náganu didza' ni, ate' guzá' ládxi'nu ca naca que. ²⁰ Söjhuöjgaquië' bönni' na' tu'yúë'-ba' bö'cu' zxila', tunë' zxön Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

Ta'gu'ë-bi' bí'ido' Jesús lu në'ë Dios

²¹ Cate' chiguca xunu' dza zóabi' bí'ido' na', gula'chúguië' lu xipéla'bi' lë na' naca bë' néquibi' queë' Dios, ate' gulu'ë labi' Jesús ca na' chibë' cazë' labi' gubáz lá'ayi na' zí'alö cate' si' tsú'ubi' lë'ënu xiná'abi'.

²² Cate' chibizá'a dza que le tu'pá'a cuíngacanu nigula ca rinná'bë' xibá queë' Moisés, gula'ché'ë-bi' bí'ido' Jesús yödzo Jerusalén para ila'gu'ë-bi' lu në'ë Xanru' Dios. ²³ Caní gulunë', tu' nazúaj lu guichi lu xibá queë' Xanru' le rnna: "Yúgu'tëbi' bi'i bönni'do' nácagacabi' bi'i zí'alö queënu xiná'agacabi', ulu'béajë'-bi' quez queë' Xanru' Dios." ²⁴ Que lë ni na' yöjáquië' ni' para ilútië'-ba', en ila'gú'ë-ba' lahuë' Dios chópaba' gúgudo' o chópaba' budödu' ca na' rinná'bë' xibá queë' Xanru' Dios.

²⁵ Dza ní'isö zoë' tu bönni' lë' Simeón lu yödzo Jerusalén. Bönni' ni náquië' tsahui', en reaj ládxe'ë Dios. Ribözë' Bönni' na' isöl-lë'ë Dios, Bönni' na' gácalenë' bönachi Israel. Dios Bö' Lá'ayi zóalenë' Simeón na', ²⁶ en chibulu'ínë' lë' biti' gátië' cate' ilé'erönë' Cristo, Bönni' na' isöl-lë'ë Xanru' Dios. ²⁷ Bidxinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'ché'ë-bi' bí'ido' Jesús chila yudo' para ilunë' queëbi' ca

rinná bē' xibá na', ²⁸ ní'irō bunidē'-bi' Simeón na',
en guyéaj lādxi'ē Dios, rnnē':

²⁹ Xana', na'a huáca gunnu' neda' lataj gátia', soa
dxi lādxa'a

tu' chiguca le gudxu' neda', huen dxin quiu'.

³⁰ Chibilé'eda' Nu na' buzóa cazu', Nu usölä
bönachi,

³¹ Nu na' ulú'u lahui lógaca yúgu'tē bönachi.

³² Lēbi' nácabi' bení' le uzení' bönachi izá'a,
en nácabi' ca' bení' quégaca bönachi Israel quiu'.

³³ Bulu'báninē' José, en María, xiná'abi' bí'ido'
Jesús, ca naca lē na' gunnē' Simeón ca naca queēbi'
Jesús. ³⁴ Simeón na' gunábinē' Dios gunē' ga gaca
dxi'a quégaquiē', ate' gudxē'-nu María, xiná'abi'
Jesús, rnnē':

—Buyútsöca'. Bi'i ni nuzóē'-bi' Dios para gunbi'
ga ila'chixi bönachi zían, ate' ulu'huóása bönachi
zían ladaj bönachi Israel. Gácabi' tu le naca bē', ate'
ila'nnē bönachi queēbi'. ³⁵ Gaca caní para ila'lá'
lahui le ta'zá' lādxi'gaca bönachi zían. Yugu' lē ni
ilaca quiu' ca tu guíē tuchi' le tsaza lādxi'do'o.

³⁶ Ana, nigula ru'ínu didza' uláz queē' Dios,
zóanu ca' ni'. Nácanu zxi'inē' Fanuel, bönni' nababē'
di'a dza queē' Aser. Chinagúlada'anu Ana na',
tu' guzóalenu bönni' queēnu idú gadxi iz gudōdi
gúcanu ra'bando', ³⁷ ate' bugá'ananu tuzi cate'
bidxintē dza chiyú'unu idú ca tápalalaj yu' tapa iz.
Biti' ca' rubí'i ruzá'anu ga naca chila yudo'. Rēla,
en te dza reaj lādxi'nu-nē' Dios, runnu gubasa,
en rulídzanu-nē' Dios. ³⁸ La' ná'asö bidxintēnu
ni', rēnu-nē' Dios: "Xclenu'." Gudíxjoi'ínu yúgu'tē
bönachi ca naca queēbi' bí'ido' Jesús, bönachi na'

nacuá' Jerusalén, nupa ta'böza dza idxín Nu na' isöl-lë'ë Dios para gácalen bönachi.

Söjhuöjgaquië' José, en María yödzo Nazaret

³⁹ Gudödi gulunë' José, en María yúgu'të le rinná bë' xibá queë' Xanru' Dios, yöjhuöjgaquië' ládzagaquië' Nazaret luyú Galilea. ⁴⁰ Guzxönbi' bí'ido' Jesús, en bidipa ládxi'bi'. Guta' queëbi' yöla' réajni'i, ate' zxön naca le ruzá' ládxe'ë queëbi' Dios.

Rudxinbi' bí'ido' Jesús chila yudo'

⁴¹ Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto. ⁴² Cate' chiyú'ubi' chinnu iz bi'i Jesús, yöjáquië' Jerusalén ca tun cazë' cate' raca laní na'. ⁴³ Cate' gudödi laní, söjhuöjgaquië', ate' bugá'anabi' bí'ido' Jesús Jerusalén, pero biti' téquibe'enë' José, en María, xiná'abi' Jesús. ⁴⁴ Tu' téquinë' nútsa'bi' ladaj bönachi zían yú'ulengaca légaquië' nöza, tu dza nayá' gula'zë'ë. Ní'irö cate' bulu'guiljë'-bi' gapa nacué' di'a dza quégaquië', en gapa nacué' nupa núnbë'gaquië' ⁴⁵ biti' bulu'dzölinë'-bi'. Que lë ni na' yöjhuöjgaquië' Jerusalén, söjdíljagaquië'-bi'.

⁴⁶ Cate' chiguca dza bunny, bulu'dzölinë'-bi' ga naca chila yudo', rö'öbi' gatsaj láchui'lë' bönni' yudo' tu'sédinë'. Ruzë nágabi' didza' tu'ë, en rinaba yúdxibi' légaquië'. ⁴⁷ Bulu'bani yúgu'të nupa bila'yöni didza' bë'ëbi' ca naca yöl-la' réajni'i queëbi', en ca náacagaca didza' bubí'ibi'. ⁴⁸ Cate' bila'lé'enë'-bi' xuz xiná'abi', bulu'bánninë', ate' gúdxinu-bi' xiná'abi', rnnanu:

—Zxi'ina', ¿bizx que benu' caní queëtu'? Buyútsöca', len yöl-la' ruúbi ruguí'i neda', en xuzu' buguúljatu' li'.

⁴⁹ Ní'irö gúdxibi' Jesús légaquië', rnnabi':

—¿Bizx que buguúljali' neda'? ¿Naru' cabí nözili' run bayudxi guna' xichinë' Xuza'?

⁵⁰ Biti' gula'yéajni'inë' xuz xiná'abi' didza' na' gúdxibi' légaquië'.

⁵¹ Jesús böajlenbi' légaquië', budxinbi' Nazaret, ate' benbi' ca rna xtídza'gaquië' xuz xiná'abi'. María, xiná'abi' Jesús, gulú'usönu icja ládxi'do'onu yúgu'të læ ni. ⁵² Ráta'rö yöl-la' réajni'i queëbi' bi'i Jesús, en rizxönbi'. Burúajbi' dxi'a lahuë' Dios, en lógaca bönachi.

3

*Libán runë' Juan, bönni' ruquilë' bönachi nisa
(Mt. 3:1-12; Mr. 1:1-8; Jn. 1:19-28)*

¹ Cate' chiguca chinu iz rinná bé'enë' Tiberio César idútë yödzölió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, böchë'ë Herodes na', rinná bë'ë luyú Iturea, en luyú Traconite, ate' Lisantias rinná bë'ë luyú Abilinia. ² Yugu' dza na' nácagaquië' bixúz lo Anás, en Caifás, ate' la' ná'asö Dios bë'lenë' Juan, zxi'inë' Zacarías, didza' cate' ni' zoë' Juan lu lataj cá'asö. ³ Ridë' Juan ni yúgu'të lataj nacué' ra' yegu Jordán, runë' libán ca ral-la' ila'dila nisa nupa tu'bí'i ládxi'gaca para uniti lahuë' Dios dul-la' nabága'gaca. ⁴ Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queë' Dios, rna:

Riyõn chi'ë bönni' rulidzë' lu lataj cá'asö, rnnë':
 “Buli'pá'a nõza lu icja láchido'oli' para idxín Xanru'
 queéli'.

Buli'béaj li yugu' nõza lasi ga tödë'.

⁵ Ral-la' ulígaca yúgu'të gapa naca röga',
 en ulu'huóáca lachi' yúgu'të guí'a sibi, en guí'ado'.
 Ral-la' ulu'rúaj li nõza nayecja nabí'igaca,
 ate' ulu'huóáca dxi'a nõza guiõj.

⁶ Ila'lé'eni yúgu'të bönachi Bönni' na' isöl-lë'ë Dios,
 Nu usölá bönachi."

⁷ Cate' bila'rúaj bönachi zían para ila'dila nisa lu
 në'ë Juan, lë' gudxë' légaquië':

—Libi'ili', di'a dza quégacaba' bëla sínia'. ¿Zoa
 nu bulu'í libí'ili' ral-la' izxúnajli' yöl-la' rusiúdxí
 sí' gaca quégaca bönachi? ⁸ Na'a, guli'gún le ilaca
 bë' chibubí'í láchí'li', en bití' sa' láchí'li', bití' in-
 nali': “Nácatu' tsahui' tu' nácatu' di'a dza queë'
 Abraham”, tu' rea' libí'ili', huáca quelë'ë Dios yugu'
 guiõj ni, en gunë' ga ulu'huóáca di'a dza queë'
 Abraham. ⁹ Nácali' ca yugu' yaga. Chizóa ribõza
 guié huága para ichugu yugu' yaga. Yúgu'të yaga
 bití' ta'bía le naca dxi'a, ila'chúguië' yaga na', en
 ila'gu'ë léguequi lu guí'.

¹⁰ Ní'irö bönachi nacua' ni' gula'nabi lë', ta'nná:

—¿Nacxi gúntsatu'?

¹¹ Bubi'ë didza' Juan, rë' légaquië':

—Nu dë chopa cõ' zxe ral-la' unödzej que nu bití'
 dë que, ate' nu dë le gagu, lësca' caní ral-la' quisi
 quégaca nupa bití' dë le ilágugaca.

¹² Bal-lë' bönni' tu'quizxjë' lázagaca bönachi uláz
 que yödzö zi'tu' bila'dxinë' ca' ni' para ila'dilë' nisa,
 ate' gula'nabinë' lë', ta'nnë':

—Bönni' usëdi, ¿nacxi gúntsatu' netu'?

13 Juan gudxë' légaquië':

—Biti' uquíxjaröli' tsca le chigunnë' bönni' yú'uli' lu nëë.

14 Bal-lë' bönni' röjáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bíti'rö gun gádxili' bönachi para cúali' le dë quéguequi. Bíti'rö innëli' quégaca bönachi le cabí nácatë para gunli' ga ila'guizxaj libí'ili', pero guli'tsaza ládxi'li' tsca ráxjali'.

15 Ta'zá' ládxi'gaca bönachi na' ta'böza Bönni' na' ral-la' isöl-lë'ë Dios, channö náquië' Juan na' Bönni' lë' Cristo. 16 Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le ruluí'isö yöl-la' ridila nisa ni, ichízië' libí'ili' Dios Bö' Lá'ayi, en le naca guí' queë'. Bönni' ni náparë' yöl-la' unná bë' ca neda', ate' neda' bití' naca' lesaca' ilecja' le nudë'ë ni'e. 17 Zönë' lu nëë böcö' queë', ate' ulubë' ga rilubi xzoa' xtila queë', lë ni ruluí'i le gaca quégaca bönachi. Utubë' xzoa' xtila, en cu'ë le xilataj, pero bëbu que uzégui'ë lu guí' le catu caz ulu.

18 Ca nácgaca didza' ni, en ia'zica'rö zián didza' le guchízië' icja nágagaca bönachi, benë' libán Juan lógaquië' que didza' dxi'a. 19 Juan na' buzégui'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böchë'ë, enca' tu' runë' zián le ruá' dö'. 20 Ní'irö benë' Herodes tu le nácarö huiá' dö', gulu'ë Juan na' lidxi guíë.

Ridíle' Jesús nisa

(Mt. 3:13-17; Mr. 1:9-11)

²¹ Dza na' cate' cabí nadzunë' Juan lidxi guë, cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, gyalaj lúzxiba, ²² ate' bötjë' Dios Bö' Lá'ayi, bidxinë' ga na' zoë' Jesús. Buluí' lahuë', rinë'ë ca riná' tuba' gu'dödo', ate' biyön chi'i Nu ruí' didza' yehua' yubá, rnna:

—Li' nacu' Zxi'ina'. Nadxí'ida' Li', en raza ládxa'a Li'.

*Yugu' xuz xinë'e gudödi queë' Jesús
(Mt. 1:1-17)*

²³ Cate' gusí lahuë' runë' xichinë' Jesús, yu'ë ca chi uruá' iz. Téquiquequi bönachi náquië' zxi'inë' José. Jesús náquië' zxi'ini xi'sóë' Elí, nu na' náquië' xúzinu María, nigula queë' José na'.

²⁴ Elí na' gúquië' zxi'inë' Matat,
nu ni guca zxi'inë' Leví,
nu ni guca zxi'inë' Melqui,
nu ni guca zxi'inë' Jana,
nu ni guca zxi'inë' ia'tué' José.

²⁵ José ni gúquië' zxi'inë' Matatías,
nu ni guca zxi'inë' Amós,
nu ni guca zxi'inë' Nahum,
nu ni guca zxi'inë' Esli,
nu ni guca zxi'inë' Nagai.

²⁶ Nagai na' gúquië' zxi'inë' Mat,
nu ni guca zxi'inë' ia'tué' Matatías,
nu ni guca zxi'inë' Semei,
nu ni guca zxi'inë' ia'tué' José,
nu ni guca zxi'inë' Judá.

²⁷ Judá na' gúquië' zxi'inë' Joana,
nu ni guca zxi'inë' Resa,
nu ni guca zxi'inë' Zorobabel,

nu ni guca zxí'inë' Salatiel,
nu ni guca zxí'inë' Neri.

²⁸ Neri na' gúquië' zxí'inë' ia'túë' Melqui,
nu ni guca zxí'inë' Adi,
nu ni guca zxí'inë' Cosam,
nu ni guca zxí'inë' Elmodam,
nu ni guca zxí'inë' Er.

²⁹ Er na' gúquië' zxí'inë' Josué,
nu ni guca zxí'inë' Eliezer,
nu ni guca zxí'inë' Jorim,
nu ni guca zxí'inë' ia'túë' Matat.

³⁰ Matat na' gúquië' zxí'inë' Leví,
nu ni guca zxí'inë' Simeón,
nu ni guca zxí'inë' Judá,
nu ni guca zxí'inë' ia'túë' José,
nu ni guca zxí'inë' Jonán,
nu ni guca zxí'inë' Eliaquim.

³¹ Eliaquim na' gúquië' zxí'inë' Melea,
nu ni guca zxí'inë' Mainán,
nu ni guca zxí'inë' Matata,
nu ni guca zxí'inë' Natán.

³² Natán na' gúquië' zxí'inë' David,
nu ni guca zxí'inë' Isaí,
nu ni guca zxí'inë' Obed,
nu ni guca zxí'inë' Booz,
nu ni guca zxí'inë' Salmón,
nu ni guca zxí'inë' Naasón.

³³ Naasón na' gúquië' zxí'inë' Aminadab,
nu ni guca zxí'inë' Aram,
nu ni guca zxí'inë' Esrom,
nu ni guca zxí'inë' Fares,
nu ni guca zxí'inë' ia'túë' Judá.

34 Judá na' gúquië' zxí'inë' Jacob,
 nu ni guca zxí'inë' Isaac,
 nu ni guca zxí'inë' Abraham,
 nu ni guca zxí'inë' Taré,
 nu ni guca zxí'inë' Nacor.

35 Nacor na' gúquië' zxí'inë' Serug,
 nu ni guca zxí'inë' Ragau,
 nu ni guca zxí'inë' Peleg,
 nu ni guca zxí'inë' Heber,
 nu ni guca zxí'inë' Sala.

36 Sala na' gúquië' zxí'inë' Cainán,
 nu ni guca zxí'inë' Arfaxad,
 nu ni guca zxí'inë' Sem,
 nu ni guca zxí'inë' Noé,
 nu ni guca zxí'inë' Lamec.

37 Lamec na' gúquië' zxí'inë' Matusalén,
 nu ni guca zxí'inë' Enoc,
 nu ni guca zxí'inë' Jared,
 nu ni guca zxí'inë' Mahalalel,
 nu ni guca zxí'inë' ia'tué' Cainán.

38 Cainán na' gúquië' zxí'inë' Enós,
 nu ni guca zxí'inë' Set,
 nu ni guca zxí'inë' Adán,
 nu ni guca ca zxí'ini cazë' Dios.

4

Satanás tu' xihui' rě'ëni usubaga' Jesús dul-la'
 (Mt. 4:1-11; Mr. 1:12-13)

¹ Buzě'ë Jesús ra' yegu Jordán, zóalenë' Dios Bö' Lá'ayi Lě', ate' Dios Bö' Lá'ayi na' guchě'ë Jesús lu lataj cá'asö. ² Guzóë' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti'

bi gudahuë' Jesús yugu' dza na', ate' gudödi ni ridunë'. ³ Ní'irö tu' xihui' na' gudxi Jesús, rna:

—Channö naca cazu' Li' Zxí'inë' Dios, gunnátsöca' ulu'huóaca guiöj ni yöta xtila.

⁴ Bubi'ë didza' Jesús, rë' le:

—Nazúaj lu guichi, rna: “Calëgasö yöta xtila nabánigaca bönachi, pero nabánigaca ca' yúgu'të xtídzë'ë Dios.”

⁵ Ní'irö guchë' tu' xihui' na' Jesús ga naca tu lu gu'a sibi ate' tu chí'ido'osö buluí'i Lë' yúgu'të xilátjagaca nupa ta'nná bë' yödzölió. ⁶ Tu' xihui' na' rë Jesús, rna:

—Gunna' quiu' yúgu'të xilátjagaca nupa ta'nná bë' ni, en yöl-la' tsahui' quéguequi, tu' nadödi lu na'a yúgu'të lë ni, ate' nu rë'ënisida' ruá'a que. ⁷ Channö Li' uzóa zxibu' lahua', en gunu' neda' zxön, yúgu'të lë ni guequi quiu'.

⁸ Bubi'ë didza' Jesús, rë' le:

—Gucuita ga zoa', Satanás, tu' nazúaj lu guichi lá'ayi le rë netu', rna: “Xanu' Dios tseaj ládxu'u-në', en tuzë' Lë' gunu' xichinë'.”

⁹ Ní'irö tu' xihui' na' guchë' Jesús Jerusalén, ate' budxía Lë' lu zö'ö ícjo'olö yudo', en rë Lë':

—Channö nacu' Zxí'inë' Dios, busuládzu'tsöca' cuinu' ni ¹⁰ tu' nazúaj lu guichi lá'ayi, rna: Dios isöl-lë'ë gubáz lá'ayi queë', ilácalenë' Li'.

¹¹ Lu ná'agaquië' ulu'chisë' Li' para cabí tsöjchégu'u guiöj, en bití' gunu' zi' ni'u.

¹² Bubi'ë didza' Jesús, rë' le:

—Nazúaj lu guichi lá'ayi le rë netu': “Bití' si' bë'u Xanu' Dios.”

13 Cate' biti' budzöli tu' xihui' na' ia'tú le si' bē' Jesús, buzá' ga zoē' tu chí'ido'.

*Risí lahuē' Jesús runē' xichinē' luyú Galilea
(Mt. 4:12-17; Mr. 1:14-15)*

14 Böajē' Jesús luyú Galilea, dē lu nē'ē yöl-la' huáca queē' Dios Bö' Lá'ayi. Guzē didza' ca naca queē', ate' bila'yöni bönachi nacuá' yúgu'tē yödzö idú gásibi'ilö. 15 Busédinē' Jesús bönachi gapa naca lu yu'u ga tu'dubē' tu'sedē' bönni' judío queē' Dios, ate' yúgu'tē bönachi gulún Lē' zxön.

*Le benē' Jesús yödzö Nazaret, ga naca ladzē'
(Mt. 13:53-58; Mr. 6:1-6)*

16 Ní'irö budxinē' Jesús yödzö Nazaret ga ni' guzxönē'. Cate' bidxín dza lá'ayi quégaquiē' bönni' judío, ca run cazē' Jesús, guyáziē' lu yu'u ga tu'dubē' tu'sedē' bönni' judío queē' Dios, ate' guzuínē' para ulabē' tu le nazúaj lu guichi lá'ayi. 17 Bulu'dödē' lu nē'ē Jesús guichi ga na' nazúaj didza' bē'ē Isaiás, bönni' bē'ē didza' uláz queē' Dios. Cate' gusaljē' guichi na', budzölinē' ga nazúaj lu guichi le rnna:

18 Zóalenē' Bö' Lá'ayi queē' Xanru' neda' tu' nubéajē' neda' quez queē' para usiyönda' bönachi yechi' didza' dxi'a. Gusöl-lē'ē neda' para una' nupa raca zi' ládxi'do'guequi, en usiyönda' nupa nadzúngaca, ca gaca ulu'lágaca, en úna' bönachi nachul-la lóguequi, en usölá' bönachi zoa nu run léguequi zi', 19 en guna' libán que dza ruzá' ládxi'ē' Xanru' Dios quégaca bönachi.

²⁰ Ní'irö butubë' Jesús guichi na', en bugu'ë le lu në'ë bönni' rapa chi'ë yugu' guichi lá'ayi, ate' gurö'ë. Ní'irö yúgu'të nupa nudúbigaca lu yu'u na' gula'ná' Jesús. ²¹ Gusí lahuë' Jesús rë' légaquië':

—Na'a dza ni zóali' libí'ili', rudxín caz le nazúaj lu guichi ni.

²² Yúgu'të' gula'nnë' dxi'a queë', en bulu'bánninë' ca naca didza' dxi'a ru'ë, ate' ta'nnë':

—¿Naru' calëga bönni' ni zxi'inë' José?

²³ Jesús rë' légaquië', rnnë':

—Nadxi huëli' neda' lë ni ta'nná bönnachi, le rnna: “Li', bönni' ruún bönnachi, bun cuinu'.” Lësca' caní huëli' neda': “Yugu' le biyöñitu' benu' Capernaum, ben ca' ga ni naca ladzu'.”

²⁴ Gunnë' ca' Jesús:

—Le nácatë rea' libí'ili', channö zoë' nu bönni' ru'ë didza' uláz queë' Dios, bití' tun bönnachi uládz queë' lë' bal. ²⁵ Le nácatë rea' libí'ili', gula'cuá'anu zían nigula uzëbi luyú Israel yugu' dza ni' zoë' Elías, bönni' bë'ë didza' uláz queë' Dios, cate' ni' bití' gulaj guiöj idú ca tsonna iz yu' xopa beo', ate' guca gubín luyú na', ²⁶ pero Dios bití' gusöl-lë'ë Elías na' ga nacué'anu nigula uzëbi nabábagacanu Israel, pero gusöl-lë'ë lë' ga na' zóanu tu nigula uzëbi lu yödzö Sarepta, le nababa yödzö Sidón. ²⁷ Lësca' caní, gula'cuá' zían nupa te'e huë' nudzu' ruzödi luyú Israel dza ni' zoë' Eliseo, bönni' bë'ë didza' uláz queë' Dios, pero bití' böáquië' nu bönni' nútsë'ë ladaj bönnachi Israel na', pero böáquië' tuzë' Naamán, bönni' nababë' luyú Siria.

²⁸ Cate' bila'yönnë' didza' ni, gula'lenë' yúgu'të bönni' nacu'ë lu yu'u ga na' tu'dubë' tu'sedë' queë' Dios. ²⁹ Ní'irö gula'yasë', en bulu'béajë' Jesús ní'ilö

ra' yödzo. Gula'chě'ë Lě' ga naca lě'e gui'a gui'oj ga na' dē lādzaqauiē' para ulu'sulādzuē' Lě' ga naca lě'e gui'a gui'oj na'. ³⁰ Ní'irō gudödē' Jesús gatsaj lāhui'lō ga na' nacu'ē, söhuōajtē'.

Tu bönni' yu'u lě' bö' xihui'

(Mr. 1:21-28)

³¹ Ní'irō guyijē' Jesús yödzo Capernaum luyú Galilea, ate' busédinē' bönachi yugu' dza lá'ayi quégaquiē' bönni' judío. ³² Bulu'báinē' ca naca le rusédinē' Jesús légaquiē', tu' bē'ē didza' ca tu bönni' dē lu nē'ē yöl-la' unná bē'.

³³ Zóatē' ca' tu bönni' yu'u lě' bö' xihui' lu yu'u ga na' tu'dubē' tu'sedē' queē' Dios, ate' bē'ē zidzaj didza', ³⁴ rnnē':

—¿Busán netu! ¿Bizxi rála'tu' quiu', Jesús, bönni' Nazaret? ¿Naru' zo'o para usunítu' netu'? Núnbē'a Li' Nu nacu'. Bönni' Lá'ayi queē' Dios nacu'.

³⁵ Jesús buzenē' le bach bö' xihui' na', en rē' le:

—Busayaj ru'u, en burúaj lu bönni' ni.

Ní'irō bö' xihui' na' gurú'una bönni' na' lu yu lógaca bönachi nacuá' ni'. Burúajtē lu bönni' na', en bíti'rō bi ben queē'. ³⁶ Bulu'báinē' yúgu'tē', en gulu'ē didza' tuē' len ia'túē', ta'nnē':

—¿Bizxi didza' ni ru'ē? Len yöl-la' unná bē', en yöl-la' huáca zxön rinná bé'enē' yugu' bö' xihui', ate' tu'rúajtē bö' xihui' na'.

³⁷ Guzē didza' ca naca queē' Jesús, ate' bila'yōni bönachi yúgu'tē yödzo idú gásibi'ilō.

Ruúnē' Jesús xiná'anu nigula queē' Pedro

(Mt. 8:14-15; Mr. 1:29-31)

³⁸ Ní'irō guyasē' Jesús, en burúajē' lu yu'u ga na' tu'dubē' tu'sedē' queē' Dios, ate' guyáziē' lidxē'

Simón. Xiná'anu nigula queë' Simón na' zóanu ni', en yú'unu xilá, ate' guláta'yue' lahuë' Jesús únë'-nu. ³⁹ Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

Ruúnë' Jesús zían nupa te'e
(Mt. 8:16-17; Mr. 1:32-34)

⁴⁰ Cate' chiribía gubidza, yúgu'të nupa nacuá'len léguequi nupa na' te'e que queëguequi yödzhue' bila'dxín ni', ate' dujuá'gaca léguequi ga na' zoë' Jesús. Lë' guxóa në'ë nupa na' te'e, en bunë' léguequi. ⁴¹ Bulu'rúaj ca' zían bö' xihui' yú'ugaca bönachi te'e na'. Ta'bödxi'a bö' xihui' na', ta'nná:

—Li' nacu' zxi'inë' Dios.

Ní'irö Jesús buzenë' le bach yugu' bö' xihui' na', en bití' bë'ë lataj ila'nná, tu' nöziguequi náquië' Cristo.

Runë' Jesús libán luyú Galilea
(Mr. 1:35-39)

⁴² Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxín bönachi zían ni', tu'guílaj Jesús. Cate' bila'dxinë' ga na' zoë', gulë'ëni'equinë' ulu'tsenë' Lë', para cabí uzë'ë ga na' nacu'ë. ⁴³ Ní'irö Jesús gudxë' légaquië', rnnë':

—Run bayudxi tseja' gapa nacuá' ia'zica'rö yödzö, tsöjena' ca' libán ni' que didza' dxí'a ca rinná bë'ë Dios. Que lë ni na' gusöl-lë'ë neda' ni.

⁴⁴ Caní guca, benë' libán yugu' yödzö luyú Galilea gapa naca lu yu'u ga tu'dubë' bönni' judío, en tu'sedë' queë' Dios.

5

Ta'dzunba' böla zían
(Mt. 4:18-22; Mr. 1:16-20)

¹ Cate' ni' zoë' Jesús ra' nísado' nazí'i le Gene-saret, lu xiyú Galilea, bulu'quída' bönachi zían Lë' para ila'yöni xtídzë'ë Dios. ² Ní'irö bilé'enë' Jesús chopa bárcodo', zxóagaca lu nísado' ga na' naca ra' yu bidxi, ate' narúajgaquië' bönni' uzxön böla lë'egaca bárcodo' na', en ta'guibë' yöxaj böla quégaquië'. ³ Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'láti'do' zi'tu' ga naca ra' yu bidxi na'. Ní'irö gurö'ë Jesús lë'e bárcodo' na', en röö'së' ca' ni' rusédinë' bönachi zían nacuá' lu yu bidxi na'. ⁴ Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rö'ö zila, ate' ni' guli'zalaj yöxaj böla queëli' para sönli'-ba' böla.

⁵ Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en biti' bi böla nazönitu'-ba', pero didza' quiu' izáljagara' yöxaj.

⁶ Cate' chigula'zaljë' le, gula'zönë' ziantëröba' böla, ate' réquitiqui' iröza' yöxaj böla na'. ⁷ Ní'irö bulu'lá'a bulu'lu'isinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë' bárcodo' na', ate' chirequi ulu'huötaj bárcodo' na' lu nisa. ⁸ Cate' bilé'enë' Simón Pedro lë ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

9 Caní gunné' tu' radxi ridzöbinë' Pedro ni'a quégacaba' böla zián na' gula'zöngaquië'-ba', en lësca' caní guca quégaca nupa nacua'len lë'.

10 Guladxi gula'dzöbinë' ca' Jacobo, en Juan, yugu' zxi'inë' Zebedeo, nupa ni nácagaca luzë'ë Simón Pedro na'. Ní'irö Jesús rë' Simón na', rnnë':

—Biti' gádxinu'. Na'a isí lo' ichë'u quia' bönachi ca runu' rizönu'-ba' böla.

11 Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' sōjácalenë' Jesús.

*Ruúnë' Jesús tu bönni' ré'enë' huë' nudzu' ruzödi
(Mt. 8:1-4; Mr. 1:40-45)*

12 Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yuë' lahuë', rnnë':

—Xan, channö ré'ënu', huáca unu' neda'.

13 Ní'irö bulí nē'ë Jesús, en gudanë' lë'. Rë' lë':

—Ré'ënda'. Gacu' dxi'a.

La' gubídxitë huë' nudzu' queë' bönni' na'.

14 Ní'irö Jesús gunná bé'enë' lë' cuntu nu guié' ca'. Gudxë' lë':

—Guyéaj, yöjluí' cuinu' lahuë' bixúz, ate' yöjnödzej que yudo' le ruluí' nuhuóácu' dxi'a ca gunná bë'ë Moisés, lë na' uluí' légaquië' chibóácu'.

15 Guzëtërö didza' que yöl-la' huáca queë' Jesús, ate' bulu'dubi bönachi zián ga na' zoë' para ila'yöni xtídzë'ë, en para únë' léguequi, ugúë' yödzöhuë' té'eguequi. 16 Ní'irö buzë'ë Jesús ni', en guyijë' tu lataj cá'asö, ate' ni' bulidzë' Dios.

*Ruúnë' Jesús tu bönni' huë' nacú'unië' bin
(Mt. 9:1-8; Mr. 2:1-12)*

¹⁷ Ia'tú dza, cate' ni' rusédinë' Jesús bönachi, rō'ōgaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzo luyú Galilea, en luyú Judea, en lu yödzo Jerusalén. Naca bë' dë lu në'ë Jesús yöl-la' huáca queë' Xanru' Dios tu' ruúnë' bönachi te'e nacúa' ni'. ¹⁸ Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljë' nacxi ilunë' para ila'gu'e lë' lu yu'u para ila'guixjë' lë' lahuë' Jesús. ¹⁹ Cate' biti' gula'dzölinë' nacxi ilunë', tu' nacúa' bönachi zían ni', gula'benë' ícjo'olö yu'u na', en gula'saljë' ícjo'ona'. Ní'irö bulu'zötjë' le denë' bönni' huë' na', ate' gula'guíxjë' lë' gatsaj láchui'lö bönachi ni' lahuë' Jesús. ²⁰ Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Bönni', yugu' dul-la' nabágu'u chibuníti lahua'.

²¹ Ní'irö gula'sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nnë': “¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'”? Tuzë' Dios runiti lahuë' dul-la'.”

²² Réquibe'enë' Jesús le ta'zá' ládxi'gaquië', ate' rë légaquië':

—¿Bizx que rizá' ládxi'li' caní? ²³ Biti' naca böniga nu guiësö bönni' ni: “Yugu' dul-la' nabágu'u chibuníti lahua'”, pero naca böniga nu gun ga chasë', en së'e ni'ë. ²⁴ Guna' ga inözili' dë lu na'a neda', Bönni' Guljë' Bönachi, yöl-la' unná bë' uniti lahua' dul-la' luyú ni.

Ní'irö gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

²⁵ La' guyásatë' bönni' huë' na' lógaquië', ate' bu'ë læ na' gúti'në', en söhuöjë' lidxë', rigu'ë Dios yöl-la' ba. ²⁶ Gula'nítitiqui'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nnë':

—Na'a bilé'eru' le run ga rubániru'.

Jesús rulidzë' Leví

(Mt. 9:9-13; Mr. 2:13-17)

²⁷ Gudödi gulaca yugu' læ ni burúajë' Jesús ni', ate' bilé'enë' tu bönni' uquízxaj lázagaca bönachi, læ Leví, rö'ë ga na' ruquíxjë', ate' Jesús rë' læ':

—Gudá' neda'.

²⁸ La' guyásatë' Leví, ate' bucá'anë' yúgu'të, en sa'yéajlenë' Jesús.

²⁹ Gudödi ni' benë' Leví na' tu gü'i huagu queë' Jesús ga naca lu yu'u lidxë', ate' gula'cu'ë zían bönni' uquízxaj ni' len ia'bal-lë' bönni' ta'bõ'lenë' légaquië' tahuë'. ³⁰ Ní'irö bönni' yudo' tu'sédinë' len yugu' bönni' yudo' fariseo gula'nnë' quégaquië' bönni' usëda queë' Jesús, ta'nnë':

—¿Bizx que rë'aj rágulenli' yugu' bönni' uquízxaj, en ia'zícá'rë' bönni' dul-la'?

³¹ Bubi'ë didza' Jesús, rë' légaquië':

—Yugu' bönni' nacu'ë dxi'a biti' naquíniguequinë' nu un bönachi, pero bönni' té'enë' naquíniguequinë' nu un bönachi. ³² Za'a, calëga ulídzagaca'-në' bönni' tsahui', pero za'a ulídzagaca'-në' bönni' dul-la' para ulu'bí'i ládxi'gaquië'.

Ta'nábinë' Jesús ca naca que yöl-la' run gubasa

(Mt. 9:14-17; Mr. 2:18-22)

³³ Ní'irö bönni' yudo' na' gula'nábinë' Jesús, ta'nnë':

—¿Bizx que tunë' gubasa zían luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' tē'aj tahuë'?

³⁴ Jesús rë' légaquië':

—¿Naru' huácatsö gunli' ga ilunë' gubasa bönni' nacu'ë laní que yöl-la' rutsaga na' tsanni ni' bönni' rutsaga nē'ë zóalenë' légaquië'? ³⁵ Huadxín dza cate' udúë' bönni' rutsaga nē'ë ga nacu'ë. Dza ní'irö ilunë' gubasa.

³⁶ Ní'irö bucúdzu'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejë' tsötaca' le udë'ë lë'e lari' tēbi. Channö gunë' caní, calégasö gaca ditaj lari' cubi na', pero lári'do' na' birúaj lë'e lari' cubi na' bití' tsöjlöza lari' tēbi na'. ³⁷ Lësca' caní, cuntu nu bönni' rigué'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'. ³⁸ Que lë ni na' ral-la' cá'aru' xisi uva cubi lu buzudi guídi cubi, ate' irópatë ilaca chí'i. ³⁹ Channö zoa nu rë'aj xisi uva gula, bití' gué'ënitë guí'aj xisi uva cubi, tu' rna: “Nácarö sizxí' xisi uva gula na'.”

6

Bönni' usëda queë' Jesús ta'lecjë' do zxoá' xtila dza lá'ayi

(Mt. 12:1-8; Mr. 2:23-28)

¹ Cate' naca tu dza lá'ayi quégaquië' bönni' judío, ridödë' Jesús gapa dë yöla zxoá' xtila, ate' bönni' usëda queë' ta'lecjë' do ga dxía zxoá' xtila.

Ta'zxúbi'ni ná'agaquië' le, en tahuë'. ² Ní'irö gula'nábinë' bönni' yudo' fariseo légaquië', ta'nnë':

—¿Bixx que runli' le cabí ral-la' gunru' dza lá'ayi?

³ Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacuá'len lë'?

⁴ Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' biti' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacuá'len lë'.

⁵ Ní'irö Jesús gudxë' légaquië', rnnë':

—Neda', Bönni' Guljë' Bönachi, naca' xani dza lá'ayi.

Tu bönni' narequi' në'ë

(Mt. 12:9-14; Mr. 3:1-6)

⁶ Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sëdë' queë' Dios, en busédinë' nupa nacuá'ni'. Zoë' ca' tu bönni' ni' narequi' në'ë ibëla. ⁷ Yugu' bönni' yudo' tu'sédinë', en yugu' bönni' yudo' fariseo tu'yúë' Jesús para ila'lé'enë' channö únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lé' didza'. ⁸ Réquibe'enë' Jesús le ta'zá' ládxi'gaquië', ate' gudxë' bönni' na' narequi' në'ë, rnnë':

—Guyasa. Guzuí gatsaj láhui'lö ni.

La' guyásatë' bönni' na', guzuínë'. ⁹ Ní'irö Jesús gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o ugúaru' le?

10 Ní'irö buyúë' Jesús yúgu'të bönni' na' nacué' gásibi'ilë', ate' gudxë' bönni' huë' na':

—Bulí no'ö.

Bulí në'ë bönni' na', ate' la' böácatë në'ë na'.

11 Ní'irö gula'lenë' bönni' yudo' na', ate' gulún xtídza'gaquië' la' légacasë' nacxi bi ilunë' queë' Jesús.

Riböë' Jesús chínnuë' bönni' ilácagaquië' gubáz queë'

(Mt. 10:1-4; Mr. 3:13-19)

12 Dza ni' guyijë' Jesús ga naca tu lu guí'ado'. Bulidzë' Dios ni', ate' idú yëla bé'lenë' Dios didza'.

13 Cate' za' rení', bulidzë' yugu' bönni' dá'gaquië' Lë', ate' guröë' chínnuë' para iláquië' gubáz queë'.

14 Bulidzë':

Simón, (lë' ca' Pedro),

Andrés, (böchë'ë Pedro),

Jacobo, en Juan, en Felipe, en Bartolomé,

15 Mateo, en Tomás,

Jacobo, (zxí'inë' Alfeo),

Simón, (bönni' ruí'i lãdxë'ë yödzo queë'),

16 Judas, (böchë'ë Jacobo),

en Judas Iscariote, (bönni' udödë' Jesús lu ná'agaquië' bönni' ilútië' Lë').

Ruúnë' Jesús bönachi zían

(Mt. 4:23-25)

17 Jesús bötjalënë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacué' zíanrö ca' bönni' usëda queë', ate' nacué'len légaquië' bönachi zían narúajgaca yúgu'të yödzo luyú Judea, en yödzo Jerusalén, en yugu' yödzo do' dëgaca ra' nísado' ga na' nacué' yödzo

Tiro, en yödzo Sidón. Bila'dxín bönachi ni ga ni' para ulu'zě nágagaca xtídzě'ě Jesús, en ulu'huóáca lu yödzo'hué' té'eguequi. ¹⁸ Bulu'huóáquié' ca' bönni' ni' ta'gui'i ta'záquié' lu ná'agaca bö' xihui'. ¹⁹ Yúgu'tě bönachi zían na' tu'i ládxi'gaca ila'gán Jesús tu' ruúně' léguequi len yöl-la' huáca queé'.

Nupa nágagaca bica' ba, en nupa nágagaca bica' bayechi'

(Mt. 5:1-12)

²⁰ Ní'irö buyüé' Jesús yugu' bönni' usěda queé' nacu'ě ni', en gudxě' légaquié':

—Bica' ba libí'ili', réquibe'eli' riyadzjali' le naca queé' Dios, tu' gata' queéli' lataj ga rinná bě'ě Dios.

²¹ Bica' ba libí'ili' ridunli' le gunně' Dios queéli', tu' huóljali'.

'Bica' ba libí'ili' ribódxili' tu' bi nadéli'li' le naca tsahui', tu' huadxín dza uzzídxili'.

²² Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacuá', en ila'nně zi' queéli', en ulu'cá'ana cá'asö le nazí'i lali' ca tu le naca xihui' tu' dá'ali' neda', Bönni' Guljě Bönachi. ²³ Buli'sí' xibé dza na', en buli'dzeja, tu' naca zxön le guequi queéli' yehua' yubá. Lěsca' caní guluně' xuz xtó'ogaca bönachi ni quégaquié' bönni' gulu'ě didza' uláz queé' Dios.

²⁴ Bica' bayechi' libí'ili', dě yöl-la' tsahui' queéli', tu' chidé le ruzí'ili' xibé.

²⁵ Bica' bayechi' libí'ili' nuhuóljaj nudzé'eli' na'a, tu' huadunli'.

'Bica' bayechi' libí'ili' ruzxídxili' na'a, tu' huí'nili', en cödxí yéchi'li'.

²⁶ Bica' bayechi' libí'ili' ta'nně yúgu'tě bönachi dxi'a queéli'. Lěsca' caní guluně' xuz xtó'oli',

gula'nně' dxi'a quégaquiě' bönni' gula'zí' yě'ě,
gula'nně' nácaquiě' bönni' tu'ě didza' uláz queě'
Dios.

Ral-la' idxí'iru' nupa biti' ta'lé'e rě'u dxi'a
(Mt. 5:38-48; 7:12)

²⁷ Gunně' ca' Jesús:

—Libí'ili' zóali' ni, en riyönili' xtídza'a, rea'
libí'ili': Guli'dxí'i nupa biti' ta'lé'e libí'ili' dxi'a.
Guli'gún le naca dxi'a quégaca nupa tu'dí'i libí'ili'.
²⁸ Guli'nabi Dios gaca dxi'a quégaca nupa tua'
dö' queéli', en buli'lidzě' Dios inábili'-ně' gácaleně'
nupa ta'nně' zı' queéli'. ²⁹ Channö nu capa' tsölá'a
xagu', buzě ia'tsölá'a ca' xagu'. Channö nu cúa lari'
naxóa cúdzı'u, bě' lataj cúa ca' xzo'. ³⁰ Núti'tės nu bi
inaba le dě quiu', bunödzej que, ate' nu cúa le nequi
quiu', biti' unabu' le. ³¹ Ca rě'ënili' ilún bönachi
queéli', lěsca' canı' guli'gún quéguequi.

³² 'Channö nadxı'ısili' nupa nadxı'igaca libí'ili',
ǰbizxi yöl-la' ba idéli'li'? Lěsca' canı' tuně' bönni'
dul-la', ta'dxı'ině' nupa nadxı'iguequi légaquiě'.
³³ Channö runli' le naca dxi'a quégacasö nupa tun
dxi'a queéli', ǰbizxi yöl-la' ba idéli'li'? Lěsca' canı'
tuně' bönni' dul-la'. ³⁴ Channö runödzejali' quégaca
nupa runli' löza ulu'bı'i queéli', ǰbizxi yöl-la' ba
idéli'li'? Lěsca' canı' tuně' bönni' dul-la', tu'nödzjě'
quégaca nupa tun dul-la', tu' tuně' löza ulu'bı'i
quégaquiě' lě na' bulu'nödzjě'. ³⁵ Neda' rea' libí'ili':
Guli'dxı'i nupa biti' ta'lé'e libí'ili' dxi'a, en guli'gún
le naca dxi'a. Buli'nödzaj quégaca bönachi sal-la'
biti' runli' löza nu ubı'i queéli'. Channö canı' gunli',
zxön naca le gata' queéli', ate' gácali' xzí'ini cazě'
Dios, Nu nácatěro lo, tu' runě' Lě' le naca dxi'a

quégaca bönachi biti' ta'yaza ládxi'gaca, en quégaca bönachi tuá' dö'. ³⁶ Buli'huéchi' ládxi'li' bönachi ca na' runé' Xúzili' Dios, ruhuéchi' ládxi'ë yúgu'té bönachi.

Biti' ral-la' ichugu bë'ëru' que luzá'aru'

(Mt. 7:1-5)

³⁷ Gunné' ca' Jesús:

—Biti' ichugu bë'ëli' que luzá'ali', ate' cuntu nu ichugu bë' queëli'. Biti' cuéaj bë'ëli' que luzá'ali', ate' cuntu nu cuéaj bë' queëli'. Buli'niti lo luzá'ali', ate' Dios uniti lahuë' ca' libí'ili'. ³⁸ Buli'nödzej que luzá'ali', ate' Dios gunné' queëli'. Ulu'nödzjé' queëli' le ulu'rixé' len tu guí'ina ribixi le naca idú, le naguirö, en naguí gate ga rë', en zóatica' gubá. Ca naca le ruríxili', la' cá'asö urixé' Dios ca' queëli'.

³⁹ Bucúdu'ë didza' Jesús, rë' légaquië':

—¿Naru' huácatsö nu bönni' lo chul-la ichë'ë ia'tué' bönni' lo chul-la? Biti' ca' gaca, tu' ila'bixé' iropé' tu lu yeru. ⁴⁰ Biti' ca' gácaré' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

⁴¹ ¿Bizx que ruyú' bëbudo' yu'u guiöj lahuë' böchi' luzó'o, en bití' rilé'enu' le zxön yu'u guiöj lo cazu'? ⁴² ¿Naru' huácatsö guío'-në' böchi' luzó'o: “Böcha'a, benna lataj cueja' bëbudo' yu'u guiöj lo”, en bití' rilé'enu' le zxön yu'u guiöj lo cazu'? Li', bönni' rulu'isö tsahui' cuinu', guléaj zí'alö le zxön yu'u guiöj lo cazu', ate' ní'irö ilé'enu' dxi'a para cueju' bëbudo' yu'u guiöj lahuë' böchi' luzó'o.

Le runru' naca bë' le nácaru'

(Mt. 7:17-20; 12:34-35)

⁴³ Gunné' ca' Jesús:

—Tu yaga dxi'a biti' cuía le naca cá'asö. Lësca caní, tu yaga gu'a biti' gaca cuía le naca dxi'a. ⁴⁴ Caní naca, le ribía tu yaga naca bē' ca naca yaga na'. Biti' ruchíbiru' le ribía yaga higo lu yaga yötsi', en calëga lu bisequi' yötsi' biti' ruchíbiru' le ribía lubá uva. ⁴⁵ Tu bönni' dxi'a ru'ë didza' dxi'a tu' yu'u le naca dxi'a icja ládxi'da'ahuë', ate' didza' xihui' ru'ë bönni' xihui' tu' yu'u icja ládxi'da'ahuë' le xihui'. Rinnë ruá'aru' ca naca le yu'u icja ládxi'do'oru'.

Chopa ca gaca cuéquiru' xilibi yu'u
(Mt. 7:24-27)

⁴⁶ Gunnë' ca' Jesús:

—¿Bizx que rulídzali' neda', rnnali': "Xantu', Xantu'", pero biti' runli' ca rinná bé'eda' libí'ili'? ⁴⁷ Ulu'ida' libí'ili' ca naca nu na' za' quia', en riyöni xtídza'a, en run ca rnna xtídza'a. ⁴⁸ Nu ni naca ca tu bönni', cate' benë' lidxë', guchö'önë' ga rë', en guléquië' xilibi yu'u ga naca lu guiöj. Cate' bötaj yegu gubó'o, guchö'öna cuita yu'u na', pero biti' guca uquínnaj le, tu' nulibi ga naca lu guiöj. ⁴⁹ Na'a, nu riyöni xtídza'a, en biti' run ca rnna, nu ni naca ca tu bönni' benë' lidxë' ga naca lu yu cá'asö. Biti' benë' xilibi. Cate' guchö'öna yegu gubó'o cuita yu'u na', la' biguínnajtë, ate' gubixi dërö zö'ö que.

7

Jesús ruúnë'-bi' bi'i huen dxin queë' tu bönni' unná bē'
(Mt. 8:5-13)

¹ Cate' Jesús budxi bé'lenë' légaquië' didza' ni, guyázië' yödzö Capernaum. ² Lu yödzö ni' zoë' tu bönni' Roma rinná bé'enë' bönni' röjáquië' gudil-la.

Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'. ³ Cate' biyönnë' bönni' ni didza' tu'ë bönachi ca naca queë' Jesús, la' gusól-la'të' bal-lë' bönni' gula tu'zéajni'inë' bönni' judío ga na' zoë' Jesús, tsöjôta'yugaquië' lahuë' Lë' guidé' uduhuënë'-bi' bi'i huen dxin queë' na' ré'ebi'. ⁴ Bönni' gula tu'zéajni'inë' na' bila'dxinë' ga zoë' Jesús, ate' guláta'yuë' lahuë' idú ládxi'gaquië', ta'nnë':

—Náquië' lesaca' bönni' na' gunu' queë' lë ni, ⁵ tu' runë' bal bönachi uládz queëru', en benë' tu yu'u queëru' ga rudúbiru' rusédaru' queë' Dios.

⁶ Ní'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusól-lë'ë bal-lë' böchi' luzë'ë ga zë'ë Jesús, ate' të' Lë':

—Xan, rnnë' bönni' na': “Biti' uguí'ínu', tu' cabi' naca' lesaca' tsáziu' lidxa', ⁷ en biti' naca' lesaca' guída' ga zu'. Que lë ni na' bití' burúguida' guída' ga zu'. Bë'ësö didza', ate' huöácatëbi' bi'i huen dxin quia'. ⁸ Neda' ca', zoa nu rinná be'e neda', ate' nacu'ë ca' bönni' röjáquië' gudil-la rinná bé'eda' légaquië'. Rea'-në' tuë': Guyéaj ni', ate' rejë'. Rea'-në' ia'túë': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'.”

⁹ Cate' biyönnë' Jesús didza' ni, bubáninë' queë' bönni' na', ate' buécjë', en gudxë' bönachi na' zá'gaca cúdzu'lë', rnnë':

—Le nácatë rea' libí'ili', cuntu nu bönni' Israel bití' röjxáqui'da'-në' réajlë'ë quia' ca réajlë'ë quia' bönni' ni.

¹⁰ Cate' bulu'dxinë' bönni' na' gusól-lë'ë bönni' rinná bé'enë' bönni' röjáquië' gudil-la, gula'yázië'

ga naca lu yu'u lidxë', en bila'lé'enë' chiböácabi' bi'i huen dxin na'.

Jesús rusubanë'-bi' bi'i bönni' queënu tu nigula uzëbi

¹¹ Gudödi guca lë ni, sa'yéajë' Jesús yödzö Naín, ate' dzágagaquië' bönni' usëda queë' Lë', len bönachi zián. ¹² Cate' bidxinë' gala' ra' yödzö na', bilé'enë' yugu' bönni' nuá'agaquië'-bi' tubi' bi'i bönni' nati. Söjácáchi'gaquië'-bi'. Bi'i nati na' nácabi' la's dui bi'i queënu tu nigula uzëbido'. Zián bönachi uladza queënu nigula uzëbi na' söjácálen-nu. ¹³ Cate' Xanru' bilé'enë'-nu, buéchi' ládxë'ë-nu, ate' gudxë'-nu:

—Bíti'rö cödxu'.

¹⁴ Ní'irö gubígui'ë Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunné':

—Bi'ido', li' rea', guyasa.

¹⁵ Ní'irö bubanbi'. Gurö'öbi' bi'i na' zí'alö nátibi', ate' gusí lobi' ruí'ibi' didza'. Jesús budödë'-bi' lu ná'anu xiná'abi'. ¹⁶ Cate' bönni' ni' bila'lé'enë' lë ni, guládxinë' yúgu'të', ate' gula'gu'ë Dios yöl-la' ba, ta'nné':

—Bidxín queëru' tu bönni' lo, ru'ë didza' uláz queë' Dios. Dios caz rácalenë' bönachi queë'.

¹⁷ Guzë didza' ca naca yöl-la' huáca queë' Jesús, ate' bila'yöni bönachi yúgu'të yödzö luyú Judea, en yúgu'të yödzö idú gásibi'ilö.

Le rinabë' Juan, bönni' buquilë' bönachi nisa (Mt. 11:2-19)

¹⁸ Bönni' dá'gaquië' Juan gula'guíxjöi'inë' lë yúgu'të lë ni runë' Jesús. Ni' yu'ë Juan lidxi guíë, bulidzë' chopë' bönni' na' dá'gaquië' lë, ¹⁹ ate'

gusöl-lë'ë légaquië' ga na' zoë' Jesús para ila'nábinë Lë', ila'nnë': "¿Nacu' Li' Cristo, bönni' ral-la' guídë', o naru' ral-la' cöztu'-në' bönni' yúbölö?" ²⁰ Cate' bila'dxinë' bönni' na' nasöl-lë'ë Juan ga na' zoë' Jesús, tē' Lë':

—Juan, bönni' buquilë' bönachi nisa, nasöl-lë'ë netu' para inábitu' Li', innatu': "¿Nacu' Li' Cristo, bönni' na' ral-la' guídë', o naru' ral-la' cöztu'-në' bönni' yúbölö?"

²¹ La' ná'asö ruúnë' Jesús zían nupa te'e, yugu' bönni' huë', en bönni' yú'ugaca légaquië' bö' xihui', ate' zían bönni' lo chul-la busaljë' guió'j lógaquië'. ²² Bubi'ë didza' Jesús, rë' chopë' bönni' na' nasöl-lë'ë Juan, rnnë':

—Guli'tséaj, guli'tsöjtíxjöi'i-në' Juan ca naca le bilé'eli', en le biyönili'. Tu'lé'enë' bönni' guchul-la lógaquië'. Tu'zë'ë bönni' gulatsjë'. Nuhuöácagaquië' bönni' gü'iguequinë' huë' nudzu' ruzödi. Tu'yönnë' bönni' gula'cödzue'. Nubángaquië' bönni' gulátië'. Ta'yönnë' bönni' yechi' didza' dxi'a. ²³ Bica' ba nu biti' gaca chopa ladxi', ate' za'len neda' sal-la' biti' runa' ca réqui nu na' ral-la' guna'.

²⁴ Cate' bönni' na' gusöl-lë'ë Juan bulu'zë'ë ni', gusílahuë' Jesús rulu'ínë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? ²⁵ ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de'e? Nöz quézili' nupa nácu'gaca lari' nazáca'de'e, en tu'zí' xibé yöl-la' tsahui', nacuá' lídxigaquië' bönni' ta'nná bē'ë.

26 ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' libí'ili', ate' nayépisëtêrë' ca nu ruí'i didza' uláz queë' Dios. 27 Náquië' Juan bönni' na' nazúaj lu guichi lá'ayi ca naca queë', rna: Buyútsöca', risöl-la'a-në' gubáz quia', inöruë' ca Li'. Bönni' ni uchi'ë nöza ga tödu'.

28 'Neda' rea' libí'ili': Gapa nacuá' bönachi, channö zoë' nu bönni' ru'ë didza' uláz queë' Dios, biti' nácarë' lo ca Juan, bönni' na' buquilë' bönachi nisa, pero nu nácatërö cuídi'sö ga rinná bë'ë Dios nayépisëtêrö ca Juan na'.

29 Cate' bönachi ni', en bönni' tu'quizxjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilë' nisa lu në'ë Juan, 30 pero yugu' bönni' yudo' fariseo, en bönni' yudo' tu'sédinë' xibá queë' Moisés biti' bila'dilë' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

31 Gunnë' ca' Xanru':

—¿Nacxi uséqui'tseda' bönachi nacuá' dza ni zóaru' na'a? ¿Nacxi caz nácagaquië'? 32 Nácagaquië' ca bí'ido' ta'guítjabi'. Ta'bö'öbi' lu yë'ëyi, en ta'bödxí'abi'. Ta'nnabi' tubi' ia'tubi': "Rucódxitu' queëli' gui, pero biti' ruyá'ali'. Rul-la yéchi'tu', pero biti' ribödxili'." 33 Caní nácali' tu' bidë' Juan, bönni' buquilë' bönachi nisa, en biti' gudahuë' yöta xtila, en biti' gu'ë xisi uva, ate' rnnali' queë': "Tu' xihui' dzaga lë'." 34 Cate' bida' neda', Bönni' Guljë' Bönachi, en rë'aj rahua', rnnali' quia': "Bönni' ni náquië' bönni' huágulë'ë, en bönni' re'jë'. Náquië' luzá'agaquië' bönni' tu'quizxjë', en ia'zíca'rë' bönni'

dul-la'." ³⁵ Rea' libí'ili': Naca bē' nupa nápagaca yöl-la' réajni'i queē' Dios ni'a que le túngaca.

Le benē' Jesús lidxē' tu bönni' yudo' fariseo

³⁶ Tu bönni' yudo' fariseo bulidzē' Jesús gágulenē' lē' tsözxön, ate' guyáziē' Jesús lidxē' bönni' na', en gurō'ē rahuē'. ³⁷ Zóanu lu yödzo na' tu nigula udá dzaga, en cate' nōzinu rō'ē rahuē' Jesús lidxē' bönni' yudo' fariseo na', ní'irō bidxinnu ni' nuá'anu tu bōga'do' néquini guiōj nazaca' le yudzu tu le rilá' zxixi. ³⁸ Cate' bidxinnu zaca' cúdzu'lē' Jesús, gurō'ōnu xini'ē ribōdxinu. Ní'irō gusí lonu rigú'unu nisa ribōdxinu ni'ē Jesús, en ruzxinu ni'ē len guitsa' ícjanu. Butsaga lonu ni'ē, en gulú'unu ni'ē lē na' rilá' zxixi. ³⁹ Cate' bönni' yudo' fariseo na' nulidzē' Jesús bilé'enē' lē ni, guzá' ládxē'ē, rnnē': "La'tu' náquiē' bönni' ni bönni' ru'ē didza' uláz queē' Dios, huéquibe'enē' nuzxi na', en nacxi nácanu nigula ni rigannu Lē', tu' nácanu nigula udá dzaga." ⁴⁰ Ní'irō Jesús gudxē' bönni' fariseo na', rnnē':

—Simón, dē tu le ral-la' guía' li'.

Bubi'ē didza' bönni' na', rnnē':

—Gunná, Bönni' Usedi.

⁴¹ Jesús rē' lē':

—Zoē' tu bönni' dē dumí queē', ate' nacu'ē chopē' bönni' tál-lē'ē dumí queē'. Tuē' bönni' na' ral-lē'ē queē' lazxjē' que chopa iz, ate' ia'túē' na' ral-lē'ē queē' lazxjē' que chopa beo'. ⁴² Tu' cabí dē quégaquiē' dumí ulu'guízxjē' lē na' tál-lē'ē queē', que lē ni na' buniti lahuē' iropē' lē na' tál-lē'ē queē'. Gunnátsöca' na'a. ¿Núzxilē' bönni' chopē' ni idxí'irōnē' bönni' na' buniti lahuē' légaquiē'?

43 Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasö rnno'.

44 Ní'irö buécjé' Jesús, ate' ni' ruyúë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quíbida' ni'a, pero nigula ni gulú'unu ni'a nisa ribödxinu, en buzzinu ni'a len guitsa' ícjanu. 45 Biti' butsaga lo' neda', pero cate' bidxíntea' lidxu', biti' ruzóa dxinu nigula ni, rutsaga lonu ni'a. 46 Biti' gulú'u icja' le za, pero nigula ni gulú'unu ni'a lë na' rilá' zxixi. 47 Que lë ni na' rea' li', dul-la' zían gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí'i Dios nu na'.

48 Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

49 Yugu' bönni' na' ta'bö'lenë' Jesús tahuë' gula'sí lógaquië' të' luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

50 Ní'irö Jesús gudxë'-nu nigula na', rnnë':

—Tu' réajlë'u neda', chibuló' li'. Böaj lidxu', zoa dxi ládXu'u.

8

Yugu' nigula tácalennu Jesús, ta'gú'unu le tahuë'

1 Gudödi gulaca lë ni, gudë' Jesús gapa nacúa' zían yödzo zxon, en yugu' yödzödo', ate' benë' libán ni', en bë'ë didza' que didza' dxi'a ca rinná bë'ë Dios, ate' idxínnutë' bönni' usëda queë'

dzágagaquië' Lë'. ² Bál-lanu nigula bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugúë' yugu' yödzhüë' gü'iguequinu. Nútsa'nu ladjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu. ³ Juana, nigula queë' Chuza, bönni' yu'u lu nëë le dë lidxë' Herodes, nútsa'nu ca' ladjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en zianrónu ca', le tahuë' Jesús, en yugu' bönni' usëda queë'. Tu'nödžjanu le dë quégacanu.

*Rucúdu'ë didza' Jesús ca naca queë' bönni' guz
(Mt. 13:1-9; Mr. 4:1-9)*

⁴ Bila'rúaj bönnachi zian yugu' yödžö ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdu'ë didza', rë' légaquië':

⁵ —Birúajë' bönni' guz, sǒjësië' xisedo'. Cate' ni' sǒjësië', bulu'huöxaj bal-la xisedo' na' ga naca la' nöza, ate' bulu'libi bönnachi léguequi. Bila'dxinba' ca' biguinnido', en gulé'ajba' xisedo' na' dzö'ö la' nöza. ⁶ Bulu'huöxaj ia'bal-la xisedo' na' lu yu ga rö'ö guiöj. Cate' gula'lén xisedo' na', la' gula'bídxitë tu' cabí nalupa' yu na'. ⁷ Bulu'huöxaj ia'bal-la xisedo' na' ga bulu'lén lubá yötsi'. Tsözxön gula'zxön lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi. ⁸ Bulu'huöxaj ia'bal-la xisedo' na' ga naca luyú bëbu. Cate' chigula'zxön, bulu'nödžaj. Tu dxigu' na' bunödžaj ia'tú gayuá'tërö xisedo' ca'.

Cate' budxi gunné' caní Jesús, bë'ë zidžaj didza', rnnë':

—¡Nu zoa nagui, en riyöni ral-la' uzë nagui!

*Bizx que rucúdzu'ë Jesús didza'**(Mt. 13:10-17; Mr. 4:10-12)*

⁹ Ní'irö yugu' bönni' usëda queë' Jesús gula'nábinë' Lë', ta'nnë':

—¿Bizxi sa'yéaj lë na' bucúdzu'u didza'?

¹⁰ Jesús gudxë' légaquië':

—Dios ruzéajni'inë' libí'ili' le nagachi' ca rinná bë'ë Lë', pero ia'zíca'rö bönachi ni, ru'ílena' léguequi didza' le rucúdzu'a didza' para cate' ulu'yúë', bití' ila'lé'enë', en cate' ila'yönnë', bití' ila'yéajni'inë'.

*Rigúxjö'ë Jesús le rulu'í le bucúdzu'ë didza'**(Mt. 13:18-23; Mr. 4:13-20)*

¹¹ Gunnë' ca' Jesús:

—Caní naca le rulu'í lë na' bucúdzu'a didza'. Xisedo' na' naca xtídzë'ë Dios. ¹² Xisedo' na' bulu'huöxaj la' nöza tu'lu'í ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládxi'do'gaquië', para cabí ila'yéajlë'ë, en cabí ulu'lë'. ¹³ Xisedo' na' bulu'huöxaj lu yu ga rö'ö guiöj tu'lu'í ca raca quégaquië' bönni' ta'yönnë' didza' na', en tu'dzéjanë' ta'zi'ë le, pero nácagaquië' ca xisedo' na' bití' ben lui. Tu chí'isö ta'yéajlë'ë, tu' ridxín le rizí' bë' légaquië', ate' la' tu'huóatë ládxi'gaquië'. ¹⁴ Xisedo' na' bulu'huöxaj ga bulu'lén lubá yötsi' tu'lu'í ca raca quégaquië' bönni' ta'yönnë' didza' na', en cate' chibila'yönnë', yugu' le tu'í ládxi'gaquië' yödzölió ni, en yugu' yöl-la' tsahui' que, en yugu' le ta'yaza ládxi'gaquië' le taca ni, tun nigui légaquië', ate' bití' run dxin didza' na' lu icja ládxi'do'gaquië'.

¹⁵ Xisedo' na' bulu'huöxaj ga naca luyú bëbu

tu'lu'í ca raca quégaquië' bönni', idú ládxi'gaquië' ta'yönnë' didza' na', en ta'gu'ë tsutsu le lu icja ládxi'do'gaquië', ate' lu yöl-la' riböza zxön ladxi' tunë' ca rnna didza' na'.

Rucúdu'ë didza' Jesús que le rigú'u bení' lédxiru'
(Mt. 4:21-25)

¹⁶ Gunnë' ca' Jesús:

—Cuntu nu bönni' ruquelë'ë guí', ate' la' rudúsi'të' le gu'ina, en bití' rigú'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ni' ulu'zí' xibé guí' na'. ¹⁷ Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

¹⁸ 'Que lë ni na', buli'zë nágali', tu' huadéli'në' ia'lati' bönni' ruzóë' tsutsu icja ládxi'da'ahuë' didza' riyönnë', en huazi'rë' xtídzë'ë Dios, pero bönni' bití' ruzóë' tsutsu icja ládxi'da'ahuë' didza' riyönnë', huadúa didza' na' biyönnë'.

Xinë'ë Jesús, en yugu' bönni' böchë'ë
(Mt. 12:46-50; Mr. 3:31-35)

¹⁹ Ní'irö bila'dxinë' xinë'ë Jesús, en yugu' bönni' böchë'ë ga na' zoë', pero bití' guca ila'bíguë'ë gala' ga zoë' tu' nacuá' bönachi zían ni'. ²⁰ Zoa ni' nu bulidza Jesús, rnna:

—Nacu'ë xinó'o, en yugu' bönni' böchu'u lö'a. Té'ënnë' ilu'ílenë' Li' didza'.

²¹ Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rnna, bönni' ni nácagaquië' ca xiná' caza', en yugu' bönni' böchi' caza'.

Jesús ribequi dxíë' bö' budunu'
(Mt. 8:23-27; Mr. 4:35-41)

22 Tu dza gurenë' Jesús tu lë'e bárcodo', dzágagaquië' bönni' usëda queë' Lë', ate' Jesús rë légaquië':

—Udöditsöca'ru' ia'tsölá'a nísado' ni.

Ní'irö söjácatë'. 23 Tsanni ni' ta'dödë' lu nísado' na', rásië' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' zxan nisa, en zoa bönadxi quégaquië'. 24 Ní'irö gula'biguë'ë ga dë' Jesús, en bulu'subanë' Lë', ta'nnë':

—¡Bönni' Usedi! ¡Bönni' Usedi! ¡Chirequi huötjaru' lu nisa!

Cate' hubanë' Jesús, bulidzë' bö' na' recja, en nisa na' riyasa ridxíada', ate' guzóa dxi bö' na' recja, en gurö'ö dxi lu nísado' na'. 25 Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dios?

Guládxinë' légaquië', en tu'báninë'. Gulë luzá'agaquië' tuë' ia'túë':

—¿Nuzxi caz bönni' ni? Rinná bé'enë' bö' recja, en nísado', ate' tun ca rnna xtídzë'ë.

*Tu bönni' yödzo Gadara yu'u lë' bö' xihui'
(Mt. 8:28-34; Mr. 5:1-20)*

26 Ní'irö bila'dxinë' lu xiyúgaquië' bönni' Gadara, le dë ia'tsölá'a nísado' ca dödilö ga dë luyú Galilea.

27 Cate' birúajë' Jesús lë'e bárcodo' na' ga naca lu yu na', dutságuië' tu bönni' yödzo na' Lë'. Chigudzé yu'u bö' xihui' lë', ate' bíti'rö rácuë' lari', en bíti'rö rizóë' lu yu'u, pero nun xilatjë' lu zxan bulóaj ga nádjagaca yeru ba. 28 Cate' bönni' na' yu'u bö' xihui' lë' bilé'enë' Jesús, gurödxí'ë zidzaj, ate' buzóa zx-ibë' lahuë' Jesús, en bë'ë zidzaj didza', rnnë':

—¿Bizxi ral-la'a quiu', Jesús, Zxi'iné' Dios nayépisëtëré'? Ráta'yua' lo' cabí usaca' zi'u neda'.

²⁹ Caní gunné' tu' chigunná bé'ené' Jesús bö' xihui' na' urúaj lu bönni' na'. Zián luzuí zí'atëlö burixi butúluda' bö' xihui' na' bönni' na', ate' yugu' bönni' yödzö ni' gulúgui'ë lë' du guië, en bulu'xéjané' bregui' guië ni'a në'ë, pero blë'ë yugu' du guië na', ate' bö' xihui' na' yu'u lë' guché' lë' lu lataj cá'asö. ³⁰ Ní'irö Jesús gunábiné' bö' xihui' na', rnné':

—¿Bi leu'?

Bö' xihui' na' gudxi Lë':

—Le Zián lea'.

Caní gunná tu' yú'ugaca bö' xihui' zián bönni' na'. ³¹ Ní'irö yugu' bö' xihui' na' guláta'yugaca lahuë' Jesús cabí isöl-lë'ë léguequi lataj chul-la quégaca nupa nátigaca. ³² Nacuá'aba' ca' tu cö'öba' cuchí zián ta'daba' táguba' lu guí'ado' ni', ate' bö' xihui' na' gula'naba yechi' Jesús gu'ë léguequi lataj tsöjtsú'ugaca cuchí zián na'. Jesús bë'ë léguequi lataj. ³³ Bulu'rúaj yugu' bö' xihui' lu bönni' na', en yöjtsú'ugaca cuchí zián na', ate' yöjácaba' cuchí zián na' ga naca tu lë'e guiöj. Yöjbíxigacaba' lu nísado', ate' ni' gula'yépiba' nisa, gulátiba'.

³⁴ Cate' bila'lé'ené' bönni' tu'yúgaquië'-ba' cuchí zián na' ca na' guca quégacaba', guladxí gula'dzöbiné'. Bulu'zxúnnajé' ni', ate' yöjhuöjgaquië' yöjtíxjöi'iguequiné' nupa nacué' yödzö na', en nupa nacué' la' guixi' ni'. ³⁵ Ní'irö bila'rúajé' bönni' yödzö na', yöjyúgaquië' lë' na' guca. Cate' bila'dxiné' ga na' zoé' Jesús, bila'lé'ené' bönni' na' gula'yú'u bö' xihui' lë', rö'ë xini'ë Jesús. Nacuë' lari', en dxí'ado' chizöé', ate' guládxiné'. ³⁶ Nupa

na' bila'lé'e lë na' guca gula'guíxjöi'i légaquié' ca guca, böáquié' bönni' na' gula'yú'u bö' xihui' lë'.
³⁷ Ní'irö yúgu'të bönachi zían na' quégaca yödzö nabábagaca Gadara na' guláta'yu lahué' Jesús urúajë' lu xiyúguequi, tu' tádxinë'. Bubenë' Jesús lë'e bárcodo' na', en söhuöjë'.
³⁸ Bönni' na' bulu'rúaj bö' xihui' na' lë' gúta'yué' lahué' Jesús gu'ë lë' lataj tséajlenë' Lë' tsözxön. Gunná bé'enë' Jesús lë' ugá'anë' ni', rnnë':

³⁹ —Böaj lidxu'. Yöjtíxjöi'i bönachi uládz quiu' yugu' le zxön benë' Dios quiu'.

Böajë' bönni' na' lidxë', ate' buzé' didza' idú lu yödzö ni' ca naca le zxön benë' Jesús queë'.

Jesús ruínë'-bi' bi'i nigula queë' Jairo enca' nigula na' gudannu lari' nácuë'
 (Mt. 9:18-26; Mr. 5:21-43)

⁴⁰ Cate' budxinë' Jesús ia'tsölá'a nísado' na', bulu'dzeja bönachi zían nacué' ni' ni'a queë' Lë', tu' ta'böza Lë'.
⁴¹ Ní'irö bidxinë' Jairo ga zoë' Jesús. Náquié' bönni' lo que yu'u ga tu'dubë' bönni' judío, en tu'sëdë' queë' Dios. Biyéchuë' xini'ë Jesús, en gúta'yué' lahué' tsejë' lidxë'.
⁴² Caní benë' tu' zóabi' tubi' bi'i nigula queë', chirequi gátibi'. Nácabi' bi'i la's dui queë', en yú'ubi' ca chinnu iz. Tsanni ni' sa'yéajë' Jesús, sönógaca tu'quirö bönachi zían Lë'.

⁴³ Nútsa'nu tu nigula ladaj bönachi zían na', chiguca chinnu iz riguí'i rizáca'nu. Biti' ruhuí'i rön queë'nu que hué' quégaca cázanu nigula, ate' chibutönu dëra le dë queë'nu, riguízxjanu nupa tu'ún bönachi, pero bití' guca nu bönni' únë'-nu.
⁴⁴ Gubíga'nu zaca' cúde' lë' Jesús, en gudannu ruí'i lari' nácuë', ate' la' bu'ítë hué' rön queë'nu.

45 Ní'irö Jesús gunábinë' nupa nacuá' ni', rnnë':

—¿Nuzxi na' gudán neda'?

Gula'dá'bagui'ë yúgu'të'. Ní'irö Pedro, en nupa nacuá'len lë' gulë' Lë', ta'nnë':

—Bönni' Usedi, nacuá' bönachi zián ni, tu'quirö Li', en tu'dxiga' Li', ate' ¿rnnatso': “¿Nuzxi na' gudán neda'?”

46 Ní'irö Jesús gunnë':

—Zoa nu gudán neda', tu' gúquibe'eda' birúaj yöl-la' huáca neda' le ruún bönachi.

47 Cate' réquibe'enu nigula na' nözinë' Jesús le bennu, ní'irö guzxízinu. Biyéchunu xini'ë Jesús, en gudíxjöi'inu Lë' lógaca bönachi zián na' bizx que na' gudannu lari' nácuë', en ca na' guca, la' böácatënu.

48 Ní'irö Jesús gudxë'-nu:

—Nigúlado', tu' réajlë'u neda' chiböácu'. Böaj lidxu', zoa dxi ládXu'u.

49 Cate' ni' ru'ë Jesús didza' ni, bidxinë' tu bönni' ni', zë'ë lidxë' bönni' lo na' que yu'u ga tu'dubë' tu'sedë' queë' Dios, ate' gudxë' bönni' lo na':

—Chigútibi' bi'i nigúlado' quiu'. Bítirö upízxjanu'në' Bönni' Usedi.

50 Cate' biyönnë' Jesús lë ni, bubí'ë didza', rë bönni' lo na':

—Biti' gádxinu'. Guyéajlë'ësö Dios. Huöácabi' bi'i nigúlado' quiu'.

51 Cate' guyázië' Jesús yu'u na', biti' bë'ë lataj nu tsázalen Lë', pero légacasë' Pedro, en Jacobo, en Juan, enca' xuz xiná'abi' nigúlado' na'. 52 Ta'bödxi nupa nacuá' ni'. Ta'bödxi yechë'ë ni'a queëbi' bi'i nigúlado' na', ate' Jesús rë' légaquië', rnnë':

—Bítirö cödxili'. Biti' nátibi' nigúlado' ni. Rásisibi'.

53 Bulu'titjē' Lē' tu' nōzguequinē' chinátibi'.
 54 Ní'irō gudélē'ē Jesús ná'abi', en bē'ē zidzaj didza', rnnē':

—Bi'i nigúlado', guyaschi.

55 Ní'irō bu'u bō' naca cázabi', bubanbi', ate' la' guyásatēbi'. Jesús gunná bé'enē' légaquiē' ilu'ē le gágubi'. 56 Bulu'báninē' xuz xiná'abi', pero Jesús gunná bé'enē' légaquiē' cuntu nu ilé' ca na' guca.

9

Risöl-lē'ē Jesús bōnni' usēda queē' tsōjéngaquiē' libán

(Mt. 10:5-15; Mr. 6:7-13)

1 Ní'irō butubē' Jesús idxínnutē' bōnni' usēda queē', ate' budödē' lu ná'agaquiē' yöl-la' huáca, en yöl-la' unná bē' para ulu'béajē' bō' xihui' yú'ugaca bōnachi, en ulu'únē' nupa te'e. 2 Gusöl-lē'ē légaquiē' tsōjéngaquiē' libán ca rinná bē'ē Dios, en tsōjhuéngaquiē' nupa te'e. 3 Jesús gudxē' légaquiē':

—Biti' bi guá'ali' para la' nōza, calēga xiyágado', en calēga yōxaj, en calēga yōta, en calēga dumí, en biti' ixóa yenli' chopa lari'. 4 Bítitēs yu'u ga tsú'uli', guli'sóa ni' cate' uzá'arōli' yōdzō na'. 5 Gátitēs ga biti' ilún bōnachi libí'ili' bal, buli'rúaj yōdzō na', en guli'cuíbi bēchtō da' lē'e lábali', le ulu'í légaquiē' nagá'ana xíguia' nabága'gaquiē'.

6 Ní'irō bila'rúajē' bōnni' usēda queē' na'. Gula'dödē' yúgu'tē yōdzōdo', tunē' libán que didza' dxi'a, en tu'únē' nupa te'e yúgu'tē lu yōdzō na'.

Ca gútiē' Juan, bōnni' buquilē' bōnachi nisa
(Mt. 14:1-12; Mr. 6:14-29)

⁷ Biyönnë' Herodes, bönni' rinná bē'ē, ca naca yúgu'tè le runë' Jesús, ate' gurö'ē böniga, tu' ta'nná bönachi:

—Juan na' chibubanë' lu yöl-la' guti.

⁸ Ia'bal-lë' ta'nnë':

—Chibulë'ē Elías, bönni' na' bē'ē didza' uláz queë' Dios.

Ia'bal-lë' ta'nnë':

—Chibubanë' tu bönni' bítsë'ē yugu' bönni' gulu'ē didza' uláz queë' Dios dza ni'te.

⁹ Herodes na' gunnë':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ē Herodes ilé'enë' Jesús.

*Rugahuë' Jesús chi-un gayuá' bönachi
(Mt. 14:13-21; Mr. 6:30-44; Jn. 6:1-14)*

¹⁰ Cate' bulu'dxinë' bönni' gubáz nasöl-lë'ē Jesús ga zoë' Lë', bulu'siyönnë' Lë' yúgu'tè le gulunë'. Ní'irö guchë'ē Jesús légaquië' quez. Yöjáquië' tu lataj cá'asö lu xiyú yödzö Betsaida. ¹¹ Cate' chinöziguequi bönachi lë ni, yöjnóguequi Lë', ate' Jesús benë' léguequi bal, en bē'lenë' léguequi didza' ca rinná bē'ē Dios, ate' bunë' nupa te'e.

¹² Cate' chizá' ral-la dza na', idxínnutë' bönni' gubáz queë' Jesús gula'bíguë'ē ga zoë', en tē' Lë':

—Busöl-la' bönachi ni tsöjaca gapa dē yödzödo', en gapa dē yú'udo' idú gásibi'ilö para tsöjtíljagaquië' gapa ulu'gá'anë', en bi ilahuë', tu' naca lataj cá'asö ga ni zóaru'.

¹³ Ní'irö Jesús rë' légaquië':

—Guli'gu'ē libí'ili' le ilahuë'.

Të' Lë':

—Gáyu'sö yöta xtílado' dë, en chópasöba' böla dëba' queëtu', o ¿naru' huayéajtsatu' tsöjõ'öutu' le ilágugaca bönachi zían ni?

¹⁴ Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

¹⁵ Caní gulunë', ate' gula'bö'ë yúgu'të'. ¹⁶ Ní'irö gudélé'ë Jesús gayu' yöta xtila na', en chópaba' böla na', ate' guchisa lahuë' ruyúë' lúzxiba, en rë' Dios: "Xclenu'." Ní'irö buzxuzxjë' léguequi, en bë'ë quégaquië' bönni' usëda queë' para ulu'cu'ë lógaca bönachi na'. ¹⁷ Gulahuë' yúgu'të', en bulu'huöljanë'. Gudödi na' bulu'tubë' yugu' bizxaj bugá'ana, ate' bulu'lié' idú chinnu ga'böra.

*Rnnë' Pedro Jesús náquië' Cristo
(Mt. 16:13-19; Mr. 8:27-29)*

¹⁸ Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

¹⁹ Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquile' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

²⁰ Ní'irö Jesús gunábinë' légaquië', rnnë':

—Názxi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasöl-lë'ë Dios.

Riguúxjö'ë Jesús ca si' ilútië' Lë'

(Mt. 16:20-28; Mr. 8:30-9:1)

²¹ Ní'irö Jesús gúdxidë'ë légaquië', en gunná bé'enë' légaquië' cuntu nu ilé' Nu náquië' Lë'.

²² Ní'irö rë' légaquië':

—Run bayudxi qui'i saca'a neda', Bönni' Guljë' Bönachi, zían le gaca quia'. Ulu'cá'anë' neda' cá'asö yugu' bönni' gula tu'zéajni'inë', en yugu' bixúz unná bé', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

²³ Gudxë' ca' yúgu'të':

—Channö rë'ënë' nu bönni' të'ë neda', ral-la' uzóë' tsolá'alö le dë queë', en gáquië' ca tu bönni' sa'yéajë' söjtë'ë lë'e yaga cruz, ate' ní'irö gaca të'ë neda'. ²⁴ Núti'tës bönni' ruí'i ládxe'ë gun chi'ë yöl-la' na'bán queë', unítie' le, pero channö unítie' yöl-la' na'bán queë' tu' dë'ë neda', bönni' ni gata' yöl-la' na'bán idú queë'. ²⁵ Biti' bi uzi'ë xibé tu bönni' channö utubë' queë' yúgu'të le dë yödzolió ni, pero unítie' tsaz yöl-la' na'bán queë'. ²⁶ Nu bönni' rutuí'inë' neda', en rutuí'inë' ca' xtídza'a, lësca' neda', Bönni' Guljë' Bönachi, utuí'ida' bönni' na' cate' huöda' idinná bé'a, dzágagaca neda' yöl-la' zxön queë' Xuza', en yöl-la' zxön queégaquië' gubáz lá'ayi queë' Dios. ²⁷ Le nácatë rea' libí'ili', nacuá' bal-lë' bönni' ni bití' ilátie' cate' ila'lé'erönë' dza idinná bé'ë Dios.

Ridzá' ca riná' lahuë' Jesús

(Mt. 17:1-8; Mr. 9:2-8)

²⁸ Cate' bizá'a xunu' gubidza gudödi bé'ë Jesús yugu' didza' ni, ní'irö guchë'ë Pedro, en Juan,

en Jacobo, ate' gurenë' tu lu gu'ado', ga na' bulidzë' Dios. ²⁹ Tsanni ni' ru'ilenë' Dios didza', bidzá' ca riná' lahuë', ate' böáca chiguíchido'os lari' nácuë', en guyëpi yösa bení'. ³⁰ Ní'irö bulu'lu'í lógaquië' chopë' bönni' ga zoë' Lë' tu'ilenë' Lë' didza'. Nácagaquië' Moisés, en Elías. ³¹ Chopë' ni gula'yëpë' yösa bení', ate' tu'ilenë' Jesús didza' ca si' uzé'ë yödzölió ni, gátië' lu yödzö Jerusalén. ³² Salla' chirácada' ilásië' Pedro, en nupa nacuá'len lë', bayudxi gula'ná'asë', ate' bila'lé'enë' yöl-la' bení' queë' Jesús, en chopë' na' nacuá'lenë' Lë'. ³³ Cate' bulu'zë'ë chopë' na' ga na' zoë' Jesús, ní'irö Pedro gudxë' Lë':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

Biti' réquibe'enë' Pedro bi na' rnnë'. ³⁴ Tsanni ni' ru'ë didza' ni, la' gurö'ötë böaj le bugacu légaquië', ate' guládxinë' tu' nacu'ë lu böaj na'. ³⁵ Ní'irö biyön chi'i Nu ru'í didza' lu böaj na', rnna:

—Bönni' ni náquië' Zxí'ina'. Nadxí'ida' Lë'. Buli'zë' nágali' didza' gu'ë.

³⁶ Cate' budxi bë' didza' chi'i na', tuzë' Jesús nagá'analenë' légaquië'. Ta'cuá' dxíë' bönni' usëda queë', ate' dza na' cuntu nu gulé' ca naca le bila'lé'enë'.

Ruúnë' Jesús bi'i bönni' yu'u bö' xihui' lëbi'
(Mt. 17:14-21; Mr. 9:14-29)

³⁷ Cate' za' rení' ia'tú dza bulu'huötjë' Jesús, en bönni' na' dzágagaquië' Lë' lu gu'ado' na', ate' bila'rúaj bönachi zían dutságagaca Jesús. ³⁸ Ní'irö

bë'ë zidzaj didza' tu bönni' nùtsë'ë ladaj bönachi zian na'. Bulidzë' Jesús, rnnë':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'. ³⁹ Yu'u bö' xihui' lëbi' le run ga ribödxi'abi', en ruxízida' lëbi'. Run ga ribía bidxina' zxöna' ruá'abi', en rurixi rutúluda' lëbi', ate' catu caz rusán lëbi'. ⁴⁰ Gúta'yua' lógaquië' bönni' usëda quiu' ulu'béajë' le, pero biti' gula'zëqui'në'.

⁴¹ Bubi'ë didza' Jesús, rnnë':

—Libi'ili', biti' réajlë'ëli', en nachixi ícjali'. ¿Gáca'xte ral-la' sóalena' libí'ili', en guá' ilena' queëli'? Dijua'a-bi' bi'i bönni' quiu' ni.

⁴² Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'. ⁴³ Bulu'bani yúgu'të bönachi ni' ca naca yöl-la' huáca zxön queë' Dios.

Jesús ru'ë didza' leyúbölö ca si' ila'zönë' Lë'
(Mt. 17:22-23; Mr. 9:30-32)

Tsanni ni' tu'bani yúgu'të bönachi ca naca le zxön runë' Jesús, Lë' gudxë' yugu' bönni' usëda queë', ⁴⁴ rnnë':

—Guli'cú'u icja nágali' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

⁴⁵ Biti' gula'yéajni'inë' bönni' usëda queë' didza' ni, tu' cabi' ru'ínë' Dios légaquië' lataj ila'yéajni'inë', pero biti' bulu'rúguinë' ila'nábinë' Jesús ca naca didza' ni.

Nu naca lo
(Mt. 18:1-5; Mr. 9:33-37)

46 Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'túë' núzxilë' gáquië' lo. 47 Réquibe'enë' Jesús le ta'zá' ládxi'gaquië', ate' gudélë'ë-bi' tubi' bí'ido', en buzóë'-bi' cuitë'. 48 Ní'irö rë' légaquië':

—Núti'tës bönni' gunë' bal tu bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasöl-lë'ë neda'. Que lë ni na' bönni' nútsë'ë ládjali nácarë' nöxaj ladxi', bönni' ni náquië' lo.

Nu bití' ridá'baga' rë'u, rácalen rë'u

(Mr. 9:38-40)

49 Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabí dë'ë rë'u.

50 Jesús rë' lë':

—Biti' inná bé'eli'-në', tu' rácalen rë'u nu bití' ridá'baga' rë'u.

Jesús ridil-lë' Jacobo, en Juan

51 Cate' chizá' gal-la' dza ral-la' gátië' Jesús, en huëpë' yehua' yubá, benë' bayudxi tsejë' Jerusalén.

52 Gusöl-lë'ë yugu' bönni' gubáz queë' ila'nöruë' ca Lë', ate' yöjáquië' tu yödzödo' quégaca bönachi Samaria para tsöjpa'agaquië' ga ugá'anë' Jesús tu yëla. 53 Yugu' bönni' yödzö na' bití' gulunë' Jesús bal tu' chinaca queë' sa'yéajë' Jerusalén. 54 Cate' Jacobo, en Juan, bönni' usëda queë' Jesús, bila'lé'enë' lë ni, të' Lë':

—Xan, ¿naru' inábatsöca'tu' huötaj guí' le za' yehua' yubá, en usuniti légaquië', guntu' ca na' benë' Elías?

⁵⁵ Buécjē' Jesús, en gudil-lē' légaquiē', rnnē':

—Biti' nōzili' bizxi bö' dzágui libí'ili'. ⁵⁶ Bida' ni neda', Bönni' Guljē' Bönachi, calēga para usunítia' yöl-la' na'bán quégaca bönachi, pero bida' dusölá' bönachi.

Ní'irö yójáquiē' yödzö yúbölö.

Nupa tē'ēni tsöjácálen Jesús

(Mt. 8:19-22)

⁵⁷ Tsanni ni' yú'ugaquiē' nōza Jesús, en yugu' bönni' dá'gaquiē' Lē', bidxinē' tu bönni' yödzö Jerusalén, en rē' Jesús:

—Xan, rē'ēnda' sá'lēna' Li' gáti'tēs ga tseju'.

⁵⁸ Jesús rē' lē':

—Yúgu' böza', nacuá' zcan bulóaj quégacaba', ate' biguínido', dxíagaca xcá'agacaba', pero neda', Bönni' Guljē' Bönachi, biti' dē quia' ga gáta'a uzí' lādxa'a.

⁵⁹ Ní'irö Jesús gudxē' tu bönni' yúbölö, rnnē':

—Gudá' neda'.

Bönni' ni gudxē' Lē':

—Xan, benna neda' lataj huōja' lidxa' ga idxinrö dza chibucácha'a-nē' xuza'.

⁶⁰ Jesús gudxē' lē':

—Bē' lataj bönni' chizóa ilátiē' ulu'cáché'ē nupa chinati quégaquiē', pero li', guyéaj, yójén libán ca inná bē'ē Dios.

⁶¹ Ní'irö bidxinē' ia'túē' ca', en rē' Jesús:

—Xan, rē'ēnda' sá'lēna' Li', pero benna neda' lataj tseja' tsöjzégacada'-nē' didza' di'a dza quia'.

⁶² Jesús gudxē' lē':

—Núti'tēs bönni' ruí'i lādxe'ē le raca yödzölió náquiē' ca tu bönni' rugá'anē'-ba' bēdxi, en ruyúē'

zaca' cúdzu'lë'. Nu run caní bití' naca lesaca' tsaza ga rinná bē'ē Dios.

10

Risöl-lë'ē Jesús tsónnalalaj yu' chië' bönni' tsöjéngaquië' libán

¹ Gudödi gulaca yugu' lë ni, guröë' Xanru' ia'tsónnalalaj yu' chië' bönni' usëda queë', ate' gusöl-lë'ē légaquië' chopa huéajgaquië' para ila'nöruë' ca Lë', en tsöjajúquië' yúgu'të yödzo, en yödzo do' gapa chizóa tödë' Lë'. ² Gudxë' légaquië':

—Le nácatë, dëda' dxin quia', le naca ca tu la' yëla zxön ga nu tsöjlapa', pero nabábasö huen dxin quia' nacua'. Que lë ni na', guli'gáta'yu lahuë' Dios, náquië' Xan la' yëla na', isöl-lë'ē yugu' huen dxin ga naca la' yëla queë'. ³ Guli'tséaj na'a. Buli'yútsöca', neda' risöl-la'a libí'ili', nácali' ca yugu' bö'cu' zxila' söjácaba' ladjagacaba' bö'cu' guí'a sínia'. ⁴ Biti' guá'ali' yöxaj dumí, en calëga buzudi yöta, en bití' guá'ali' ia'tú cö' xiráchuli', en bití' tseli' para gü'ilenli' bönachi didza' gapa naca la' nöza. ⁵ Gátitës yu'u ga tsú'uli', innali': “Le ribequi dxi ladxi' gaca quégaca bönachi nacua' yu'u ni.” ⁶ Channö zoa ni' nu bönni' si'ë yöl-la' ribequi dxi ladxi', ugá'analen lë' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ili' le ribequi dxi ladxi' na' inábali'. ⁷ Guli'gá'ana yu'u ga na' tsú'uli', en guli'guí'aj guli'gagu bi ilunnë' queëli', tu' udzöli quézinë' bönni' huen dxin le gahuë'. Biti' tödili' yu'u yu'u. ⁸ Gátitës yödzo ga tsú'uli', ate' ilún libí'ili' bal, guli'gagu le ulu'cu'ë loli'. ⁹ Buli'ún

nupa te'e nacuá' yödzo na', en guli'guie léguequi: "Chibidxín le rinná bē'ē Dios ga zóali'." ¹⁰ Gátí'tēs yödzo ga tsú'uli', channō cabí ilún libí'ili' bal, guli'rúaj, tsöjsóali' la' nōza que yödzo na', en innali': ¹¹ "Bēchtō que lādzali' le da' lē'e lābatu' ruquínnajtu', le rulu'i nabága'li' xíguia', pero ral-la' inózili' lē ni, chibidxín le rinná bē'ē Dios ga zóali'." ¹² Neda' rea' libí'ili', cate' idxín dza ichúguiē' Dios quégaca bönachi, ila'gu'i ila'zaca'rō bönachi yödzo ni' ca ila'gu'i ila'zaca' bönachi yödzo Sodoma, nupa ni' busunítiē' Dios.

*Le gaca quégaca nupa biti' ulu'bí'i lādxi'gaca
(Mt. 11:20-24)*

¹³ Gunnē' ca' Jesús:

—Bica' bayechi' libí'ili', bönachi yödzo Corazín. Bica' bayechi' libí'ili', bönachi yödzo Betsaida. La'tu' gulaca lu yödzo Tiro, en lu yödzo Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i lādxi'gaquiē' bönni' ni', ate' ilácuē' lari' cá'asō, en ila'gu'ē dō ícjagaquiē', le ulu'igaca chibulu'bí'i lādxi'gaquiē'. ¹⁴ Que lē ni na', cate' idxín dza ichúguiē' Dios quégaca bönachi, quí'i sáca'rōli' ca ila'gu'i ila'záquiē' bönni' yödz Tiro, en yödz Sidón. ¹⁵ Libí'ili', bönachi Capernaum. Réquili' tsázali' yehua' yubá. Huótjali' tsöjtsázali' lataj chulla quégaca nupa nátigaca.

¹⁶ Ní'irō Jesús gudxē' yugu' bönni' usēda queē', rnnē':

—Nu ruzē nagui libí'ili', ruzē nagui ca' neda', ate' nu rucá'ana libí'ili' cá'asō, rucá'ana ca' neda' cá'asō, en nu rucá'ana neda' cá'asō, rucá'ana ca' cá'asō Xuza', nasöl-lē'ē neda'.

Bönni' yöjéngaquië' libán tu'dxinë' ga zoë' Jesús

¹⁷ Cate' tsónnalalaj yu' chië' bönni' na' gusöl-lëë Jesús bulu'dxinë' ga zoë' Lë', bönni' na' yöjéngaquië' libán, ta'nnë':

—Xan, tun bö' xihui' ca rnnatu' cate' ruguntu' dxin Lo'.

¹⁸ Jesús gudxë' légaquië':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú. ¹⁹ Buli'yútsöca', neda' nudöda' lu ná'ali' yöl-la' unná bë' para gaca söngacali'-ba' bëla sínia', en xöjnö', en biti' bi gaca queëli', ate' ucúl-lali' yöl-la' unná bë' que tu' xihui', nu biti' rilé'e rë'u dxi'a. ²⁰ Na'a, buli'dzeja, calégasö tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

Rudzéjanë' Jesús

(Mt. 11:25-27; 13:16-17)

²¹ La' ní'sö rudzéjanë' Jesús, dzáguië' Dios Bö Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquië' bönni' táquië' yenni', en bönni' ta'yéajni'inë', pero bulu'iguequinu'-bi' bí'ido' ca naca. ¡Ca' gaca, Xuza', tu' caní guyaza ládXu'u!

²² Ní'irö gunné':

—Yúgu'të budödë' Xuza' lu na'a. Cuntu nu bönni' nözinë' Nu náquië' Zxi'inë' Dios, pero tuzë' Dios Xuz nözinë', ate' cuntu nu nözi Nu náquië' Dios Xuz, pero tuzë' Zxi'inë' nözinë', ate' inözigaca ca' nupa na' Zxi'inë' rë'ënë' uluf'inë' léguequi Xuzë'.

²³ Ní'irö Jesús buyué' yugu' bönni' usëda queë', en rë' légaquië':

—Bica' bágaca nupa ta'lé'e le rilé'eli' libí'ili',
 24 tu' rea' libí'ili': Zián bönni' gulu'ë didza' uláz
 queë' Dios, enca' bönni' gula'nná bē'ë, gulé'ënnē'
 ila'lé'enē' le rilé'eli', pero bití' bila'lé'enē' le.
 Gulé'ënnē' ila'yönnē' le riyönili', pero bití'
 bila'yönnē' le.

Tu bönni' Samaria, bönni' tsahui'

25 Ní'irö guyasē' tu bönni' yudo' usedi, en para si'
 bē'ë Jesús, gunábinē' Lē', rnnē':

—Bönni' Usedi, ¿bizxi ral-la' guna' para idéli'da'
 yöl-la' na'bán idú?

26 Jesús rē' lē':

—¿Bizxi caz nazúaj lu guichi lu xibá queë' Moisés?
 ¿Nacxi rusaca' quiu' lē na' rulabu'?

27 Bubi'ë didza' bönni' na', rnnē':

—Caní'rna: "Idxí'inu' Xanu' Dios idú ládxi'u, en
 len idú icja ládxi'do'o, en len idú yöl-la' run quiu',
 en len idú yöl-la' réajni'i quiu', ate' idxí'inu' bönni'
 luzó'o ca nadxí'i cuinu'."

28 Jesús rē' lē':

—Dxí'ado' bubí'u didza'. Ben caní, ate' gata'
 quiu' yöl-la' na'bán na'.

29 Tu' gú'unnē' bönni' na' ubéaj dxi'a cuinë', rē'
 Jesús:

—¿Nuzxi na' bönni' luzá'a?

30 Bubi'ë didza' Jesús, rē' lē':

—Buzē'ë tu bönni' Jerusalén, rudínnië', sa'yéajē'
 yödzö Jericó. La' nöza ni' gula'zönē' gubán lē'.
 Gula'güē' lari' nácuë', en gulunē' lē' huë'. Ní'irö
 bulu'zē'ë ni', en nucá'anagaquië' lē', chirati cazē'.

31 Ní'irö gudödē' tu bixúz la' nöza ni'. Cate' bilé'enē'
 bönni' huë' na', tsölá'alö gudödē'. 32 Gudödē' ca'

ni' tu bönni' nababë' zxí'ini xi'sóé' Leví, yugu' bönni' na' tunë' dxin que yudo'. Cate' bilé'enë' lë', tsölá'alö ca' gudödë'. ³³ Lësca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi' l ádxë'ë lë'. ³⁴ Gubígui'ë ga na' dë', ate' gulu'ë le za, en xisi uva nál-la lu huë' queë', ate' buchölinë' le lari'. Ní'irö budxié' lë' cúdzu'ba' böa' queë', en bu'ë lë' yu'u ga ta'dxinë' bönni' yú'ugaquië' nöza, ate' ni' gudapa chi'ë lë'. ³⁵ Cate' za' rení' ia'tú dza, en chizóa uzë'ë bönni' Samaria na', guléajë' l ázxjaru' que chopa dza, le bucá'anë' lu në'ë bönni' xan yu'u na', en rë' lë': "Gudapa chi'ë bönni' ni, en channö utöu' ia'lati' dumí, ubi'a neda' quiu' cate' huöda'." ³⁶ Na'a, ¿nacxi runi li? ¿Núzxilë' bönni' yonna ni gúquië' bönni' luzë'ë bönni' na' gulu'ë dö' bönni' gubán queë'?

³⁷ Bubi'ë didza' bönni' yudo' usedi na', rë' Jesús:

—Bönni' na' buéchi' l ádxë'ë lë'.

Ní'irö Jesús gudxë' lë':

—Guyéaj na'a, yöjén ca' li'.

Le benë' Jesús lídxigacanu Marta, en María

³⁸ Ní'irö bu'ë nöza Jesús, ate' bidxinë' tu yödzödo' ga ni' tu nigula lënu Marta guché'ënu Lë' lídxinu. ³⁹ Marta ni zóanu nigula zxílanu lënu María, ate' María na' gurö'ötënu ga naca xini'ë Jesús, en ruzë náganu xtídzë'ë. ⁴⁰ Marta na' bubi buguí'ínu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'i l ádxit'so' neda' tu' nucá'anabi' bi'i zxila' ni neda', ate' tuza' runa' dxin? Gudxi-bi' gácalenbi' neda'.

⁴¹ Bubi'ë didza' Jesús, rë'ë-nu:

—Marta, Marta, ruúbi ruguí'ide'enu', en zían le ruí'i ládxi'u runu'. ⁴² Tuz le run bayudxi nu gun, ate' María ni guröbi' lë na' nácatërö dxi'a, ate' lë na' guröbi' biti' udúa queëbi'.

11

Ca ral-la' ulídzaru'-në' Dios
(Mt. 6:9-15; 7:7-11)

¹ Tu dza ni' Jesús rulidzë' Dios. Cate' budxi bé'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios gü'ilentu'-në' didza', ca benë' Juan, busédinë' bönni' dá'gaquië' lë'.

² Ní'irö Jesús rë' légaquië':

—Cate' ulídzali'-në' Dios gü'ilenli'-në' didza', guli'ná:

Xuztu', zu' yehua' yubá, gá'ana zxön Lo'.

Gudá inná bë'u.

Gaca ca raza ládxi'u Li' luyú ni, ca na' raza yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu' ca netu' ca' runiti lotu' nupa tua' dö' queëtu'.

Biti' gu'u lataj si' bë' tu' xihui' netu', pero busölá netu' lu na' nu ruá' dö'.

⁵ Jesús rë' ca' légaquië':

—Channö zoë' nu bönni' ládjali', en zoë' böchi' luzë'ë, en channö huidë' ga na' zoë' guluhuëla, ate' ulidzë' lë', innë': “Böcha'a, benna quia' tsonna yöta xtila ⁶ tu' si' bidxinë' quia' böchi' luzá'a, zë'ë zi'tu', pero biti' bi dë le gu'a-në' gahuë'.”

⁷ ¿Naru' ubi'ë didza' caní bönni' na' zoë' yu'u,

guië' lë': "Biti' utsó'o neda' tu' chinayayaj yu'u, en chidélengacabi' bi'i quia' neda', ate' biti' gaca chasa' bi gunna' quiu'?" ⁸ Neda' rea' libí'ili': Salla' biti' chasë' bi unödzjë' queë' tu' náquië' böchi' luzë'ë, pero chasë', en unödzjë' queë' idutë le riquinnë' para cabirö upízxjanë' lë'. ⁹ Que lë ni na' rea' libí'ili': Guli'naba, ate' Dios gunnë' queëli'. Guli'quilaj, ate' idzöli queëli'. Buli'lidza ra' yu'u, ate' tsalaj queëli'. ¹⁰ Nu rinaba, rizí' que, ate' nu riguilaj, ridzöli que, ate' nu rulidza ra' yu'u, ralaj que.

¹¹ 'Channö zoë' nu bönni' ladjali', en náquië' xuz, ate' channö zxí'inë' inábibi' lë' yöta xtila, ¿naru' unödzjatsë' queëbi' guiöj? Channö inábibi' lë' tuba' böla, ¿naru' unödzjatsë' queëbi' bëla? ¹² Channö inábibi' lë' dxita que böra, ¿naru' unödzjatsë' queëbi' xöjnö'? ¹³ Caní naca, nácali' libí'ili' huiá' dö', pero nözili' unödzjali' quégacabi' zxí'inili' le naca dxi'a. Nácatërö löza Xúzili' zoë' yehua' yubá gunnë' queëli' Dios Bö' Lá'ayi, nülöli' inábili' Lë'.

Ta'nnë' runë' dxin Jesús len yöl-la' huáca que tu' xihui'

(Mt. 12:22-30; Mr. 3:19-27)

¹⁴ Tu dza bubéajë' Jesús bö' xihui' yu'u tu bönni', le run ga biti' raca innë'. Cate' burúaj bö' xihui' na', bë'ë didza' bönni' na' biti' guca innë', ate' bulu'bani bönachi nacua' ni'. ¹⁵ Bal-la bönachi nacua' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

¹⁶ Ia'bal-la bönachi na' gulë'ëni ila'zì' bë' Jesús, ate' gula'nabi Lë' gunë' tu le gaca bë' le za' yehua'

yubá. ¹⁷ Réquibe'enë' Jesús le ta'zá' ládxi'gaquië', ate' rë' légaquië':

—Gáti'tës ga ta'nná be'e bönachi luzë'eguequi, channö ila'rúaj choplö la' léguequisö bönachi na', ila'niti. Channö ila'rúaj choplö bönachi nacuá' tu yu'u, údxi quéguequi. ¹⁸ Lësca' caní raca que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'? ¹⁹ Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libí'ili' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'. ²⁰ Channö neda', len yöl-la' huáca queë' Dios rubéajgaca' bö' xihui', le nácatë chibidxín le rinná bë'ë Dios ga zóali'.

²¹ 'Cate' tu bönni' nál-la dë lu në'ë le rudí'inë', en rapa chi'ë lidxë', naca chi'i dërö le dë queë'. ²² Na'a, channö zë'ë ia'túë' bönni' nál-latërë' ca lë', en ucul-lë' lë', ní'irö cuë' yúgu'të le rudí'inë', lë na' ruzxöni ládxe'ë, ate' quísië' le dë queë' bönni' na'.

²³ 'Nu bití' rácalen neda', ridá'baga' neda'. Nu bití' rutúbilen neda', rusilasi nu na'.

Ca naca que bö' xihui' rudxín xilataj
(Mt. 12:43-45)

²⁴ Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguila'j ga uzí' ladxi'. Channö cabí idzöli que, inná: "Huöja' xilatja' ga ni' birúaja'." ²⁵ Cate' rudxín ni', röjxaca' bönni' na', náquië' ca tu yu'u chinulúa, en chinabá'a para nu tsöjsóa ni'. ²⁶ Ní'irö

reaj, en röjxí' ia'gadxi bö' xihui', nácacatërö xi-hui' ca le, ate' ta'yú'u bönni' na'. Na'a, le raca queë' bönni' na' nayáli'tërö ca le guca queë' zí'alö.

Le naca bica' ba le naca idú

²⁷ Tsanni ni' ru'ë Jesús didza' ni, tu nigula nútsa'nu ladaj bönachi zián na' bé'ënu zidzaj didza', rnnanu:

—Bica' ba nigula na' biá'anu Li' lë'ënu, en bica' ba ca' luchú'unu ga na' gúdxu'u.

²⁸ Bubi'ë didza' Jesús, gunné':

—Nácacatërö bica' ba nupa ta'yöni xtídzë'ë Dios, en tun ca rnna.

Ta'nábinë' Jesús gunë' le gaca bë' nuzxi náquië'
(Mt. 12:38-42; Mr. 8:12)

²⁹ Tsanni ni' ta'biga' bönachi zián ga zoë' Jesús, gusí lahuë' ru'ë didza', rnnë':

—Ta'nába bönachi tuá' dö' ni guna' le gaca bë' ga za' yöl-la' huáca quia', pero bití' bi le gaca bë' ila'lé'enë'. Tuz le gaca bë' ca na' guca queë' Jonás ila'lé'enë'. ³⁰ Ca na' guca queë' Jonás, gúquië' tu le naca bë' lógaca bönachi yödzö Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lógaca bönachi dza ni zóaru' na'a. ³¹ Cate' idxín dza ichúguië' Dios quégaca bönachi ila'guí'i ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bé'ënu bönachi dza ni'te luyú ni' dë tsölá'a ga ridödi gubidza beo' ziaga, ate' le bennu uluí'i nabága'gaca bönachi ni xíguia', tu' bídanu lënu, birúajnu ga naca zí'tu' para uduzé náganu didza' réajni'í bë'ë Salomón, bönni' gunná bé'enë' bönachi Israel, pero na'a, zoa' neda' ni, en nayëpisëtëra' ca Salomón na'. ³² Lësca' caní,

Dios uchisë' bönni' gula'cu'ë yödzo Nínive cate' idxín dza ichugu bë'ë quégaca bönachi, en uchi'a usöröë' bönachi dza ni zóaru' na'a, ate' le gulunë' ulu'i nabága'gaca bönachi ni xíguia', tu' bulu'bí'i ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayëpisëtëra' ca Jonás na'.

Le rigú'u bení' lu icja ládxi'do'oru'

(Mt. 5:15; 6:22-23)

³³ Gunnë' ca' Jesús:

—Cate' nu ruquela' guí', bití' rigú'u le ga naga-chi', en bití' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'. ³⁴ Guiøj loru' naca ca tu le rigú'u bení' lu icja ládxi'do'oru'. Channö guiøj lo' naca dxi'a, idúteo' yudzu le naca bení', pero channö naca xihui' guiøj lo', idúteo' yudzu le naca chul-la. ³⁵ Ben chi'i cuinu' na'a, para cabí huóaca chul-la lë na' rigú'u bení' lu icja ládxi'do'o. ³⁶ Caní naca, channö idúteo' nalísinu' le naca bení', en bití' bi zóalen li' le chul-la, yúgu'të ilé'enu' dxi'a ca raca cate' ruzení' quiu' guí'.

Jesús ruzégui'ë yugu' bönni' yudo' didza'

(Mt. 23:1-36; Mr. 12:38-40; Lc. 20:45-47)

³⁷ Cate' budxi bë'ë didza' ni Jesús, tu bönni' yudo' fariseo bulidzë' Lë' para tsöjtágulenë' lë'. Cate' guyázië' Jesús lidxë' bönni' yudo' na', gurö'ë rahuë'. ³⁸ Cate' bönni' yudo' fariseo na' bilé'enë' Lë', bubáninë' tu' cabí gudibi në'ë Jesús cate' si' gahuë'. ³⁹ Xanru' rë' lë':

—Libi'ili', bönni' yudo' fariseo, riguibi cuinli' ca riguibili' láhuilögaca le rë'aji ráhuili', pero lu icja

ládxi'do'oli' ruhuídi'li', en rizá' ládxi'li' le ruá' dö'.
⁴⁰ Libí'ili', bönni' biti' réajni'ili'. ¿Naru' cabí nözili',
 Nu ben le zoa láchuisö ben ca' le yu'u lé'elö? ⁴¹ Na'a,
 guli'gún gun le dë queéli', ate' ní'irö huöáca dxi'a
 yúgu'të le dë queéli'.

⁴² 'Bica' bayechi' libí'ili', bönni' yudo' fariseo.
 Riguízxjali' que yudo' tu cö' huéaj tu' chi cö' le
 rizi'ili' que xöhuéaj, en que guixi' ruda, en quégaca
 guixi' cuando', pero rudödisili' le naca tsahui', en
 yöl-la' nadxí'i queéli' Dios. Yugu' lë ni run bayudxi
 gunli', en biti' uca'anali' ia'zica' lë na' runli'.

⁴³ 'Bica' bayechi' libí'ili', bönni' yudo' fariseo.
 Rë'ënili' cö'öli' gapa naca lo lu yu'u ga rudúbili'
 rusédali' queë' Dios, en rë'ënili' ulu'lidza bönachi
 libí'ili' ba zxön gapa naca láchuilöguequi bönachi.

⁴⁴ 'Bica' bayechi' libí'ili', bönni' yudo' usedi, enca'
 libí'ili', bönni' yudo' fariseo, bönni' rulu'isö tsahui'
 cuinli', tu' nácali' ca nácagaca yeru ba quégaca
 nupa nátigaca le cabí nalá'gaca, ate' ta'dá bönachi
 láhuigaca yeru ba na', en biti' téquibe'e.

⁴⁵ Ní'irö ubi'ë didza' tu bönni' yudo' usedi
 raquië' xibá queë' Moisés. Rë' Jesús:

—Bönni' Usedi, cate' rnno' caní, netu' ca' runu'
 zi'.

⁴⁶ Jesús rë' lë':

—Bica' bayechi' ca' libí'ili', bönni' yudo' usedi
 rácali' xibá queë' Moisés, tu' rusubága'gacali'
 bönachi tu yua' zi'i le cabí gaca nu guá', pero
 libí'ili' calëga láti'do'os biti' ruláhuili' le len ná'ali'.

⁴⁷ 'Bica' bayechi' libí'ili', tu' richísali' biqui-
 taj quégaca ba ga nagáchi'gaquië' bönni' gulu'ë
 didza' uláz queë' Dios, ate' gulútië' xuz xtó'oli'
 légaquië'. ⁴⁸ Caní naca, runli' ba nalí runli' tuz

le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biquitaj quégaca ba ga nagáchi'gaquië'.

⁴⁹ 'Que lë ni na', lu yöl-la' réajni'i queë', Dios gunné' caní: "Isöl-la'a queëli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia na'li' légaquië'." ⁵⁰ Caní gunë' Dios tu' uchi'a usöröë' quégaca bönachi dza ni zóaru' na'a, ni'a que rön quégaca yúgu'të bönni' gulu'ë didza' uláz queë', bönni' ni' bëtigaca bönachi légaquië' cate' gusí lo rata' yödzölió, ⁵¹ ga gusí lo nu bëti Abel, ga bidxintë gulútië' Zacarías, bönni' na' gulútië' gatsaj láhui'lö ga dë bucugu lá'ayi ga na' tu'zégui'gaquië'-ba' böa' bédxido' lahuë' Dios, en ga dë lataj lá'ayi. Que lë ni na', rea' libí'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.

⁵² 'Bica' bayechi' libí'ili', bönni' yudo' usedi, rácali' xibá queë' Moisés. La' libí'isili' dë lu ná'ali' xzí'ini guié que lataj ga ta'dzöli bönachi yöl-la' réajni'i. Libí'ili' biti' riyázali', ate' ruzága'li' xinözigaca nupa tē'ëni ila'yaza.

⁵³ Cate' Jesús budxi bé'lenë' légaquië' didza' ni, bönni' yudo' tu'sédinë', en yugu' bönni' yudo' fariseo gula'léde'enë' Lë', ate' gula'sí lógaquië' ta'naba yúdxide'enë' Lë' ca naca zían le taca, ⁵⁴ en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

12

Rusédinë' Jesús ca naca yöl-la' rulu'isö tsahui'

cuini

¹ La' dza na' bulu'dubi zían gayuá' bönachi ga zoë' Jesús ga bidxintë ta'rölisö luzë'eguequi bönachi na'. Ní'irö gusí lahuë' Jesús rë' yugu' bönni' usëda queë cazë', rnnë':

—Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, le naca yöl-la' rulu'isö tsahui' cuini quégaquië'. ² Biti' bi dë le naca balándo'os le cabí ilá' lahui, en bití' bi dë le nagachi' le cabí gaca bë'. ³ Que lë ni na', yúgu'të le chigunnáli' ga naca chul-la, ila'yöni bönachi ga naca lu bení', ate' didza' bë'ëli' bagáchi'sö ga guzóa lu yu'u nayayaj, gaca libán que ga naca lógaca bönachi.

*Nu ral-la' gádxiru'**(Mt. 10:28-31)*

⁴ Gunnë' ca' Jesús:

—Böcha'ado', rea' libí'ili': Biti' gádxili' bönni' tütigaquië' bönachi, ate' tödi na' bítirö' bi gaca ilunë' quéguequi. ⁵ Ulu'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queëli', en tödi na' dë lu në'ë yöl-la' unná bë' chú'unë' libí'ili' lu guí' gabila. Ön, rea' libí'ili', guli'gadxi Nu na'.

⁶ 'Túti'gaquië'-ba' gáyu'ba' biguínido' len chopá dumí lásido'. Biti' ral-la láchë'ë-ba' Dios tu biguínido' na'. ⁷ Lësca' caní, yúgu'të guitsa' ícjali' nabábagaca lahuë' Dios. Que lë ni na', bití' gádxili'. Nazáca'tëröli' libí'ili' ca zianba' biguínido'.

*Nupa ta'nnasö néquiquequi queë' Jesús**(Mt. 10:32-33; 12:32; 10:19-20)*

⁸ Gunnë' ca' Jesús:

—Rea' libí'ili': Yúgu'të bönni' ta'nnë néquiguequinë' quia' neda' lógaca bönachi, lësca' neda', Bönni' Guljë' Bönachi, innía' néquiguequinë' quia' lógaquië' gubáz lá'ayi queë' Dios, ⁹ ate' bönni' ta'dá'baguë'ë néquiguequinë' quia' lógaca bönachi, lësca' neda' tá'baga'a néquiguequinë' quia' lógaquië' gubáz lá'ayi queë' Dios.

¹⁰ 'Yúgu'të nupa bi ila'nnë quia' neda', Bönni' Guljë' Bönachi, gaca uniti lahuë' Dios léguequi, pero nu innë zi' queë' Dios Bö' Lá'ayi, biti' uniti lahuë' Dios nu na'.

¹¹ 'Cate' ila'chë'ë libí'ili' gapa naca lu yu'u ga tu'dubë' bönni' judío, en tu'sedë' queë' Dios, en lógaquië' bönni' ulu'chi'a ulu'söröë' libí'ili', en lógaquië' bönni' dë lu ná'agaquië', biti' ubi uguí'ili' nacxi gunli' o bizxi didza' ubí'ili', o bizxi innali'. ¹² La' dza ná'asö usédinë' Dios Bö' Lá'ayi libí'ili' le ral-la' innali'.

Huáca gun yöl-la' tsahui' queëru' ga gal-la ládxi'ru'-në' Dios

¹³ Tu bönni' nútsë'ë ladaj bönachi zián na' rë Jesús, rnnë':

—Bönni' Usedi, gudxë' böcha'a gunnë' uláz quia' le guta' queë' xuztu'.

¹⁴ Jesús rë' lë':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queë'li'?

¹⁵ Ní'irö Jesús gudxë' bönachi nacua' ni', rnnë':

—Buli'yútsöca'. Guli'gún chi'i cuinli' para cabí uhuídi'li'. Le uzi'ë xibé nu bönni' biti' nácasö le zián le dë queë'.

¹⁶ Ní'irö Jesús bë'lenë' légaquië' didza', bucúdzu'ë didza', rnnë':

—Zoë' tu bönni' rilé'enë' yöl-la' tsahui' queë', ate' runödzejada' gulapa lu xiyúë'. ¹⁷ Ní'irö guzá' ládxe'ë bönni' na', rnnë': "¿Nacxi guntsa'? Biti' dë ga gapa chi'a le rulá' quia'." ¹⁸ Ní'irö rnnë': "Caní guna'. Uquínnajgaca' yu'u ga rapa chi'a le rulá' quia', ate' guna' yugu' yu'u zxöntëro ca', ate' gapa chi'a le rulá' quia' ni', len yugu' le dë quia'. ¹⁹ Ní'irö gaca guié' cuina': Chidëda' quia' zían le chinutuba', le gáhuida' zían iz. Uzí' ládxa'a. Gu'aj gahua', en udzëjada'." ²⁰ Ní'irö Dios rë' lë': "Li', bönni' bití' bi nõzinë'. Na'a dzö' gátíu'. Na'a, ¿nuzxi caz guequi que, lë na' chinutubu'?" ²¹ Caní' raca queë' bönni' rutubë' la' queëzë' yöl-la' tsahui', en bití' runë' le naca ca yöl-la' tsahui' lahuë' Dios.

*Dios run chi'ë yugu' bönachi queë'
(Mt. 6:25-34)*

²² Gudödi ni' Jesús gudxë' yugu' bönni' usëda queë', rnnë':

—Que lë ni na' rea' libí'ili': Biti' ubi uguí'ili' ni'a que le guí'aj gáguli', lë na' nabánili', o ni'a que lari' gáculi'. ²³ Nácarö lesaca' yöl-la' na'bán queëli' ca le ráguli', ate' nácarö lesaca' idú le nácali' ca lari' ráculi'. ²⁴ Bulí'yutëz ca raca quégacaba' boíquiaj. Biti' tázaba', en bití' ta'lápaba', en bití' nacuá' quégacaba' ga ilún chí'iba' le rulá' quégacaba', pero Dios rugahuë' légacaba'. ¿Naru' cabí nazáca'tëröli' libí'ili' ca yugu' biguínnido'? ²⁵ ¿Nuzxi caz bönni' ládjali' gaca gunë' ga soë' ibanë' ia'tú chí'ido'os tu' ruúbi rugu'í' ládxi'da'ahuë'? ²⁶ Que lë ni na', channö cabí gaca gunli' lë ni naca cuídi'sö, ¿bizx que ruúbi rugu'í'ili' ni'a que le naca zxöntëro?

²⁷ 'Buli'yutëz ca ta'zxõn yõjdo'. Biti' tun du lari', en bití' taba lari', pero rea' libí'ili', bití' gúcarõ lachi le gúcuë' Salomón ca nácagaca yõjdo' ni, sal-la' gúta'da' yõl-la' tsahui' queë'. ²⁸ Channõ Dios runë' lachi yõj guíxi'do' rõ'gaca na'a la' guixi', ate' cuxõ huidzaj ila'gu'ë léguequi lu guí', çnaru' cabí gunë' le nácáro dxi'a queëli', libí'ili' na' bití' réajlë'ëli' Dios idú ládxi'li'? ²⁹ Que lë ni na', bití' gú'i ládxi'li' le ral-la' gáguli', en le ral-la' guí'jali', en bití' ubi uguí'i ládxi'do'oli'. ³⁰ Yúgu'të lë ni ta'guilaj bõnachi yõdzölió ni, pero chinõz quézinë' Xúzili' Dios le riquínili'. ³¹ Guli'güí' ládxi'li' tsú'uli' ga rinná bë'ë Dios, ate' yúgu'të lë ni cu'ë xinõza queëli'.

*Yõl-la' tsahui' rigú'uru' yehua' yubá
(Mt. 6:19-21)*

³² Gunnë' ca' Jesús:

—Biti' gádxili', libí'ili' na' nácali' bö'cu' zxíla'do' quia'. Nabábasili' zóali', pero raza ládxe'ë Xúzili' Dios gunnë' queëli' lataj tsú'uli' ga ni' rinná bë'ë Lë'. ³³ Guli'guti' le dë queëli', en buli'nõdzaj quégaca bõnachi yechi'. Caní gaca, gunli' queëli' yõxaj dumí le cabí gaca ditaj, en cú'uli' yõl-la' tsahui' na' yehua' yubá le bití' ubidxi udú, ga ni' bití' idxinë' bõnni' gubán, en bití' usunítiba' böa'do' le. ³⁴ Ga ni' dë yõl-la' tsahui' queëli', ni' gü'i ládxi'li' idxinli'.

Ral-la' sóaru' ban ladxi'

³⁵ Gunnë' ca' Jesús:

—Guli'sóa sina', en guli'quela' guí' le uzení queëli'. ³⁶ Guli'gaca ca bõnni' huen dxin ta'bözë' dza huödë' xángaquie', bõnni' sa'yéajë' laní que yõl-la' rutsaga na', para cate' udxinë', en ulidzë', la'

ila'sáljatë' queë' tsu'ë. ³⁷ Bica' bágaca huen dxin na' ila'cu'ë ban ladxi' cate' huödë' xángaquië'. Le nácatë rea' libí'ili', upá'a cuinë' xángaquië' na', ate' gunë' ga ila'bö'ë ga ilahuë', ate' cu'ë le ilahuë'. ³⁸ Sal-la' huödë' cate' chiral-la o idú guluhuëla, channö idixáquië' légaquië' nacu'ë ban ladxi', bica' bágaca huen dxin na'. ³⁹ Lë ni ral-la' inözili'. La'tu' nözinë' xan yu'u bizxi dza huadxinë' bönni' gubán, usubán ládxë'ë, en biti' gu'ë lataj bönni' na' udxíë' yeru lidxë', para cabí cuanë' le dzö'ö lidxë'. ⁴⁰ Que lë ni na', guli'sóa ban ladxi' ca' libí'ili', tu' huöda' neda', Bönni' Guljë' Bönachi, tu dza biti' ribözali' neda'.

Bönni' huen dxin tsahui', en bönni' huen dxin biti' náquië' tsahui'

(Mt. 24:45-51)

⁴¹ Ní'irö Pedro gunábinë' Jesús, rnnë':

—Xan, ¿naru' reo' nétu'sö lë ni rucúdz'u didza', o reo' ca' caní yúgu'të bönachi?

⁴² Rë' Xanru' lë':

—¿Nuzxi na' bönni' huen dxin tsahui', en réajni'inë', dë lu në'ë uláz queë' xanë'? Bönni' ni, xanë' udödë' lu në'ë lidxë' para cate' gála'rö ilahuë' bönni' nacu'ë lidxë', gu'ë que queëgaquië' le ilahuë'. ⁴³ Bica' ba bönni' huen dxin na' cate' huödë' xanë', idixáquië' lë' runë' caní dxin na' nudödë' lu në'ë. ⁴⁴ Le nácatë rea' libí'ili', udödë' xanë' lu në'ë bönni' huen dxin tsahui' na' idutë le dë queë'. ⁴⁵ Channö guéquinë' bönni' huen dxin na' huadzenë' huödë' xanë', ate' isí lahuë' gu'ë dö' quégaquië' ia'zica'rë' huen dxin, bönni' en nigula, en isí lahuë' gu'aj gahuë', en súdxinë', ⁴⁶ ní'irö huödë' xanë' bönni' huen dxin na' cate' biti' ribözë'

lë', en cate' biti' réquibe'enë', ate' usaca' zi'ë bönni' huen dxin biti' náquië' tsahui' na', en ichúguië' queë' qui'i sáquië' ca narugu quégaquië' bönni' biti' ta'yéajlë'ë.

⁴⁷ 'Bönni' huen dxin na' nözinë' le ré'ënë' xanë', en biti' zoë' sina', en biti' runë' ca rnnë' xanë', bönni' ni, quínitë'rë' xanë' lë'. ⁴⁸ Channö cabí nözinë' tu bönni' huen dxin le ré'ënë' xanë', en gunë' le gun ga ibáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni ládxe'ë lë' le zxön, le zxöntë'rö ca' unabë' xanë' lu në'ë bönni' huen dxin na'.

Le náquië' Jesús gun ga ila'rúaj choplö bönachi
(Mt. 10:34-36)

⁴⁹ Gunnë' ca' Jesús:

—Bida' neda' dujéna' ga tsegui guí' yödzölió ni, en caba ládxa'a chinaguéla' guí' na'. ⁵⁰ Na'a, dë tu le ral-la' qui'i saca'a le naca ca tu le idílida' nisa, ate' rö'a böniga ga idxintë gaca caní quia'. ⁵¹ ¿Naru' réquili' bida' dulequi dxía' le raca yödzölió ni? Rea' libí'ili': ¡Calëga! Bida' duléquia' le gun ga ila'rúaj choplö bönachi. ⁵² Na'a isí lo ulu'lá'alén luzé'eguequi gayu' bönachi nacua' tu yu'u. Tsonné' ila'dá'baguë'ë chopë' nazí'igaquië' xtídza'a, ate' chopë' na' ila'dá'baguë'ë tsonné' na'. ⁵³ Nu bönni' zóabi' bi'i bönni' queë' tá'baguë'ë xzí'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queënu tá'baga'nu xzí'ininu na', ate' bi'i nigula na' tá'baga'bi' xiná'abi'. Nigula zóanu nigula zxoa' lídxinu tá'baga'nu zxoa' lídxinu na', ate' nigula zxoa' lídxinu na' tá'baga'nu xto' xzí'ininu.

*Le nácagaca bë' le taca na'a dza**(Mt. 16:1-4; Mr. 8:11-13)*

⁵⁴ Jesús gudxë' ca' bönachi zián nacuá' ni', rnnë':
 —Cate' rilé'eli' za' böaj saca' ga ribía gubidza, la'
 rnnátëli': "Hualaj guiöj", ate' caní raca. ⁵⁵ Cate'
 recja bö' za' saca' ga ridödi gubidza beo' ziaga,
 rnnali': "Udzá'a na'a", ate' caní raca. ⁵⁶ Libí'ili',
 bönni' rulu'ísö tsahui' cuinli'. Nözili' le rulu'í le
 raca lúzxiba, en le raca luyú ni, pero bití' réquibe'eli'
 le rulu'í le nácagaca bë' taca dza ni zóaru' na'a.

*Ral-la' ugá' analenru' tsahui' nu rilé rë'u**(Mt. 5:25-26)*⁵⁷ Gunnë' ca' Jesús:

—¿Bizx que bití' ruchi'a rusöröli' la' libí'isili' ca
 naca le naca tsahui'? ⁵⁸ Channö zoa nu bi un-
 abi yudxi li', ate' zéajli' idxinli' yúlahui', bë' ladxi'
 ugá' analenu' tsahui' nu na' tsanni ni' yú'uli' nöza,
 para cabí uzegui li' lahuë' bönni' uchi'a usöröë'
 libí'ili', ate' bönni' uchi'a usöröë' na' udödë' li'
 lu në'ë bönni' rusayjë' lidxi guië, ate' bönni' na'
 rusayjë' lidxi guië cu'ë li' lidxi guië na'. ⁵⁹ Rea' li',
 bití' uruju' ni' cate' údxirö quizzju' yúgu'të dumí
 lásido' ral-lu'u que nu na'.

13*Run bayudxi ubí'i ládxi'ru'*

¹ La' dza ní'sö bila'dxinë' bönni' ta'guíxjöi'inë'
 Jesús ca benë' Pilato, bëtië' bal-lë' bönni'
 Galilea, en guzxi'ë rön quégaquië', le bugútsi'në'
 xichöngacaba' böa' bëdxi chigulútië' léga'caba' para
 ila'gu'ë xichöngacaba' na' lahuë' Dios. ² Bubi'ë
 didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'z'íca'rë' bönni' Galilea, tu' gula'gu'íi gula'zaquië' caní? ³ Rea' lib'í'ili': ¡Calëga! Channö cabí ubí'i ládxi'li', nítili' ca' yúgu'tëli'. ⁴ Lësca' caní guca quégaquië' chizxunë' bönni' ni', yöjbaga' yu'u sibi na' nazí'i le Siloé légaquië', ate' gulátie'. ¿Naru' réquili' gula'bága'tërë' légaquië' xíguia' ca ia'z'íca'rö bönnachi nacué' Jerusalén? ⁵ Rea' lib'í'ili': ¡Calëga! Channö cabí ubí'i ládxi'li', nítili' ca' yúgu'tëli'.

Rucúdzu'ë didza' Jesús que yaga higo biti' bi ribía

⁶ Ní'irö bucúdzu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyüë'. Röjtiljë' le ribía yaga na', pero biti' bi ridzölinë'. ⁷ Ní'irö gudxë' bönni' runë' dxin lu xiyüë' na', rnnë': “Chiguca tsonna iz rida' rududilja' le cuía yaga higo ni, en biti' bi ridzö'lida'. Guchugu le. ¿Bizx que run nigui luyú ni?” ⁸ Ní'irö bubí'ë didza' bönni' huen dxin na', rë' lë': “Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani. ⁹ Channö cuía yaga ni, gaca dxi'a, pero channö cabí bi cuía, ní'irö ichugu' le.”

Ruúnë' Jesús tu nigula ré'enu cate' naca dza lá'ayi

¹⁰ Tu dza rusédinë' Jesús bönnachi nacué' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quégaquië'. ¹¹ Zóanu tu nigula ni' chiguca chizxunu' iz ré'enu, tu' yu'u lënu bö' xihui' run ga te'e bönnachi, ate' nayéchutica'sinu ridanu, en biti' ca' raca ulí cuinnu. ¹² Cate' bilé'enë'-nu Jesús, bulidzë'-nu, rnnë':

—Nigúlado', chiböácu' que yödzöhuë' quiu'.

13 Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba. 14 Ní'irö gulénë' bönni' lo que yu'u ga na' tu'dubë' tu'sëdë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacuá' ni', rnnë':

—Xopa dza nacuá' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

15 Ní'irö bubí'ë didza' Xanru', rnnë':

—Libí'ili', bönni' rulu'isö tsahui' cuinli', ¿naru' cabí rusédxigacali'-ba' böa' bëdxi que queëli' ga na' dá'gacaba' cate' naca dza lá'ayi, ate' tsöjuá'agacali'-ba' para ilé'ajba' nisa? 16 Nácanu nigula ni xzí'ini xi'sóë' Abraham, ate' idú chixxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

17 Cate' bë'ë didza' ni Jesús, bulu'tuí'inë' yúgu'të bönni' nacu'ë ni' ta'lenë' Lë', pero bulu'dzeja ia'zica'rö bönachi, yúgu'të nupa nacuá' ni', tu' ta'lé'enë' yugu' le zxön runë' Jesús.

*Rucúdzu'ë didza' Jesús que xisedo' mostaza
(Mt. 13:31-32; Mr. 4:30-32)*

18 Ní'irö rnnë' Jesús:

—¿Nacxi caz raza rizxön le rinná bë'ë Dios, o bizxi uséqui'tseru' le? 19 Raca ca raza que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxön yaga mostaza na', en guca ca tu yaga zxön, ate' bila'dxinba' biguínido', gulunba' xcá'agacaba' lu ni'a në'e yaga mostaza na'.

*Rucúdzu'ë didza' Jesús que cúa zi que yöta xtila
(Mt. 13:33)*

²⁰ Lësca' caní rnnë' Jesús:

—¿Bizxi caz uséqui'tseda' le rinná bē'ë Dios?

²¹ Naca ca cúa zi que yöta xtila, le guzxí'ínu tu nigula, en bugútsi'nu tsonna cö' cúa yöta xtila, ate' guyazxaj idútë cúa na'.

*Tu ga tödiru' le naca guído'
(Mt. 7:13-14, 21-23)*

²² Tsanni ni' yu'ë nöza Jesús, sa'yéajë' Jerusalén, ridödë' yugu' yödzö zxön, en yugu' yödzödo', ate' rusédinë' bönachi nacua' gapa na'. ²³ Tu bönni' zoë' ni' gunábinë' Jesús, rnnë':

—Xan, ¿naru' nabábasö nupa ulu'lágaca?

Jesús rë' nupa nacua' ni', rnnë':

²⁴ —Guli'gü'i ládxi'li' tsú'uli' saca' ga nu ridödi le naca guído', tu' rea' libí'ili': Zián nupa ilé'ëni ila'yaza ni', pero bití' ila'zéqui'në'. ²⁵ Tödi chasë' Xan yu'u, en usayjë' yu'u, isí loli' libí'ili' na' zóali' ní'ilö ulídzali'-në' ra' yu'u na', ate' guiéli'-në': “Xan, Xan, gusalaj queëtu'.” Ní'irö ubi'ë didza' Lë', en guié' libí'ili': “Bití' nözda' nuzxi libí'ili'.”

²⁶ Ní'irö isí loli' innali': “Gü'i gudágulentu' Li', ate' busédinu' gapa naca lu yë'ëyi queëtu'.” ²⁷ Ní'irö guié' libí'ili': “Rea' libí'ili', bití' nözda' gazxi bönachi libí'ili'. Guli'cuíta ga zoa', yúgu'tëli' ruá'ali' dö'.”

²⁸ Ní'irö cödxí yéchi'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'të bönni' gulu'ë didza' uláz queë' Dios, nacué' ga ni' rinná bē'ë Dios, pero libí'ili' sóali' ní'ilö.

²⁹ Ila'dxín bönachi ila'rúaj saca' ga rilén gubidza, en saca' ga ribía gubidza, en saca' ga za' bö' ziaga,

en saca' ga ridödi gubidza beo' ziaga, ate' ila'bö'ë ilahuë' ga ni' rinná bē'ë Dios. ³⁰ Ní'irö ilaca lo bal-la bönachi nácagaca cá'asö na'a, ate' ulu'gá'ana cá'asö bal-la nupa nácagaca lo na'a.

Ribödxí yechë'ë Jesús ni'a quégaca bönachi Jerusalén

(Mt. 23:37-39)

³¹ La' dza ní'isö bila'dxinë' bal-la bönni' yudo' fariseo ga zoë' Jesús en tē' Lē':

—¡Burúaj! ¡Buzxunnaj ni! ¡Rē'ënē' Herodes gútiē' Li'!

³² Jesús rē' légaquiē':

—Guli'tséaj, guli'tsöjödxë' bönni' na' náquiē' ca tuba' böza', innali': "Buyútsöca', rubéajgaca' bö' xihui', en ruúna' bönachi na'a, en cuxö, en cate' gaca lidzaj, údxi guna' dxin quia'." ³³ Run bayudxi tséajlensa' ca' nöza na'a, en cuxö, en huidzaj, ate' idxina' Jerusalén, tu' tútigaquiē' bönni' tu'ë didza' uláz queë' Dios ni'.

³⁴ 'Libí'ili', zóali' Jerusalén. Rútigacali'-nē' bönni' tu'ë didza' uláz queë' Dios, en ruládxí'gacali'-nē' guiöj bönni' gubáz risöl-lē'ë Dios ga zóali'. Cate' xö zían luzuí gú'unida' utuba' libí'ili' quia' ca runba' yöjede, rutúbiba' börado' queëba' zzan xíliba', pero bití' gú'unili'. ³⁵ Buli'yútsöca', cá'asö ugá'ana lídxili', ate' rea' libí'ili', bíti'rö ilé'eli' neda' cate' idxinrö dza innali': "Bica' ba Nu na' za' uláz queë' Xanru'."

14

Ruúnē' Jesús tu bönni' ré'enē' huë' gui

¹ Cate' naca dza lá'ayi quégaquië' bönni' judío, guyu'ë Jesús lidxë' tu bönni' unná bë', bönni' yudo' fariseo. Rö'ë Jesús rahuë', ate' nacu'ë bönni' yudo' fariseo ni' ta'në'ë Lë'. ² Zoë' ca' tu bönni' ré'enë' huë' gui ga na' zoë' Jesús. ³ Ní'irö Jesús gunábinë' bönni' yudo' usedi táquië' xibá queë' Moisés, en yugu' bönni' yudo' fariseo, rnnë':

—¿Naru' dë lataj unru' nu re'e cate' naca dza lá'ayi?

⁴ Légaquië' bulu'sayaj ruá'agaquië'. Ní'irö Jesús gudélë'ë bönni' huë' na', en bunë' lë', ate' la' busöl-la'të' lë'. ⁵ Ní'irö Jesús rë' yugu' bönni' yudo' na', rnnë':

—Channö nu bönni' ladjali' nacuá'aba' queë' böa' bëdxi, ate' ibíxiba' tuba' lu yeru, ¿naru' cabí tsöjléajtë'-ba', sal-la' naca dza lá'ayi?

⁶ Biti' bi didza' guca ulu'bi'ë ca naca lë ni.

Nu cö' lataj lo

⁷ Cate' bilé'enë' Jesús ca tunë' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúdzu'ë didza', ate' rë' légaquië':

⁸ —Cate' nu bönni' ulidzë' li' guídu' ga raca laní que yöl-la' rutsaga na', biti' cö'u lataj lo. Nadxi ca' nulidzë' ca' tu bönni' nácatërë' lo ca li'. ⁹ Ní'irö bönni' na' bulidzë' li' huidë' ga zu', en guíë' li': “Bë' lataj bönni' ni cö'ë ga zu'”, ate' ní'irö lu yöl-la' rutuíi quiu' tsöjchö'u zxánitëlö. ¹⁰ Que lë ni na', cate' nu bönni' ulidzë' li', guyéaj yöjchö' zxánitëlö, para cate' idxinë' bönni' na' bulidzë' li', huë' li': “Böcha'a, gudödi ia'lati' nilö.” Ní'irö gácaru' li' lo lógaca nupa ta'bö'len li' tsözxön. ¹¹ Nu run ba zxön cuini, ilunë' ga huöta' huöxaj, pero nu zoa nöxaj ladxi', ilunë' ga gácarö lo nu na'.

12 Jesús rē' ca' bönni' na' bulidzē' Lē', rnnē':

—Cati' gunu' tu gü'i huagu o tu lanído', biti' ulídzagacu'-nē' yugu' böchi' luzó'o, en yugu' bönni' böchu'u, en yugu' di'a dza quiu', en dzaga yu'u quiu' ta'lé'enē' yöl-la' tsahui' quégaquiē', tu' ulu'lidzē' ca' li', ate' caní gaca, ubí'i quiu'. 13 Cate' gunu' tu gü'i huagu, bulidza yugu' bönachi yechi', en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la. 14 Ní'irö gacu' bica' ba, tu' cabí gaca bi ulu'bi'ē bönni' caní quiu', pero ubí'i quiu' cate' idxín dza ulu'bán nupa gulún le naca tsahui', en gulátigaca.

Rucúdzu'ē didza' Jesús que tu laní zxön

15 Cate' tu bönni' rö'ē rágulenē' Jesús biyönnē' didza' ni, rē' Lē':

—Bica' ba nu gagu ga ni' rinná bē'ē Dios.

16 Jesús rē' lē':

—Zoē' tu bönni' benē' laní zxön, ate' zían nupa bulidzē'. 17 Cate' chinabá'a la' huagu, gusól-lē'ē bönni' huen dxin queē' tsöjödxe' nupa na' chinulidzē', gunné': “¡Guli'dá! ¡Yúgu'tē chinabá'a!” 18 Gula'sí lógaquiē' yúgu'tē' ta'nabē' lataj cabí tsöjáquiē'. Bönni' zí'alö na' rnnē': “Si' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj.” 19 Ia'tué' rnnē': “Si' guzxi'a gayu' nözaba' bēdxi, ate' tsöjzxi' bē'a lé'gacaba' ugúngaca'-ba' dxin. Ráta'yua' lo' gunnu' neda' lataj.” 20 Ia'tué' rnnē': “Si' butsaga na'a, en que lē' ni na' biti' gaca guída'.” 21 Cate' böajē' bönni' huen dxin na', yöjtíxjöi'inē' xanē' yúgu'tē lē' ni. Ní'irö gulénē' bönni' xan yu'u na', ate' gudxē' bönni' huen dxin na', rnnē': “Guyéajtē na'a gapa naca lu yē'ēyi,

en gapa naca la' nōza que yōdzō ni, ate' ichē'u yugu' bōnachi yechi' ni, en nupa nabixi ni'a ná'agaca, en nupa bití' raca sá'gaca, en yugu' bōnni' lo chulla." ²² Cate' chinunē' bōnni' huen dxin na' caní, rnnē': "Xan, chibena' ca na' gunná bé'enu' neda', ate' ni dē lataj." ²³ Ní'irō xanē' gudxē' bōnni' huen dxin na', rnnē': "Guyéaj gapa naca la' nōza, en gapa naca nōza lasi, ate' ben bayudxi guídigaca nupa nacuá' ni' para ilí lidxa', ²⁴ tu' rea' libí'ili': Bití' gahuē' que laní quia' nitúē' bōnni' ni' bulidza' zí'alō."

Le sáca'ru' cate' zéajlenru'-nē' Cristo

²⁵ Yugu' dza ni' rōjácalen Jesús bōnachi zían, ate' buécjē' Jesús, en rē' légaquiē':

²⁶ —Channō guídalenē' neda' tu bōnni', en bití' idxí'irōnē' neda' ca nadxí'inē' xuz xinē'ē, en nigula queē', en yugu' zxí'inē', en yugu' bi'i bōchē'ē, en yugu' bi'i zanē', en yōl-la' na'bán queē', bití' gaca gáquiē' bōnni' usēda quia'. ²⁷ Nu bōnni' bití' gáquiē' ca tu bōnni' sa'yéajē' sōjtē'ē lē'e yaga cruz, ate' tē'ē neda', bití' gaca gáquiē' bōnni' usēda quia'.

²⁸ Channō zoē' nu bōnni' ladaj libí'ili' guē'ēnnē' gunē' tu yu'u zían cuía, ¿naru' cabí cō'ē zí'alō ulabē' gáca'xi dumí ral-la' utōē' para inōzinē' channō dē queē' tsca le riquinnē' para údxi gunē' yu'u na'?

²⁹ Channō cabí gunē' caní, en isí lahuē' cuéquiē' xilibi yu'u na', ate' bití' gaca údxi gunē' yu'u na', ní'irō ila'sí lógaca yúgu'tē nupa ila'lé'e le ulu'titaj lē', ³⁰ ila'nná: "Bōnni' ni gusílahuē' runē' yu'u, pero bití' guca údxi gunē' le." ³¹ Lēasca' caní, channō zoē' nu bōnni' rinná bē'ē, en ral-la' tsejē' gudil-la tsōjtíl-lalenē' ia'túē' bōnni' rinná bē'ē, ¿naru' cabí

cö'ë zí'alö, en cuéqui icjë' channö séqui'në' tsöjtíl-lalenë' bönni' ni' nachë'ë galaj milë' bönni', ate' lë' chi milsë' bönni' nachë'ë? ³² Channö cabí séqui'në', cate' ni' zoë' zi'tu' ia'túë' bönni' na' rinná bë'ë, isöl-lë'ë bönni' gubáz queë', ate' inábinë' lë' nacxi ral-la' gunë' para ulu'dzáguië' dxi'a. ³³ Caní naca, channö zoë' nu bönni' ladaj libí'ili' bití' ucá'anë' yúgu'të le dë queë', bití' gaca gáquië' bönni' usëda quia'.

Zödi' le naniti yöl-la' siná'a que

(Mt. 5:13; Mr. 9:50)

³⁴ Gunnë' ca' Jesús:

—Dxi'a naca zödi', pero channö initi yöl-la' siná'a que, ¿nacxi gaca úniru' le siná'a? ³⁵ Bítí'rö nazaca' zödi' na', calëga para luyú, en calëga para ga rirú'uniru' bëbu, pero chú'unaru' le ní'ilö. Nu zoa nagui, en riyöni, ral-la' uzë nagui nu na'.

15

Rucúdzü'ë didza' Jesús ca naca queëba' bö'cu' zxila' gunitiba'

(Mt. 18:10-14)

¹ Bulu'dubë' yúgu'të bönni' tu'quízxjë' lázagaca bönachi, en yugu' bönni' cá'asö ga zoë' Jesús para ulu'zë náguië' Lë'. ² Que lë ni na' yugu' bönni' yudo' fariseo, en yugu' bönni' yudo' usedi gula'nnë' queë' Jesús, ta'nnë':

—Bönni' ni runë' bal yugu' bönni' dul-la', en rágulenë' légaquië'.

³ Ní'irö bucúdzü'ë didza' Jesús, rë' légaquië':

⁴—Channö zoë' tu bönni' ladaj libí'ili', nacué'aba' queë' tu gayuá'aba' bö'cu' zxila', en channö nítiba' tuba', ¿naru' cabí ucá'anë' ia'zíca'röba' tápalalaj

yu' chënnaba' na' ga naca lu lataj cá'asö, ate' tsejë' tsöjdiljë'-ba' bö'cu' zxila' na' nanítiba', cate' udzölrönë'-ba'? ⁵ Cate' udzölinë'-ba', lu yöl-la' rudzeja queë' ixóë'-ba' ya' zxicjë', ⁶ en cate' udxinë' lidxë' utubë' yugu' böchi' luzé'ë, en yugu' dzaga yu'u queë', ate' guië' légaquië': "Buli'dzëjalen neda', tu' chibudzölıda'-ba' bö'cu' zxila' quia' gunitiba'." ⁷ Rea' libí'ili': Lësca' caní gácatëro yöl-la' rudzeja yehua' yubá ni'a queë' tuë' bönni' dul-la' ubí'i lădxë'ë ca gaca quégaquië' tápalalaj yu' chënnë' bönni' tsahui', bönni' téquinë' biti' naquíniguequinë' ulu'bí'i lădxi'gaquië'.

Rucúdzu'ë didza' Jesús que tu dumí guniti

⁸ Rnnë' ca' Jesús:

—Channö zóanu tu nigula, dë queënu chi dumí plata, en channö initi tu dumí plata na', ¿naru' cabí uquéla'nu guí, ate' ulúanu yu'u, uguilaj yúdxinu le cate' udzölrönu le? ⁹ Cate' udzölinu le, utúbinu yugu' nigula luzá'anu, en yugu' nigula dzaga yu'u queënu, ate' guiënu légacanu: "Buli'dzëjalen neda', tu' chibudzölıda' dumí plata na' guniti." ¹⁰ Rea' libí'ili': Lësca' caní, ulu'dzëjade'erönë' gubáz lá'ayi queë' Dios ni'a queë' tuë' bönni' dul-la' ubí'i lădxë'ë.

Rucúdzu'ë didza' Jesús queëbi' tu bi'i gunitibi'

¹¹ Rnnë' ca' Jesús:

—Zoë' tu bönni' nacuá'abi' chópabi' bi'i bönni' queë'. ¹² Bi'i cuidi' na' rëbi'-në' xúzibi': "Dad, benna quia' le dë quiu' le ral-la' guequi quia'." Ní'irö xúzibi' na' gudísië' quégacabi' le dë queë'. ¹³ Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzo zı'tu', ate' ni' butöbi' dërö le dë queëbi'. Le ruá' dö' benbi'. ¹⁴ Cate'

chibutöbi' dëro le dë queëbi', guca gubín lu yödzo ga na' zóabi', ate' biyadzaj queëbi'. ¹⁵ Ní'irö guyéajbi' yöjsóabi' huen dxin queë' tu bönni' lu yödzo ni', ate' bönni' na' gusöl-lë'ë-bi' ga dë xiyúë' tsöjgágubi'-ba' yugu' cuchi queë'. ¹⁶ Guca láchxi'bi' gágubi' guixi' cá'asö na' táguba' cuchi, pero cuntunu bi bë' le gágubi'. ¹⁷ Ní'irö bubí'i láchxi'bi', rnnabi': "Cate' xö bönni' huen dxin nacu'ë lidxë' xuzá', en dëda' le tahuë', pero neda' ni huáti caza' yöl-la' ridún. ¹⁸ Uzá'a ni, huöja' ga zoë' xuzá', en tsöjödxa-në': Dad, bena' dul-la' lahuë' Dios, zoë' yehua' yubá, en lo' li'. ¹⁹ Bítirö naca' neda' lesaca' gaca' xzí'ínu'. Ben neda' ca bönni' huen dxin quiu'." ²⁰ Ní'irö guyú'ubi' nöza, söhuöajbi' ga zoë' xúzibi'.

'Cate' ni' zóabi' zítu' suzá'abi', bilé'enë'-bi' xúzibi', en buéchi' láchxë'ë-bi'. Carelö yöjxí'galë'-bi' xúzibi', en yöjnidë' yenbi', gudahuë'-bi' zxxixi. ²¹ Ní'irö xzí'inë' na' rëbi'-në': "Dad, bena' dul-la' lahuë' Dios, zoë' yehua' yubá, en lo' li'. Bítirö naca' neda' lesaca' gaca' xzí'ínu'." ²² Ní'irö xúzibi' rë' yugu' bönni' huen dxin queë', rnnë': "Guli'tsöjléajtë lari' nazáca'tëro, en guli'gacu-bi'. Guli'cú'u le nazaca' xibön ná'abi', en buli'dá' huarache ní'abi'. ²³ Guli'tsöjxí'i-ba' bëdxi renni', ate' guli'guti-ba'. Gáguru'-ba', en gunru' laní, ²⁴ tu' guca bi'i bönni' quia' ni ca tu bi'i chinátibi', ate' bubanbi'. Gunítibi', ate' chibulá'abi' na'a." Ní'irö gula'sí lógaquië' tu'dzéjanë'.

²⁵ 'Tsanni ni' raca lë ni, zóabi' bi'i bönni' zí'alö queë' bönni' na' la' guixi'. Cate' suzá'abi' rudxinbi' gala' ra' yu'u, riyönibi' raca huila, en raca huö'a lu yu'u na'. ²⁶ Ní'irö bulídzabi'-në' tuë' bönni' huen dxin zoë' ni', en gunábibi' lë' bizxi na' raca. ²⁷ Bönni'

huen dxin na' rē'ē-bi': "Bi'i böchu'u na' budxinbi', ate' gunná bē'ē xuzu' gulútiē'-ba' bēdxi renni', tu' budxinbi' lu nē'ē dxi'a tsáhui'do'." ²⁸ Ní'irö gulébi' bi'i zí'alö na', en biti' gú'unibi' tsú'ubi' yu'u. Ní'irö birúajē' xúzibi', en gúta'yuē' lobi' tsú'ubi'. ²⁹ Bubi'ibi' didza' bi'i zí'alö na', rēbi'-nē' xúzibi': "Nöz quézinu' cate' xö iz bena' dxin lo', en catu caz gudá'baga'a lí, pero catu caz bennu' quia' tuba' bö'cu' zxíla'do' para gü'ílēna' xibé yugu' luzá'a. ³⁰ Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútiē'-ba' bēdxi renni' ni'a queēbi'." ³¹ Ní'irö xúzibi' rē'ē-bi', rnnē': "Zxí'ina', lí zóalen cazu' neda' ate' yúgu'tē le dē quia', quiu' nequi. ³² Ben bayudxi gunru' laní, en udzējaru', tu' gúcabi' bi'i böchu'u ni ca tu bi'i chinati cázabi', ate' nubanbi'. Gunítibi' ate' chibulá'abi'."

16

Rucúdzu'ē didza' Jesús queē' bönni' huen dxin biti' náquiē' tsahui'

¹ Jesús rē' ca' yugu' bönni' dá'gaquiē' Lē', rnnē':
 —Zoē' tu bönni' dē yöl-la' tsahui' queē', en zoē' ca' queē' tuē' bönni' huen dxin dē lu nē'ē uláz queē'. Bila'dxinē' yugu' bönni' tu'zéguiē' bönni' huen dxin na' lahuē' xanē', ta'nnē' queē' rutösē' le dē queē' xanē' na'. ² Ní'irö xan yu'u na' bulidzē' bönni' huen dxin na', en rē' lē': "¿Bizxi didza' ni riyönda' quiu'? Buluí'ina neda' le naca bē' dxin nunu', tu' cabirö gata' lu no'o uláz quia'." ³ Ní'irö guzá' ládxi'ē bönni' huen dxin na', rnnē': ¿Nacxi guntsa'? Rubéajē' xana' neda' lataj lo ga runa' dxin. Biti' séqui'da' guna' dxin gú'una, en utuí'ida' inaba' nu

bi gúnna'sö quia'. ⁴ Na'a nözda' naca guna' para cate' ubéajë' neda' lataj lo ni, ila'cuá' nupa ulu'zì' neda' lídxiguequi. ⁵ Ní'irö bönni' huen dxin na' bulidzë' yugu' bönni' bi tál-lë'ë queë' xanë', ate' rë' bönni' zì'alö: "¿Gáca'xi ral-lu'u queë' xana'?" ⁶ Lë' rnnë': "Tu gayuá' rö'ö chugu le za ral-la'a." Bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Gurö'ötë ni, en buzúaj ia'tú lu guichi le inná chi-un rö'ö chugu ral-lu'u." ⁷ Gudödi ni' gunábinë' ia'tué', rnnë': "Nazxi li', ¿gáca'xi ral-lu'u?" Lë' rnnë': "Tu gayuá' da'a zxoá' xtila." Ní'irö bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u." ⁸ Réquibe'enë' xanë' na' sína'të benë' bönni' huen dxin bitì' náquië' tsahui' na'. Caní naca, nácagacarë' sina' bönni' yödzölió ni lu le tunë' la' légacasë', ca nácagaca bönachi ta'dalen Dios lu bení' queë'.

⁹ Neda' rea' libí'ili': Guli'cözalen bönachi dxi'a, ugunli' dxin yöl-la' tsahui' dë queëli' yödzölió ni, para cate' idxín dza ucá'anali' yugu' lë ni, ilunë' libí'ili' bal lataj ni' zóatica'sö.

¹⁰ Nu rugún dxi'a dxin tu le cuídì'sö dë lu në'e, lësca' ugún dxi'a dxin tu le zxön gata' lu në'e. Nu bitì' rugún dxi'a dxin tu le cuídì'sö dë lu në'e, bitì' ugún dxi'a dxin tu le zxön gata' lu në'e. ¹¹ Que lë ni na', channö cabí rugunli' dxi'a dxin yöl-la' tsahui' dë queëli' yödzölió ni, ¿nuzxi caz udödi lu ná'ali' yöl-la' tsahui' le naca idú? ¹² Channö cabí rugunli' dxi'a dxin le dë lu ná'ali' le nequi que nu yúbölö, ¿nuzxi caz udödi lu ná'ali' le ral-la' guequi que quézili'?

¹³ Bitì' gaca nitué' bönni' huen dxin gunë' xi-chíngaca chopa xanë', tu' udí'inë' tuë', en idxí'inë'

ia'tué', o gunë' bal tuë', en uzóë' tsölá'alö ia'tué' na'. Bití' gaca gunli' xichinë' Dios, en gunli' ca' dxin para uzí'ili' xibé yöl-la' tsahui' que yödzülió.

¹⁴ Bila'yönnë' bönni' yudo' fariseo didza' ni, ate' tu' nadxí'iguequinë' yöl-la' tsahui' quégaquië', que lë ni na' bulu'titjë' Jesús. ¹⁵ Ní'irö Jesús rë' légaquië':

—Libí'ili' rubéaj dxi'a cuinli' lógaca bönachi, pero nözinë' Dios le yu'u icja ládxi'do'oli', tu' naca lë na' tun zxön bönachi tu le ruzóë' Dios tsölá'alö.

Xibá queë' Moisés, en le rinná bë'ë Dios

¹⁶ Gunnë' ca' Jesús:

—Ga bidxintë dza zoë' Juan, ben dxin le rinná bë' xibá queë' Moisés, en le bulu'zúajë' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusí lo raca libán ca gaca nu tsaza ga rinná bë'ë Dios, ate' tun bayudxi yúgu'të bönachi ila'yaza ni'.

¹⁷ 'Sal-la' raca caní, gácarö ila'dödi que lúzxiba, en que luyú ni ca initi tu dídza'sö nazúaj lu guichi lu xibá queë' Dios.

Le rulá'a yöl-la' nutsaga na'

(Mt. 19:1-12; Mr. 10:1-12)

¹⁸ Gunnë' ca' Jesús:

—Channö tu bönni' ulá'alënë' nigula queë', ate' utsaga ná'alënë'-nu nigula yúbölö, gunë' dul-la' le riguitsaj xibá que yöl-la' nutsaga na', ate' nu utsaga ná'alënë' nigula na' nusanë'-nu bönni' queënu, gun ca' dul-la' le riguitsaj xibá que yöl-la' nutsaga na'.

Bönni' dë yöl-la' tsahui' queë', en Lázaro

¹⁹ Ní'irö bucúdzü'ë didza' Jesús, rnnë':

—Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazáca'da', ate' yugu' dza rúntica'së' laní, ate' tē'aj tahuë' le banéquini. ²⁰ Zoë' ca' ni' tu bönni' yéchi'do' lë' Lázaro, bönni' rinabë' nu bi unödzej queë', ate' huë'tëzë' rö'ë ra' yu'u queë' bönni' na' rilé'enë' yöl-la' tsahui'. ²¹ Raca ládxe'ë bönni' yéchi'do' na' gahuë' le bizxaj tu'huöxaj zxani ga rahuë' bönni' na' rilé'enë' yöl-la' tsahui'. Ta'dxinba' ca' bö'cu', en ta'lë'ëba' lu huë' queë' bönni' yéchi'do' na'. ²² Bidxín dza gútië' bönni' yéchi'do' na', ate' gubáz lá'ayi queë' Dios gula'ché'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáché'ë lë' yeru ba. ²³ Cate' ni' riguí'i rizáquë'ë bönni' na' bilé'enë' yöl-la' tsahui', zoë' lataj quégaca nupa nátigaca, guchisa lahuë', en bilé'enë' Abraham zoë' zi'tu', en dzáguie' Lázaro na' lë'. ²⁴ Ní'irö bē'ë zidzaj didza', rnnë': "Xuza', Abraham, buéchi' ladxi' neda'. Gusól-la' Lázaro quia' para usubisë' xibön nē'ë, en udusuhuöälë' lúdxá'a, tu' riguí'i rizáca'a lu guí' ni." ²⁵ Abraham rē' lë', rnnë': "Zxí'ina', busá' ládxe'u ca guca quiu', buzi'u xibé yöl-la' tsahui' tsanni ni' zu' nabanu', pero Lázaro ni, guca queë' yöl-la' yechi', ate' na'a, ruzí' zxonë' Lázaro ni, pero li' riguí'i rizácu'u. ²⁶ Ia'stú, tu ra' guí'a sibi rö', le zoa gatsaj láhui'lö ga ni' zóali' libí'ili', en ga ni' zóatu' netu'. Que lë' ni na' nupa nacua' ni, en ilé'ëni ila'dödi ga zóali' libí'ili', bití' ca' gaca ilunë' ca', en bití' gaca ilida ni nupa nacua' ni." ²⁷ Ní'irö bönni' na' bilé'enë' yöl-la' tsahui' rē' lë', rnnë': "Xuza' Abraham, ráta'yua' lo' isól-lu'u-në' Lázaro tsejē' lidxe' xuza', ²⁸ tu'

nacu'ë gáyu'ë bönni' böcha'a ni'. Gusöl-lë'ë tsöjenë liná' lo que le raca ni, para cabí guídigaquië' cá lataj ga ni riguí'i rizáca'a." ²⁹ Ní'irö Abraham rë' lë', rnnë': "Dë quégaquië' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' quégaquië' na' ral-la' ulu'zë náguië'." ³⁰ Bubi'ë didza' bönni' na' bilé'enë' yöl-la' tsahui', rnnë': "Xuza' Abraham, biti' gaca caní, pero channö ubanë' tu bönni' lu yöl-la' guti, en tsejë' ga na' nacu'ë, ulu'bí'i ládxi'gaquië'." ³¹ Abraham rë' lë', rnnë': "Channö cabí tu'zë náguië' didza' bë'ë Moisés, en le gula'nnë' bönni' gulu'ë didza' uláz queë' Dios, biti' ila'yéajlë'ë sal-la' nu ubán lu yöl-la' guti."

17

Run bönadxi queëru' gunru' ga nu gun dul-la' (Mt. 18:6-7, 21-22; Mr. 9:42)

¹ Jesús rë' yugu' bönni' dá'gaquië' Lë', rnnë':

—Nacuá'tica'sö le tun ga ilún bönachi dul-la', pero bica' bayechi' bönni' na' runë' ga nu gun dul-la'. ² Dxí'arö gaca queë' bönni' na' runë' caní, nu ugal-la' tu guiöj riyëtu yaga yenë', en tsöjchú'una lë' lu nísado', cáte'lö gunë' ga gun dul-la' nu bi'i néquibi' quia'. ³ Guli'gún chi'i cuinli'. Channö böchi' luzó'o gu'ë dö' quiu', buzéajni'i-në', en channö ubí'i ládxi'ë, buniti lo lë'. ⁴ Sal-la' gadxi luzuí tu dza gu'ë dö' quiu', en gadxi luzuí ca' guídë' ga zu', en guié' li': "Rubí'i ládxa'a", ral-la' uniti lo' lë'.

Yöl-la' huáca que le réajlë'ëru' Cristo

⁵ Ní'irö yugu' bönni' gubáz queë' Xanru' të' Lë', ta'nnë':

—Ben ga tséajlë'ërötu'-në' Dios.

⁶ Xanru' rë' légaquië', rnnë':

—La'tu' naca cuídi'sö yöl-la' réajlë' queéli' Dios, nácasö ca tu xisedo' mostaza, huáca guiëli' yaga zxön ni: “Gucuíta ni, en yöjsóa lu nísado’”, ate' gun yaga na' ca rnnali'.

Le ral-la' gun nu naca huen dxin

⁷ Gunnë' ca' Jesús:

—Channö zoë' tuë' bönni' ladaj libí'ili', en zoë' queë' tuë' bönni' nadó'o rugá'ané'-ba' bëdxi o ru-lapë', cate' údxi gunë' xichinë' xanë', ¿naru' huëtsë' xanë' lë', innë': “Gudá, gurö'ö gagu’”? ⁸ ¡Calëgal Caní guië' lë': “Bupá'a le gahua'. Guzóa sina' cu'u le guí'aj gahua', ate' tódirö na' huáca guí'aj gagu' li'.” ⁹ ¿Naru' huëtsë' bönni' nadó'o queë' na': “Xclenu”, tu' benë' ca gunná bé'enë' lë'? Runi neda', bití' gunë' caní. ¹⁰ Lëscá' caní gaca queéli'. Cate' chinunli' yúgu'të le gunná bé'enë' Dios libí'ili', ral-la' innali': “Nácatu' huen dxin cabí nácatu' lesaca', tu' bénsötu' le run bayudxi guntu'.”

Chië' bönni' té'enë' huë' nudzu' ruzödi

¹¹ Tsanni ni' yu'ë Jesús nöza, sa'yéajë' Jerusalén, ridödë' gapa dë yödzödo' nabábagaca luyú Samaria, en luyú Galilea. ¹² Cate' guyázië' tu yödzödo', bila'rúajë' dutságagaquië' Lë' chië' bönni' té'enë' huë' nudzu' ruzödi, ate' gula'cu'ë zí'tu'sö, ¹³ en tu'ë zidzaj didza', ta'nnë':

—¡Jesús, Bönni' Usedi! ¡Buéchi' ladxi' netu'!

¹⁴ Cate' bilé'enë' Jesús légaquië', rë' légaquië':

—Guli'tséaj, guli'tsöjlu'i' cuinli' lógaca bixúz.

Tsanni ni' söjáquië', bulu'huöáquië' dxi'a.

¹⁵ Ní'irö tuë' bönni' nútsë'ë ladjagaquië', cate'

réquibe'enë' chinuhuóáquië' dxi'a, böajë' ga na' zoë' Jesús, ru'ítica'së' zidzaj didza', rigu'ë Dios yöl-la' ba. ¹⁶ Biyéchuë', en busudxín lahuë' lu yu lahuë' Jesús, en rë' Lë': "¡Xclenu'!"

Bönni' ni nababë' Samaria. ¹⁷ Ní'irö Jesús rë' lë':

—¿Naru' cabí bulu'huóáquië' dxi'a chië' bönni'?
¿Gazxi nacuá'tsë' ia'zica'rë' bönni' na'? ¹⁸ ¿Naru' cabí zoa nu huöda cu'u Dios yöl-la' ba, pero tuzë' bönni' zi'tu' ni?

¹⁹ Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chiböácu' dxi'a tu réajlë'u neda'!

Ca idxín le rinná bë'ë Dios

(Mt. 24:23-28, 36-41)

²⁰ Cate' yugu' bönni' yudo' fariseo ta'nábinë' Jesús bátaxi ral-la' idxín le rinná bë'ë Dios, Lë' bubí'ë didza', rë' légaquië':

—Ca idxín le rinná bë'ë Dios, biti' naca le ilé'eli'.

²¹ Cuntu nu gaca inná: "¡Ni bidxín!", o inná: "¡Ni' bidxín!" ¡Buli'yútsöca'! ¡Rinná bë'ë Dios lu icja lãdxi'do'gaca bönachi!

²² Ní'irö Jesús gudxë' yugu' bönni' usëda queë', rnnë':

—Huadxín dza cate' guë'ënili' ilé'eli' dza huöda' neda', Bönni' Guljë' Bönachi, pero biti' ilé'eli' le.

²³ Ila'cuá' nupa ilë libí'ili': "¡Ni zoë'!", o ila'nná: "¡Ni' zoë'!" Biti' tséajli' ni', en biti' tséajlenli' légaquië'. ²⁴ Ca raca cate' rëpi yösa, ruzení' idá'alö lúzxiba, lësca' caní gaca cate' idxín dza huöda' neda', Bönni' Guljë' Bönachi. ²⁵ Zí'alö ca gaca lë ni, run bayudxi qu'i sáca'da', ate' bönachi dza ni zóaru' na'a ulu'cá'ana neda' cá'asö. ²⁶ Ca na' guca dza ni' zoë' Noé, lësca' caní gaca cate' idxín dza huöda'

neda', Bönni' Guljē' Bönachi. ²⁷ Dza ni'te na' gulē'aj gulahuē'. Bulu'tsaga ná'agaquiē', en bulu'dödē' zxi'inigaquiē' lu yöl-la' rutsaga na' ga bidxintē dza guyáziē' Noé lē'e barco zxön na' nazí'i le arca, ate' bidxintē nisa guiōj usuniti yōdzölió le busuniti yúgu'tē'. ²⁸ Lē'sca' caní guca dza ni' zoē' Lot. Gulē'aj gulahuē'. Gulá'uē', en gulúti'ē. Gulazē' xiyúgaquiē', en gulunē' yugu' yu'u quégaquiē'. ²⁹ Cate' bidxín dza na' burúajē' Lot lu yōdzö Sodoma, böxaj guí' ca tu nisa guiōj, enca' le ruzéguida' nazí'i le azufre, ate' bulu'suniti yúgu'tē'. ³⁰ Lē'sca' caní gaca cate' idxín dza uluí'i lahua' neda', Bönni' Guljē' Bönachi.

³¹ 'Cate' idxín dza na', channö zoē' tu bönni' ícjo'olö, en dzö'ö le dē queē' lu yu'u na', biti' ral-la' huōtjē' tsōjzxi'ē le dē queē', ate' nu zoa la' guixi', lē'sca' caní, biti' ral-la' huōjē' lidxē'. ³² Guli'sá' lādxi'li' ca guca queēnu nigula queē' Lot. ³³ Nu bönni' rē'ēnē' gun chi'ē yöl-la' na'bán queē', unítiē' le, pero bönni' udödē' yöl-la' na'bán queē' ni'a quia', udélē'ē le.

³⁴ 'Rea' libí'ili': Cate' idxín rēla na', ila'cu'ē chopē' bönni' tsōzxön ga tasiē', ate' tuē' uduzxi'a-nē', en ia'tué' ucá'ana' lē'. ³⁵ Ila'cuá'anu huētu tsōzxön chópanu nigula, ate' tunu uduzxi'a-nu, en ia'tunu ucá'ana'-nu. ³⁶ Ila'cu'ē chopē' bönni' la' guixi', ate' tuē' uduzxi'a-nē', en ia'tué' ucá'ana' lē'.

³⁷ Cate' bila'yönnē' lē ni bönni' usēda queē' Jesús, gula'nábinē' Lē', ta'nnē':

—Xan, ¿gazxi gaca lē ni?

Jesús rē' légaquiē':

—Ga dē tu le nati, ni' ulu'dubi quéziba' bíchulab.

18

Tu nigula uzëbi, en bönni' ruchi'a rusöröë'

¹ Ní'irö bucúdzu'ë didza' Jesús, rë' légaquië' ca run bayudxi ulídzatica'siru'-në' Dios, en biti' gaca chopá ládxi'ru'. ² Rnnë':

—Zoë' tu bönni' ruchi'a rusöröë' tu yödzö, bönni' biti' rádxi'në' Dios, en biti' runë' nu bönni' bal. ³ La' yödzö ná'asö zóanu tu nigula uzëbi, ate' bidxinnu nigula ni ga zoë' bönni' ruchi'a rusöröë' na', rnananu: “Buchí'a busörö le run quia' nu ruá' dö quia'.” ⁴ Xidzé biti' gú'unnë' bi gunë' queënu, pero gudödi ní' guzá' ládxi'ë, rnnë': “Biti' rádxi'da-në' Dios, en biti' runa' nu bönni' bal, ⁵ pero tu' rupízxjanu nigula uzëbi ni neda', que lë' ni na' uchi'a usöröa'-nu, para cabí guídatica'sinu ni, en para cabí tödi bë' upízxjanu neda'.”

⁶ Ní'irö Xanru' rë' légaquië', rnnë':

—Guli'zé nágali' ca na' gunné' bönni' ruchi'a rusöröë' na', bönni' biti' náquië' tsahui'. ⁷ ¿Naru' cabí uchi'a usöröë' Dios bönachi gurö cazë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'? ⁸ Rea' libí'ili': La' uchi'a usörötenë' légaquië'. Cate' huöda' neda', Bönni' Guljë' Bönachi, ¿naru' idzö'lida' nupa ta'yéajlë' neda' luyú ni?

Tu bönni' yudo' fariseo, en tu bönni' uquíxjaj

⁹ Bucúdzu'ë didza' Jesús ca naca quégaquië' bönni' tu'béaj tsahui' cuíngaquië', en tu'cá'anë' cá'asö ia'zica'rö bönachi. ¹⁰ Gunnë':

—Bila'dxinë' chopë' bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'túë' na' náquië'

bönni' ruquíxjě' lázagaca bönachi. ¹¹ Guzuíně' bönni' yudo' fariseo na', en caní bulidzě' Dios, rnně': "Dios, rea' Li: Xclenu', tu' cabí naca' ca nácagaquiě' ia'zícá'rě' bönni', nácagaquiě' gubán, en biti' nácagaquiě' tsahui'. Ta'guitsjě' xibá que yöl-la' nutsaga na'. Lěsca' bití' naca' ca bönni' uquíxaj ni. ¹² Neda' runa' gubasa chopá luzuí tu' xunu' dza huéaj, en runödžja' que yudo' tu cō' huéaj tu' chi cō' que yúgu'tě' le rata' quia'." ¹³ Guzózazě' zítu' bönni' uquíxaj na', en bití' böázxjaně' ichisa lahuě' uyúě' lúxiba, pero gudapě' luchu'ě, rnně': "Dios, buéchi' ladxi' neda', bönni' dul-la'." ¹⁴ Neda' rea' libí'ili': Bőajě' lidxě' bönni' uquíxaj na', nuhuóáquiě' tsahui' lahuě' Dios, calěga ia'túě' bönni' ni'. Nútí'těs bönni' run ba zxon cuině', guně' Dios ga huöta' igulě', pero nu bönni' rizóě' nōxaj ladxi', guně' Dios ga gácarě' lo.

Jesús rulidza tsáhuě'ě-bi' yugu' bí'ido'
(Mt. 19:13-15; Mr. 10:13-16)

¹⁵ Ní'irō bila'dxině' yugu' bönni', en nigula ga zoě' Jesús, nachě'gaquiě'-bi' yugu' bí'ido' quégaquiě' para ixóa ně'ě Jesús légacabi'. Cate' bila'lé'eně' yugu' bönni' usěda queě' Jesús lě ni, gula'dil-lě' légaquiě'. ¹⁶ Ní'irō Jesús bulidzě' yugu' bönni' dá'gaquiě' Lě, rnně':

—Guli'gü'í-bi' lataj ila'dxinbi' bí'ido' ni ga zoa'. Biti' uzága'li' xinōzagacabi', tu' gata' quégaca nupa nácagaca ca bi'í caní lataj ga rinná bě'ě Dios. ¹⁷ Le nácate' rea' libí'ili': Nu cabí si' lu ně'e le rinná bě'ě Dios, ca runbi' tubi' bí'ido', bití' ca' tsaza ga ní rinná bě'ě Lě'.

Tu bönni' rilé'enë' yöl-la' tsahui'
(Mt. 19:16-30; Mr. 10:17-31)

¹⁸ Tu bönni' unná bē' gunábinē' Jesús, rnnē':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

¹⁹ Jesús rē' lē':

—¿Bizx que rē'u neda': "Idú dxi'a"? Cuntu nu bönni' náquiē' idú dxi'a. Tuzē' Dios náquiē' idú dxi'a. ²⁰ Nöz quézinu' yugu' le gunná bē'ē Dios: Biti' gunu' dul-la' le riguitsaj xibá que yöl-la' nut-saga na'.

Biti' gútigacu' bönachi.

Biti' cuanu'.

Biti' innió' que luzó'o le cabí nácatē.

Ben bal xuz xinó'o.

²¹ Bönni' na' rē' Jesús, rnnē':

—Yúgu'tē lē ni runa' ga gudela' naca' bí'ido'.

²² Cate' biyönnē' Jesús didza' ni, rē' lē':

—Ia'tú le riyadzaj quiu' gunu'. Bēti' yúgu'tē le dē quiu', ate' lē na' si'u bunödzej quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

²³ Cate' bönni' na' biyönnē' didza' ni, ruhu'innē', tu' dēda' yöl-la' tsahui' queē'. ²⁴ Cate' bilé'enē' Jesús ca na' ruhu'innē' bönni' na', rnnē':

—¡Bica' böniga gaca, ila'yaza nupa ta'lé'e yöl-la' tsahui' ga rinná bē'ē Dios! ²⁵ Gácarö tódiba' böa' nagui yötsi', ca tsáziē' tu bönni' rilé'enē' yöl-la' tsahui' ga rinná bē'ē Dios.

²⁶ Ní'irö nupa bila'yöni didza' ni gula'nná:

—¿Nuzxi caz gaca ulá, channö?

²⁷ Jesús gudxē' légaquiē':

—Le bití' gaca ilunē' bönni', huáca gunē' Dios.

28 Ní'irö Pedro rë' Jesús:

—Buyútsöca', netu' nucá'anatu' yúgu'të le dë queëtu', en dá'atu' Li'.

29 Ní'irö Jesús rë' légaquië':

—Le nácatë rea' libí'ili', nu bönni' ucá'anë' lidxë', o xuz xinë'ë, o yugu' böchi' zanë', o nigula queë', o yugu' xzí'inë', tu' ruí'i l ádxë'ë inná bë'ë Dios, 30 bönni' ni huazí'irë' dza ni zóaru' na'a, ate' dza si' za' idéli'në' yöl-la' na'bán idú.

Jesús rigúxjö'ë leyúbölö ca si' ilútië' Lë'

(Mt. 20:17-19; Mr. 10:32-34)

31 Jesús guchë'ë quez queë' idxínnutë' bönni' usëda queë', en rë' légaquië':

—Buli'yútsöca', ribenru' zéajru' Jerusalén, ga ni ilaca yúgu'të le nazúajgaca lu guichi ca gula'nnë' bönni' gulu'ë didza' uláz queë' Dios ca ral-la' gaca quia' neda', Bönni' Guljë' Bönachi. 32 Yugu' bönni' Jerusalén ulu'dödë' neda' lu ná'agaquië' bönni' zi'tu', ate' ulu'titjë' neda', en ulu'lidza' zi'ë neda', en ulu'chejë' neda' zxöna'. 33 Ila'guinë' neda', ate' tódirö ni' ilútië' neda', pero cate' gaca tsonna dza ubana'.

34 Biti' gula'yéajni'inë' bönni' usëda queë' didza' ni, en bití' guléquibe'enë' ca sa'yéaj le ruí'ilenë' légaquië' didza' que, tu' naca le cabí sequi' ila'yéajni'inë'.

Jesús ruúnë' tu bönni' yödzö Jericó nachul-la lahuë'

(Mt. 20:29-34; Mr. 10:46-52)

35 Cate' chizóa idxinë' Jesús yödzö Jericó, zoë' tu bönni' ni' nachul-la lahuë'. Rö'ë ra' nöza rin-abë' nu bi gúnnasö queë'. 36 Bönni' ni' biyönnë'

ta'dödi bönachi zían ni', ate' gunabë' bizxi na' raca.

³⁷ Bönachi ni' të lë':

—Jesús, bönni' Nazaret, ridödë' ni.

³⁸ Ní'irö bönni' na' nachul-la lahuë' bë'ë zidzaj didza', rnnë':

—¡Jesús, xzí'ini xi'sóë' David, buéchi' ladxi' neda'!

³⁹ Yugu' bönni' nanõrugaquië' lahuë' Jesús gula'dil-lë' bönni' na' nachul-la lahuë' para usayaj ru'ë, pero lë' zídzejrö bë'ë didza', rnnë':

—¡Xzí'ini xi'sóë' David, buéchi' ladxi' neda'!

⁴⁰ Ní'irö guzë' dxiz Jesús ribözë', ate' gunná bé'enë' nu tsöjlidza lë' para idxinë' lahuë'. Cate' bönni' na' nachul-la lahuë' bidxinë' lahuë' Jesús, gunábinë' Jesús lë', rnnë':

⁴¹ —¿Bizxi rë'ënu' guna' quiu'?

Bönni' na' nachul-la lahuë' rnnë':

—Rë'ënida' huóálaj guió'j lahua'.

⁴² Jesús rë' lë':

—Chibóálaj guió'j lo'. Chibóácu' tu' réajlë'u neda'.

⁴³ La' ní'isö bulé'etenë', ate' sa'yéajlenë' Jesús, rigu'ë Dios yöl-la' ba. Lësca' yúgu'të bönachi nacua' ni', en bila'lé'e lë' na' guca gula'gú'u Dios yöl-la' ba.

19

Jesús, en Zaqueo

¹ Ní'irö guyázië' Jesús yödzö Jericó, en ridödë' lu yödzö na'. ² Zoë' tu bönni' lë' Zaqueo ni', bönni' lo ládjagaquië' bönni' uquízxaj, ate' dë yöl-la' tsahui' queë'. ³ Ruí'i ládxe'ë bönni' ni ilé'enë' Jesús, pero bití' guca queë' tu' nacua' bönachi zían ni', en náquië' bönni' ga rë'ëdo'. ⁴ Ní'irö carelö yöjnõruë' lógaca bönachi zían na', ate' yöjchenë' tu lu yaga para gaca ilé'enë' Jesús, tu' ral-la' tödë' ni'. ⁵ Cate'

bidxinë' Jesús ni', guchisa lahuë' ruyúe' ga na' dxíe' Zaqueo na', en rë' lë':

—Zaqueo, bötjatë lu yaga na', tu' run bayudxi tsöjgá'ana' lidxu' na'a.

⁶ Ní'irö la' bötjatë' Zaqueo lu yaga, ate' lu yöl-la' rudzeja queë' guchë'ë Jesús lidxë'. ⁷ Cate' bila'lé'e bönachi nacuá' ni' lë ni, gula'sí lógaquië' yúgu'të ta'nnë' queë', ta'nnë':

—Guyázië' Jesús ugá'analenë' bönni' dul-la'.

⁸ Ní'irö guzuínë' Zaqueo, en rë' Xanru':

—Xan, buyútsöca'. Gatsaj le dë quia' gu'a quégaca bönachi yechi', en channö bi gudödi bë' buquixja' bönachi, ubi'a quégaca bönachi na' tapa cö'tëlö ca'.

⁹ Jesús rë' lë':

—Na'a dza ni bidxín yöl-la' rusölá quégaca nupa nacuá' yu'u ni, tu' nababë' bönni' ni di'a dza queë' Abraham. ¹⁰ Bida' neda', Bönni' Guljë' Bönachi, ududilja', en udusölá' nupa nanítigaca.

Rucúdu'ë didza' Jesús que chi cö' dumí

¹¹ Tsanni ni' ta'yönnë' didza' ni ru'ë Jesús, rë' légaquië' le rucúdu'ë didza', tu' chizóa ila'dxinë' yödzö Jerusalén, ate' téquinë' chizóatë ilá' lahui le rinná bë'ë Dios. ¹² Caní rnnë' Jesús:

—Zoë' tu bönni' lo, sa'yéajë' tu yödzö zi'tu' para si' lu në'ë yöl-la' unná bë', ate' ní'irö huödë'. ¹³ Cate' chizóa tsejë' ni' bulidzë' chië' bönni' huen dxin queë', en bë'ë que queëgaquië' tu cö' huéaj dumí, ate' rë' légaquië': "Guli'guílajlen dumí ni tsanni huöda'." ¹⁴ Yugu' bönni' uládz queë' biti' ta'lé'enë' lë' dxí'a, ate' gula'söl-lë'ë yugu' gubáz quégaquië' ga ni' tsejë', ila'nnë': "Biti' ré'ënitú' inná bé'enë' bönni' ni netu'." ¹⁵ Ní'irö guzxí' lu në'ë yöl-la'

unná bē', ate' budxinē' ladzē'. Cate' bidxinē' ni' gunná bē'enē' nu tsöjlidza yugu' bönni' huen dxin na' budödē' lu ná'agaquiē' dumí na', para inözinē' gáca'xi bulu'guílajlenē' le tu tuē'. ¹⁶ Cate' bönni' zí'alö na' bidxinē' lahuē', rnnē': "Xan, tu cö' dumí quiu' na' chibén icja ia'chí cö' ca'." ¹⁷ Xanē' na' rē' lē': "Tshai' benu'. Nacu' huen dxin tshai'. Tu' dxí'ado' bugunu' dxin láti'do'os na' guta' lu no'o, na'a, guna' ga inná bē'enu' chi yödzö." ¹⁸ Ní'irö bidxinē' ia'tué' bönni' huen dxin na' lahuē' lē', rnnē': "Xan, tu cö' dumí quiu' na' chibén icja ia'gayu' cö' ca'." ¹⁹ Xanē' na' rē' ca' lē': "Inná bē'enu' gayu' yödzö." ²⁰ Ní'irö bidxinē' ia'tué' lahuē' lē', rnnē': "Xan, ni dē tu cö' dumí quiu' na'. Ben chi'a le, butúlida' le lari'. ²¹ Caní bena' tu' rádxida' lí', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga biti' guzu'." ²² Ní'irö xanē' na' rē' lē': "Nacu' huen dxin biti' naca tshai'. Ni'a que didza' bē'u uchi'a usöröa' lí'. ¿Réquibe'enu' naca' bönni' bizxaj: Ruzi'a le cabí buzóa', en rulapa' ga biti' guza'?" ²³ Na'a, ¿bizx que biti' yöjlú'u dumí quia' na' ga gun icja, para cate' huöda', uzi'a le idú len icja na'?" ²⁴ Ní'irö rē' nupa nacuá' ni': "Guli'cúa lu nē'e dumí na', ate' guli'gü'i queē' bönni' na' dē queē' chi cö' dumí." ²⁵ Légaquiē' tē' lē': "Xan, chidē queē' chi cö' dumí." ²⁶ Ní'irö bubi'ē didza' xángaquiē', rnnē': "Rea' libí'ili': Nu rugún dxi'a dxin le do' dē lu nē'e, ulu'zxöni ládxi'gaca lē' ia'late', pero nu biti' rugún dxi'a dxin le do' dē lu nē'e, ulu'béaj lu nē'e lē' na' guta' lu nē'e." ²⁷ Ca naca quégaquiē' bönni' ni' biti' ta'lé'enē' neda' dxi'a, en biti' gulé'ennē' inná bē'eda' légaquiē', guli'tsöjzxi' légaquiē' para

ídigaquië' ni, ate' guli'guti légaquië'."

*Len yöl-la' ba zxön razië' Jesús yödzö Jerusalén
(Mt. 21:1-11; Mr. 11:1-11; Jn. 12:12-19)*

²⁸ Cate' budxi gunnë' caní Jesús, buguelë'ë xinözë', sa'yéajë' zaca' yödzö Jerusalén. ²⁹ Cate' bila'dxinë' gala' ga nacuá' yödzö Betfagé, en yödzö Betania, ga naca ra' gu'ado' nazí'i le Guí'a Yaga Olivo, gusöl-lë'ë Jesús chopë' bönni' usëda queë', ³⁰ ate' rë' légaquië':

—Guli'tséaj yödzödo' ni' ca dödilö ga zóaru', en cate' idxinli' ni', tsöjxáca'li'-ba' tuba' búrrodo' nága'ba' ni', búrrodo' na' cuntu nu ribíani lëba'. Guli'sedxi-ba', en guli'duchë'-ba' quia' ni. ³¹ Channö zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinnë'-ba'."

³² Söjáquië' bönni' usëda queë' na' nasöl-lë'ë, ate' yöjxáca'gaquië'-ba' ca na' chigudxë' Jesús légaquië'. ³³ Cate' gula'sedxë'-ba' búrrodo' na', yugu' bönni' xanba' të' légaquië':

—¿Bizx que risédxili'-ba' búrrodo' na'?

³⁴ Bulu'bi'ë didza', ta'nnë':

—Xanru' riquinnë'-ba'.

³⁵ Gula'chë'ë-ba' ga na' zoë' Jesús. Cate' chigula'xóë' yugu' lari' tsölá'a quégaquië' cüdzu'ba' búrrodo' na', bulu'dxíë' Jesús cüdzu'ba' lahui lari' na'. ³⁶ Gapa ral-la' tödë' Jesús, gula'chiljë' lari' quégaquië' la' nöza. ³⁷ Cate' chibila'dxinë' gala' ga zoa lidinni que Guí'a Yaga Olivo, lu yöl-la' rudzeja quégaquië' gula'sí lógaquië' yúgu'të bönni' dá'gaquië' Jesús, tu'ë zidzaj didza', ta'gu'ë Dios

yöl-la' ba, ni'a quégaca yugu' yöl-la' huáca zxön bila'le'enë' benë' Jesús. ³⁸Ta'nnë':

—¡Yöl-la' ba bönni' unná bē' ni zē'ē uláz queë' Xanru' Dios! ¡Yehua' yubá za' le ribequi dxi ládxi'ru'! ¡Yöl-la' ba Dios!

³⁹Ní'irö yugu' bönni' yudo' fariseo nútsa'gaquië' ladaj bönachi zían ni' tē' Jesús, ta'nnë':

—¡Bönni' Usedi, gudil-la yugu' bönni' usëda quiu'!

⁴⁰Bubi'ë didza' Jesús, rē' légaquië':

—Rea' libí'ili': Channö ila'cuá' dxíë' bönni' ni, yugu' guiöj hualuí' caz zidzaj didza'.

⁴¹Cate' bidxinë' Jesús gala' ra' yödzö na', en rilé'enë' le, ní'irö ribödxë' que, ⁴²rnnë':

—Raca ládxa'a huanözili' na'a dza le gaca gun ga cuéqui dxi ládxi'li' lahuë' Dios, pero na'a china-gachi' queëli', para cabí ilé'eli' le. ⁴³Huala'dxín queëli' dza cate' nupa biti' ta'lé'e libí'ili' dxi'a ila'bequi zö'ö idú gásibi'ilö ga zóali', en ila'gú'u libí'ili' lé'alö, ate' yúgu'të latajidú gásibi'ilö ilúnlenë' libí'ili' gudil-la. ⁴⁴Ulu'quínnajë' zö'ö run chi'i yödzö queëli', en ilútië' nupa nacué' lu yödzö ni. Biti' ugá'ana guiöj lahui luzé'e. Yúgu'të lë ni gaca queëli' tu' cabí gúquibe'eli' dza bidë' Dios buduyúë' libí'ili'.

Rulatjë' Jesús lö'a yudo'

(Mt. 21:12-17; Mr. 11:15-19; Jn. 2:13-22)

⁴⁵Ní'irö guyázië' Jesús lö'a yudo', en gusí lahuë' rubéajë' ní'ilö yúgu'të nupa tuti', en nupa to'o ga naca lö'a yudo'. ⁴⁶Rë' légaquië':

—Nazúaj lu guichi lá'ayi, rnna: “Lidxa' naca yu'u ga ulu'lidza bönachi Dios”, pero libí'ili' chinunli' le ca tu lídxigaca bönni' gubán.

⁴⁷ Yugu' dza rusédinë' Jesús bönachi ga naca chila yudo', ate' gula'zóa gula'bö'ë bixúz unná bē', len bönni' yudo' tu'sédinë', en yugu' bönni' lo que lu yödzö ilútië' Lë'. ⁴⁸ Biti' bulu'dzölinë' nacxi ilútië' Lë', tu' idú ládxi'gaca tu'zě nágagaca yúgu'të bönachi xtídzë'ë.

20

*Yöl-la' unná bē' dē lu nē'ë Jesús
(Mt. 21:23-27; Mr. 11:27-33)*

¹ Tu dza, cate' ni' rusédinë' Jesús bönachi ga naca chila yudo', en riguíxjö'ë didza' dxi'a, bila'dxinë' yugu' bixúz unná bē', en bönni' yudo' tu'sédinë', len bönni' gula tu'zėjni'inë', ga na' zoë', ² ate' tē' Jesús:
—Gudixjöi'i netu'. ¿Bizxi yöl-la' unná bē' dē lu no'o runu' caní? ¿Nuzxi caz budödi lu no'o yöl-la' unná bē' ni?

³ Bubi'ë didza' Jesús, rē' légaquië':

—Inábida' ca' libí'ili' tu didza', ate' ubí'ili' innali'.

⁴ ¿Nuzxi gusöl-la' Juan ruquilë' bönachi nisa? ¿Naru' Dios, o bönachi?

⁵ Gulún xtídzá'gaquië' la' légacasë' bönni' yudo' na', ta'nnë':

—Channö innaru': Gusöl-lë'ë Dios lë', guíë' rē'u: “¿Bizx que bití' guyéajlë'ëli'-në'?” ⁶ Channö guiëru'-në': Gula'söl-lë'ë yugu' bönni' lë', bönachi lu yödzö ni ulu'ládxi' rē'u guiój, tu' nöziguequi bē'ë didza' Juan na' uláz queë' Dios.

⁷ Ní'irö bulu'bi'ë didza', ta'nnë':

—Biti' nöztu' nuzxi na' gusöl-la' Juan.

⁸ Ní'irö Jesús rē' légaquië':

—Neda' ca' bití' guía' libí'ili' bi yöl-la' unná bē' rúnida' caní.

Yugu' bönni' huen dxin biti' nácaqaquië' tsahui'
(Mt. 21:33-44; Mr. 12:1-11)

⁹ Ní'irö la' gusí lotë' Jesús ruí'ilenë' bönachi nacuá' ni' didza'. Rucúdzu'ë didza', rnnë':

—Zoë' tu bönni' budé'ë yugu' lubá uva lu xiyúë', ate' budödë' luyú na' lu ná'agaquië' bönni' huen dxin para ilún gatsjé' len lë' le ulu'zi'ë, ate' guyijë' zi'tu' ga ni' bugá'anë' xidzé. ¹⁰ Cate' bidxín dza ulu'chibë' uva luyú na', gusöl-lë'ë tuë' bönni' gubáz queë' ga na' nacu'ë huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'söl-lë'ë lë' cá'asö. ¹¹ Leyúbölö gusöl-lë'ë ia'tué' gubáz queë', ate' légaquië' gulúndë'ë lë' ca' zi', en gulu'ë dö' queë', ate' bulu'söl-lë'ë lë' cá'asö. ¹² Leyúbölö gusöl-lë'ë quégaquië' bönni' bunny gubáz queë', ate' bulu'dxië' ca' lë' huë', en bulu'béajë' lë' ní'ilö luyú na'.

¹³ Ní'irö guzá' láchxë'ë xani luyú na', gunné': “¿Nacxi guntsa'? Isöl-la'a zxi'ini caza' nadxi'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal.” ¹⁴ Ní'irö, cate' yugu' bönni' huen dxin na' bila'lé'enë'-bi', gulún xtídza'gaquië' la' légacasë', ta'nnë': “Bi'i ni guequi queëbi' luyú ni. Guli'dá, gútiru'-bi', para guequi queëru' le ral-la' guequi queëbi'.” ¹⁵ Bulu'béajë'-bi' ní'ilö luyú na', en gulútië'-bi'.

'Na'a, ¿nacxi caz gunë' xani luyú na' quégaquië'? ¹⁶ Guídë', en gútië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacuá' ni' bila'yöni lë ni, gula'nnë':
—¡Inná Dios biti' gaca caní!

¹⁷ Ní'irö buyúë' Jesús légaquië', rnnë':

—¿Bizxi sa'yéaj lë na' nazúaj lu guichi lá'ayi, rnna:

Guiöj na' gula'ru'unë' bönni' huen zö'ö,
guiöj ni chinaca guiöjlen squin zö'ö?

¹⁸ Núti'tës nu ibixi lahui guiöj ni, quitsaj nu na', ate' nu bönni' tsöjbága' guiöj ni lë', uzzuxaj lë'.

Ca naca dumí ta' guizxaj lázagaca bönachi
(Mt. 21:45-46; 22:15-22; Mr. 12:12-17)

¹⁹ La' dza ní'sö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë' gunné' quégaquië' lë na' bucúdzu'ë didza', pero guládxinë' bi ilún bönachi zían nacuá' ni'. ²⁰ Ní'irö bulu'yúyenië' Jesús, en gula'söl-lë'ë yugu' bönni' para ulu'béajë' Lë' didza', bönni' ulu'lu'i cuíngaquië' ca bönni' tsahui', para ilunë' ga bi innë' Jesús, para gaca ulu'dödë' Lë' lu në'ë bönni' rinná bé'enë' uláz queë' César. ²¹ Para ilunë' caní, gula'nábinë' Jesús, ta'nnë':

—Bönni' Usedi, nöztu' rnno' le nácatë, en rusédinu' le nácatë, en biti' ruchi'a rusöröu' ca naca le tu'lu'isö lahui bönachi, pero idütë li naca ca rusédinu' xibá queë' Dios. ²² Gudíxjöi'i netu'. ¿Naru' run bayudxi quizxaj laztu' queë' César, bönni' Roma rinná bë'ë, o cabí?

²³ Réquibe'enë' Jesús le té'ënnë' ilunë' queë', ate' rë' légaquië':

—¿Bizx que rizí' bë'ëli' neda'? ²⁴ Buli'lu'itsöqui' neda' tu dumí ridá. ¿Nuzxi lahui da' lë'e ni, en nuzxi le nazúaj ni?

Bulu'bi'ë didza', ta'nnë':

—Queë' César na'.

²⁵ Ní'irö Jesús rë' légaquië':

—Buli'nódzaj queë' César le nequi queë' César, ate' queë' Dios le nequi queë' Dios.

26 Biti' guca ilunë' ga bi innë' Jesús para gaca ulu'zéguië' Lë' didza' lógaca bönachi zián na', pero bulu'báninë' ca naca didza' bubì'ë, ate' bulu'sayaj ruá'agaquië'.

Ca gaca quégaca nupa ulu'bán lu yöl-la' guti
(Mt. 22:23-33; Mr. 12:18-27)

27 Ní'irö yugu' bönni' yudo' saduceo, nupa na' ta'nná bitì' ulu'bán nupa chinátigaca, bila'dxinë' ni', ate' gula'nábinë' Jesús, ta'nnë':

28 –Bönni' Usedi, Moisés buzúajë' queëru' lu guichi, le rnna: “Channö gátië' nu bönni', ate' ugá'ananu nigula queë', en channö cuntu nu zoa bi'i queë', ní'irö bi'i böchi'bi' ral-la' sí'ibi'-nu nigula queë' na', para uzóabi' bi'i queëbi' böchi'bi' na' gútibi'.” 29 Gula'cuá'abi' gadxi bi'i bönni' ná'acagabi' böchi'bi', ate' bi'i zí'alö na' but-saga ná'aleni' bi'i nigula, en gútibi', bitì' zóabi' bi'i queëbi'. 30 Ní'irö bi'i buropi na' but-saga ná'aleni'-nu nigula na', ate' gútibi' ca' bi'i ni, bitì' zóabi' bi'i queëbi'. 31 Butsaga ná'aleni'-nu bi'i bunnì na', ate' la' tuz ca gulunbi' igádxitëbi', ate' gulátibi', bitì' zóabi' bi'i quégacabi'. 32 Ga búdxitë, gútinu ca' nigula na'. 33 Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'aleni'-nu igádxitëbi'?

34 Ní'irö bubì'ë didza' Jesús, rë' légaquië':

–Tu'tsága ná'agaca bönachi dza ni zóaru' na'a, en tu'nödzejë'-bi' zxí'inigaquië' para ulu'tsaga ná'acagabi'. 35 Na'a, nupa ná'acagaca lesaca' ulu'bán lu yöl-la' guti, en tsöjcuá' yödzölió si' gata', bitì' ilún yöl-la' rizóalen nigula, en bitì' ulu'tsaga ná'agaca.

36 Caní gaca, tu' cabirö ilati nupa na' ulu'bán lu

yöl-la' guti, pero ilácagaca ca nácagaquië' gubáz lá'ayi queë' Dios, en ilácagaca zxí'ini cazë' Dios. ³⁷ Ca na' ral-la' ulu'bán nupa chinátigaca, ruluí'inë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob. ³⁸ Dios náquië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

³⁹ Ní'irö bulu'bi'ë didza' bal-lë' bönni' yudo' usedi, ta'nnë':

—Bönni' Usedi, dxí'ado' gunnó'.

⁴⁰ Bítirö bulu'rúguinë' ila'nábinë' Lë' didza'.

¿Nuzxi zxí'ini náquië' Cristo?

(Mt. 22:41-46; Mr. 12:35-37)

⁴¹ Ní'irö Jesús rë' légaquië':

—¿Nacxi caz na' ta'nnë': "Cristo náquië' zxí'inë' David"? ⁴² David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

"Gurö'i cuita lë'a ibëla

⁴³ cate' gunra' ga ulu'zechu zxíbigaca lo' nupa ta'dá'baga' Li'."

⁴⁴ David caz na' gunnë' queë' náquië' Xanë'.
¿Nacxi caz naca, rnnali' libí'ili' náquië' zxí'inë'?

Jesús ruzégui'ë diza' bönni' yudo' tu'sédinë'

(Mt. 23:1-36; Mr. 12:38-40; Lc. 11:37-54)

⁴⁵ Tsanni ni' yúgu'të bönachi nacua' ni' tu'zë nágagaca Jesús, rë' yugu' bönni' usëda queë':

⁴⁶ —Guli'gún chi'i cuinli' quégaquië' bönni' yudo' tu'sédinë', tu' ta'yaza ládxi'gaquië' ta'dë'

nácugaquië' lari' tunna, en tē'ënnë' ulu'lidza bönachi légaquië' zxön gapa naca lu yē'ëyi, en ta'yaza lādxi'gaquië' ca' ta'bö'ë lataj lo gapa tu'dubë' tu'sëdë' queë' Dios, en gapa ta'bö'ë tahuë'.
⁴⁷ Ta'güë' lídxigacanu nigula uzëbido', ate' para ulu'lu'í tshui' cúngaquië', xidzé tu'lidzë' Dios. Yugu' bönni' ni, yënni'tërö gunë' Dios ga ila'gu'í ila'záquië'.

21

Gun le gulú'unu tu nigula yechi' lahuë' Dios *(Mr. 12:41-44)*

¹ Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tshui' quégaquië', ta'gu'ë dumí lu gu'ina que dumí gun que yudo'.
² Bilé'enë' ca' tu nigula yechi' uzëbido', rigú'unu chopa dumí lásido', le nazáca'gaca láti'do'os.
³ Rnnë' Jesús:

—Le nácatë rea' libí'ili', tu le zxöntërö gulú'unu nigula yechi' uzëbido' ni ca ia'zica'rö bönachi na' ta'gu'ë dumí. ⁴ Yúgu'të', tsca le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queënu gulú'unu idütë le dë queënu, le ral-la' gáhuinu.

Rigu'xjö'ë Jesús ca ulu'sunítië' yudo' *(Mt. 24:1-2; Mr. 13:1-2)*

⁵ Nacua' ni' nupa tu'í didza' ca naca que yudo' na', ca na' nazí'i biquitaj que, yugu' guió'j nazácalë'egaca, en yugu' gundo' nácagaca lachi, ate' Jesús rë' légaquië', rnnë':

6 —Yúgu'të lë ni rilé'eli', huadxín dza cate' bíti'rö ugá'ana guiöj lahui luzé'e ni, tu' ulu'suniti bönachi yudo' ni.

*Le ilaca bē' cate' si' idxín dza údxi
(Mt. 24:3-28; Mr. 13:2-23)*

7 Ní'irö gula'nábinē' Jesús, ta'nnē':

—Bönni' Usedi, ¿bátaxi gaca lë ni? ¿Bizxi gaca bē' chizóa gaca caní'?

8 Bubi'ë didza' Jesús, rnnē':

—Guli'gún chi'i cuinli', para cabí nu si' ye'e libí'ili', tu' ila'lá'gaquiē' bönni' zían, en ila'zí'i lágaquiē' ca lea' neda', ila'nnē' nácagaquiē' Cristo, en ila'nnē': “Chizá' gala' dza údxi.” Neda' rea' libí'ili': Biti' tséajlenli' légaquiē'. 9 Cate' yönili' raca gudil-la, en ta'dá'baga' bönachi yúlahui', bití' gadxi idzöbili', tu' run bayudxi ilaca le caní, pero bití' zuitëni dza údxi.

10 Ní'irö rē' ca' légaquiē':

—Til-la tu yödzo len ia'tú yödzo, ate' bönachi tu ga nu rinná bē' ila'díl-lalen bönachi ia'tú ga nu rinná bē'. 11 Tödigaca budó' zxu', ate' zían lataj gaca gubín, en ilatsaj yödzhue' zxön. Ila'lá' lahui lúzxiba le ilún gadxi bönachi, en le ilaca bē'.

12 'Zí'atëlö cate' si' ilaca lë ni, ila'zön bönachi libí'ili', en ila'bía ládxi'gaca libí'ili'. Ila'ché'ë libí'ili' gapa tu'dubē' tu'sedē' queē' Dios para ilútiē' libí'ili', en ila'gu'ë libí'ili' lidxi guíë. Ila'ché'ë libí'ili' lógaquiē' bönni' ta'nná bē'ë, en lógaquiē' bönni' lo, tu' dá'ali' neda'. 13 Gaca caní queéli' para séqui'li' gunli' ba nalí quia' neda'. 14 Tsutsu guli'gún ládxi'li', para cabí cuéqui ícjali' zí'alö nacxi innali' uláz queéli', 15 tu' gunna' queéli' didza' ubí'ili', en

yöl-la' réajni'i, para cabí gaca ulu'cul-lë' libí'ili', en para cabí gaca bi ila'nné' que xtídza'li' bönni' ni' biti' ila'lé'enë' libí'ili' dxi'a. ¹⁶ Ní'irö xuz quézili' ulu'dödë' libí'ili', en cá'anqueze yugu' bönni' böchi' quézili', en yugu' di'a dza que quézili', en yugu' böchi' luzé'e quézili', ate' ilútië' bál-lali'. ¹⁷ Yúgu'të bönachi ulu'zóa libí'ili' tsölá'alö tu' dá'ali' neda', ¹⁸ pero biti' initi nitú guitsa' ícjali'. ¹⁹ Channö ugá'anali' tsutsu, idéli'li' yöl-la' na'bán idú.

²⁰ 'Cate' ilé'eli' bönni' röjáquië' gudil-la nagú'ugaquië' lë'a Jerusalén, inözili' chibidxín dza initi yödzö ni. ²¹ Ní'irö nupa nacuá' luyú Judea ral-la' ila'zxunnaj ni, en tsöjaca gapa naca guí'ado', ate' nupa nacuá' lu yödzö ni ral-la' ila'rúaj ni, ate' nupa nacuá' la' guixi', biti' ral-la' ulu'dxín lu yödzö ni. ²² Yugu' dza ni' Dios gunë' xíguia' nupa nacuá' yödzö ni para gaca yúgu'të le nazúaj lu guichi lá'ayi ca ral-la' gaca quégaquië'. ²³ Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbi', en nigula tu'gádxinu-bi' bí'ido', tu' ila'gui'i ila'záca'da' bönachi nacuá' ni', ate' Dios gúndë'ë bönachi ni' xíguia'. ²⁴ Ilátië' zíanë' lu gudil-la na', ate' ila'ché'ë ia'bal-lë' nadzúngaquië' ga ila'dxinë' idütë yödzölió, ate' yödzö Jerusalén ni, ulu'léaj ulu'libë' le bönni' zi'tu', cate' izá'arö dza quégaquië'.

Le ilaca bë' si' huödë' Bönni' Guljë' Bönachi
(Mt. 24:29-35, 42-44; Mr. 13:24-37)

²⁵ Gunnë' ca' Jesús:

—Ní'irö ila'cuá' le ilaca bë' lu gubidza, en lu beo', en yugu' lu böljaj lúzxiba, ate' luyú ni ulu'chixi bönachi, en iládxiguequi, tu' yön chi'i guziú' yu

que nísado', en que le riyasa ridxiá nisa na'.
²⁶ Ulu'dú ládxi'gaca lu yöl-la' radxi quéguequi tu'
 ila'zá' ládxi'gaca quégaca le ral-la' ilaca lu yödzölió,
 en ila'zxizi le nalá'gaca lúzxiba. ²⁷ Ní'irö ila'lé'ené'
 neda', Bönni' Guljē' Bönachi, guída' lu böaj lúzxiba,
 dē lu na'a yöl-la' unná bē', ate' ilá' lahui yöl-la' zxön
 quia'. ²⁸ Cate' isí lo ilaca lē ni, buli'tipa ládxi'li',
 en guli'chisa loli', tu' chizóa udxina' neda', para
 huóá'ua' libí'ili'.

²⁹ Jesús gudxē' ca' légaquiē' tu le bucúdzu'ē didza',
 rnnē':

—Buli'yútsōca' ca raca que yaga higo, en que
 bíti'tēs yaga yúbölö. ³⁰ Cate' rilé'eli' ta'lén ni'a nē'e
 huē'enido', nöz quézili' chizá' gala' cusu ba. ³¹ Lēasca'
 caní, cate' ilé'eli' chitaca yugu' lē ni, inözili' chizá'
 gala' dza idinná bē'ē Dios luyú ni.

³² 'Le nácatē rea' libí'ili', biti' ilátigaca bönachi
 ila'cuá' dza ni' cate' ilaca yúgu'tē lē ni. ³³ Ila'dödi
 que lúzxiba, en que luyú ni, pero xtídza'a, biti' tōdi
 cá'asō, tu' idxín caz ca rna.

³⁴ 'Guli'gún chi'i cuinli' para cabí gūf'ili' lataj
 tsaza icja ládxi'do'oli' le gun ditaj libí'ili', lē na'
 naca yöl-la' rágulē'e, en yöl-la' rizudxi, en yöl-la'
 ruúbi rugu'i, para cate' idxín dza ni', cabí sóali' niti
 ladxi', ³⁵ en para cabí gaca queéli' ca tu le rizön
 bönachi, ca naca le gaca quégaca yúgu'tē bönachi
 nacuá' idútē yödzölió. ³⁶ Que lē ni na', guli'sóa ban
 ladxi', en buli'lídzatica'sē' Dios, para gaca uláli' lu lē
 na' ral-la' ilaca, en para cabí utuí'ili' cate' idxinli'
 lahua' neda', Bönni' Guljē' Bönachi.

³⁷ Lahui' dza rizóē' Jesús chila yudo', rusédinē'
 bönachi, ate' chi'i dzö'ölö rirúajē' ni', en rejē' lu
 guí'ado' nazí'i le Guí'a Yaga Olivo. ³⁸ Yugu' zila

bila'dxín yúgu'të bönachi ga zoë' Jesús chila yudo' para ulu'zë nágagaca xtídzë'ë.

22

Tun xtídza'gaquië' ilútië' Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Cate' chizóa idxín laní cate' tahuë' yöta xtila cabí nazí'i cúa zi que, nazí'i le Pascua laní na', ² bulu'dubë' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútië' Jesús, pero bití gula'zéqui'në' tu' tádxinë' bi ilún bönachi.

³ Ní'irö Satanás tu' xihui' yöjtsaga Judas. Judas lë' ca' Iscariote, en nababë' idxínnutë' gubáz nasöl-lë'ë Cristo. ⁴ Guyijë' Judas na', yöjë'lenë' didza' yugu' bixúz unná bë', en bönni' dë lu ná'agaquië' que yudo', nacxi gunë' para udödë' Jesús lu ná'agaquië'. ⁵ Bulu'dzéjanë' bönni' yudo' na', en gula'zí' lu ná'agaquië' ulu'nödzjë' queë' dumí. ⁶ Raza láchë'ë Judas lë ni, ate' rizóa ribö'ë udödë' Jesús lu ná'agaquië' bagáchi'sö.

Le ráguru' le rusá láchxí'ru' ca gútië' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidxín dza na' tahuë' yöta xtila cabí nazí'i cúa zi que, cate' ral-la' ilútië'-ba' bö'cu' zxila' le tahuë' dzö' Laní Pascua. ⁸ Jesús gusöl-lë'ë Pedro, en Juan, rnnë':

—Guli'tséaj, guli'tsöjpá'a queëru' le gáguru' dzö' Laní Pascua.

⁹ Të' Lë':

—¿Gazxi ré'ënu' tsöjpá'atu' queëru'?

¹⁰ Jesús ré' légaquië', rnnë':

—Buli'yútsöca', cate' tsú'uli' lu yödzo ni, irúajë' tu bönni' dutságuië' libí'ili', sőjnu'ë tu rö'ö nisa. Guli'tséajlenë' ga idxíntëli' yu'u ga tsázië'.
 11 Guli'guíë' xan yu'u na': "Bönni' Usedi rë' li': ¿Gazxi zoa yu'u laní ga gágulena' yugu' bönni' usëda quia' dzö' Laní Pascua?" 12 Ní'irö uluí'inë' libí'ili' tu yu'u zxön xitsá' ga ni' chinabá'a. Buli'pá'a ni' le gáguru'.

13 Ní'irö yöjáquië', en yöjxáca'gaquië' ca na' chigudxë' Jesús légaquië', ate' bulu'pë'ë ni' le ilahuë' dzö' Laní Pascua.

14 Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bõ'lenë' Lë' tsözxön. 15 Ní'irö Jesús rë' légaquië':

—Gúcada' lãdxa'a gágulena' libí'ili' tsözxön xtsö' ni zí'atëlö cate' si' qui'i saca'a, en gátia'. 16 Rea' libí'ili': Bítirö gahua' lë ni cate' idxinrö dza gaca le rulu'isö xtsö' ni ga ni' rinná bë'ë Dios.

17 Gudélë'ë Jesús tu zxíga'do', en gudxë' Dios: "Xclenu'." Ní'irö rë' légaquië':

—Guli'sí' lë ni, en guli'guí'aj lati' huéaj, 18 tu' rea' libí'ili': Bítirö guí'ja' xisi uva cate' idxinrö le rinná bë'ë Dios.

19 Ní'irö gudélë'ë yöta xtila, en gudxë' Dios: "Xclenu'." Gudödi ni' buzzuxjë' le, en bë'ë que queëgaquië', rnnë':

—Lë ni naca idütë le naca' le rudöda' uláz queëli'. Guli'gún caní para usá lãdxi'li' neda'.

20 Cate' budxi gulahuë', lësca' caní bë'ë didza' que zxíga'do' na', rnnë':

—Zxíga'do' ni rulu'i ca naca didza' cubi rucá'ana tsahui', ate' rön quia' run tsutsu le, rön na' ilalaj ni'a queëli'.

21 'Na'a, bönni' na' udödë' neda' lu ná'agaca bönachi rö'ë rágulenë' neda' tsözxön. 22 Le nácatë huayija' ga ilútië' neda', Bönni' Guljë' Bönachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

23 Ní'irö gula'sí lógaquië' ta'nábinë' Lë' tu tuë', ta'nnë':

—¿Núzxilötu' nu gun caní?

Tu'i xtídza'gaquië' núzxilögaquië' gáquië' lo

24 Ní'irö gulu'ë didza' la' légacasë' núzxilögaquië' idéli'në' lataj lo. 25 Jesús gudxë' légaquië':

—Yugu' bönni' unnábë' tu'gunë' dxin yöl-la' unnábë' quégaquië', ta'nná bé'enë' bönachi, ate' nupa ni dë lu ná'agaca yöl-la' unnábë', légaquië' bönni' tácalen. 26 Libí'ili' biti' ral-la' gunlí' caní, pero nu naca lo ladjali' ral-la' gaca ca nu naca cuídi'tërö, ate' nu rinnábë' ral-la' gaca ca nu run dxin quéguequi luzé'e. 27 ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

28 'Libí'ili' ni guzóalenli' neda' cate' ni' bi guca quia', yugu' le gula'zí' bë' neda'. 29 Que lë ni na' udöda' lu ná'ali' tu ga innábë'ëli', ca na' benë' Xuza', budödë' lu na'a ga innábë'a neda'. 30 Caní guna' para gaca cö'öli', en guí'aj gágulenli' neda' ga ni' innábë'a, ate' cö'öli' xilataj cázali' ga uchi'a usöröli' idxinnu cö' xzí'ini xi'sóë' Israel.

Rnnë' Jesús innë' Pedro biti' núnbë'ë Lë'

(Mt. 26:31-35; Mr. 14:27-31; Jn. 13:36-38)

31 Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi xzoa' xtila, ³² pero chibulidza'-në' Dios, en gunábida' Lë' gácalenë' li', para cabí údxi udú yöl-la' réajlë' quiu' neda'. Na'a, cate' huóácu' quia', butipa ládxi'gaquië' böchi' luzó'o.

³³ Pedro rë' Lë':

—Xan, chizóa' sá'lena' Li', calëgasö tseja' lidxi guié, pero lësca' gátileña' Li'.

³⁴ Jesús rë' lë':

—Pedro, rea' li': Zí'alö cödxiba' böra na'a, chigudá'bagu'u tsonna luzuí, innó' cabí núnbë'u neda'.

Le benë' Jesús cate' chizóa ilútië' Lë'

³⁵ Jesús gunábinë' légaquië', rnnë':

—Cati' gusöl-la'a libí'ili' cabí nuá'ali' yöxaj yöta, en calëga buzudi dumí, en calëga chopá cö xiráchuli', ¿naru' bi biyadzaj queëli'?

Légaquië' ta'nnë':

—Biti' bi.

³⁶ Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu bití' dë que guié tuchi' ral-la' guti' lari' rixóa yeni, en si' tu guié tuchi'. ³⁷ Rea' libí'ili': Run bayudxi gaca quia' lë na' nazúaj lu guichi lá'ayi, rRNA: “Gulunë' queë' ca tunë' quégaca nupa tua' dö”, ate' ilaca yúgu'të le nazúajgaca lu guichi ca ral-la' gaca quia'.

³⁸ Ní'irö légaquië' ta'nnë':

—Xan, ni dë chopá guié tuchi'.

Lë' rë' légaquië':

—Chinaca.

Jesús ruldzë' Dios la' yëla Getsemani
(Mt. 26:36-46; Mr. 14:32-42)

³⁹ Ní'irö birúajë' Jesús, en ca run cazë' sa'yéajë' lu Guí'a Yaga Ólivo, ate' yugu' bönni' usëda queë' söjácalenë' Lë'. ⁴⁰ Cate' bila'dxinë' ni', Jesús rë' légaquië', rnnë':

—Buli'lídzë' Dios, inábili'-në' cabí gata' lataj si' bë' tu' xihui' libí'ili'.

⁴¹ Ní'irö Jesús guzë'ë ga na' nacu'ë, en gudödë' ia'lati' tsca ga ridxín tu guiöj rirú'uniru', ate' ni' buzóa zxibë', en ruldzë' Dios. ⁴² Rnnë':

—Xúz, channö rë'ënu', bucuása ga zoa' lë na' ralla' quí'i saca'a, pero calëga ca rë'ënda' neda', pero ca rë'ënu' Li' gunu'.

⁴³ Ní'irö buluí'i lahuë' gubáz lá'ayi queë' Dios, zë'ë yehua' yubá, ate' butipë' ládxë'ë Jesús. ⁴⁴ Lu yöl-la' risëbi ladxí' queë', idú ládxë'ë Jesús bulidzë' Dios, ate' nisa yösa queë' guca ca rön raba' luyú.

⁴⁵ Cate' budxi bulidzë' Dios, guyasë', en böajë' ga na' nacu'ë bönni' usëda queë', ate' duxáquië' légaquië' tásië' tu' tu'huí'inigaquië'. ⁴⁶ Ní'irö Jesús rë' légaquië':

—¿Rásitsali'? ¡Guli'chasa, en buli'lidzë' Dios! Inábili'-në' cabí gata' lataj si' bë' tu' xihui' libí'ili'.

Ta'zönë' Jesús

(Mt. 26:47-56; Mr. 14:43-50; Jn. 18:2-11)

⁴⁷ Tsanni ni' ru'ë didza' Jesús, la' bila'dxintë' bönni' zían ni', ate' Judas, bönni' na' nababë' idxínnuë' bönni' usëda queë' Jesús dzáguië' légaquië', ate' nanöruë' lógaquië' bönni' zían na'. Gubíguië' ga zoë' Jesús para utsaga lahuë' Lë'.

⁴⁸ Ní'irö Jesús rë' lë':

—Judas, ¿naru' rudóditso' caní neda', Bönni' Guljē' Bönachi, rutsaga lo' neda'?

⁴⁹ Cate' yugu' bönni' na' nacuá'lenē' Jesús bila'lé'enē' ca na' raca queē' Lē', tē' Lē':

—Xan, ¿naru' gü'itu' légaquiē' guíē' tuchi'?

⁵⁰ Tuē' bönni' usēda queē' Jesús benē' huē' guídi náguiē' bönni' huen dxin queē' bixúz lo. Burixē' guídi náguiē' ibēla. ⁵¹ Jesús rnnē':

—Chinaca na'a. Tsca' gaz.

Gudanē' Jesús guídi náguiē' bönni' huen dxin na', en bunē' le. ⁵² Ní'irō rē' yugu' bixúz unná bē', en bönni' dē lu ná'agaquiē' que yudo', en bönni' gula tu'zėjni'inē', bönni' na' bití' ta'lé'enē' Lē' dxi'a, rnnē':

—¿Narúajtsali' nuá'ali' guíē' tuchi', en yaga para sönli' neda' ca runli' rizönli'-nē' gubán? ⁵³ Yugu' dza guzóalen caza' libí'ili' chila yudo', ate' bití' bi benli' quia', pero na'a chibidxín dza queéli', le naca dza dē lu nē'e nu na' zoa lataj chul-la.

Rnnē' Pedro: "Bití' núnbē'a-nē' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

⁵⁴ Ní'irō gula'zönē' Jesús, en gula'chē'ē Lē' ga na' bulu'sudxinē' Lē' lidxē' bixúz lo. Pedro yōjnahuē' Jesús zí'tu' zí'tu'sō. ⁵⁵ Cate' ni'a nē'ē' bixúz lo chigula'béquiē' guí' lō'a lidxē' bixúz lo na', gula'bō'ē idú gásibi'ilō ra' guí' na', ate' Pedro gurō'lenē' légaquiē' tsözxön. ⁵⁶ Cate' tubi' bi'inigula huen dxin bilé'ebi'-nē' Pedro, ni' rō'ösē' ra' guí', buyubi' lē', en rnnabi':

—Bönni' ni dē'ē ca' Jesús.

⁵⁷ Gudá'baguiē' Pedro, rnnē':

—Nigúla, biti' ca' núnbë'a-në' bönni' na'.

⁵⁸ Ia'lati' gudzé ia'túë' bönni' bilé'enë' Pedro, ate' rnnë':

—Li' do'o ca' légaquië'.

Pedro gunné':

—Bönni', calëga neda'.

⁵⁹ Ia'láti'sö gudzé, gunné' ia'túë' bönni':

—Le nácatë bönni' ni dë'ë Jesús, tu' náquië' bönni' Galilea.

⁶⁰ Ní'irö Pedro gunné':

—Bönni', biti' nözda' bizxi na' ru'u didza' que.

Tsanni ni' ru'ë didza' ni, la' gurödxitëba' böra.

⁶¹ Ní'irö buécjë' Xanru', en ruyúë' Pedro, ate' yöjnenë' Pedro xtídzë'ë Xanru', ca na' gudxë' lë': "Zí'alö cödxiba' böra na'a, li' chigudá'bagu'u tsonna luzuí, innó' biti' núnbë'u neda'." ⁶² Burúajë' Pedro ní'ilö, ate' rön caz gurödxë'.

Tu'titjë' Jesús

(Mt. 26:67-68; Mr. 14:65)

⁶³ Yugu' bönni' na' nazöngaqüë' Jesús bulu'titjë' Lë', ate' gula'guinë' Lë'. ⁶⁴ Ní'irö bulu'sayjë' lahuë' Jesús, ate' gula'gápë'ë lahuë', en gula'nábinë' Lë', ta'nnë':

—¡Gunnëya'atsöca'! ¿Nuzxi na' gudapa' Li'?

⁶⁵ Ziánrö ca' gula'nnë' queë' le gulu'ë dö' queë'.

Ridxinë' Jesús lógaquië' bönni' yudo' tu'chi'a tu'söröë'

(Mt. 26:59-66; Mr. 14:55-64; Jn. 18:19-24)

⁶⁶ Cate' chizá' rení' dza na', bulu'dubë' bönni' gula tu'zéajni'inë' bönachi judío len yugu' bixúz unná bë', en bönni' yudo' tu'sédinë', ate' gula'chë'ë

Jesús lógaquië' bönni' yudo' tu'chi'a tu'söröë', ate' gula'nábinë' Lë', ⁶⁷ ta'nnë':

—Gudíxjöi'i netu'. ¿Naru' nactso' Li' Cristo?

Jesús rë' légaquië':

—Channö guía' libí'ili' naca' Cristo, biti' tséajlë'ëli' neda', ⁶⁸ en channö inábida' libí'ili' tu didza', biti' ubí'ili' didza', en biti' usanli' neda'. ⁶⁹ Na'a isí lo, neda', Bönni' Guljë' Bönachi, cö'a cuita lë'ë ibëla Dios, nápatërë' yöl-la' unná bë'.

⁷⁰ Gula'nábinë' Lë' yúgu'të', ta'nnë':

—¿Naru' nactso' Li' Zxí'inë' Dios?

Lë' gudxë' légaquië':

—Le nácasö rnnali'.

⁷¹ Ní'irö ta'nnë':

—¿Núzxirö naquíniru' nu gun ba nalí queë'? La' rë'usö chibiyöniru' didza' ru'ë.

23

Ridxinë' Jesús lahuë' Pilato, bönni' rinná bë'ë uláz queë' César

(Mt. 27:1-2, 11-14; Mr. 15:1-5; Jn. 18:28-38)

¹ Ní'irö gulazuínë' yúgu'të bönni' zián ni', ate' gula'chë'ë Jesús lahuë' Pilato, ² ga ni' gula'sí lógaquië' tu'zéguië' Lë' didza', ta'nnë':

—Bönni' ni, budzölitu' ca runë'. Runë' ga ta'dá'baga' bönachi uládz queëtu' yúlahui', en ruzáguë'ë xinözigaca nupa ta'guíxaj laz ruquíxjë' César, en rnnë' lé cazë' náquië' Cristo, bönni' ral-la' inná bë'ë.

³ Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubi'ë didza' Jesús, rnnë':

—Le nácasö rnno'.

⁴ Ní'irö Pilato gudxë' yugu' bixúz unná bë', en bönachi nacuá' ni', rnnë':

—Biti' bi rudzö'lida' le naca xíguia' nunë' bönni' ni.

⁵ Ní'irö gulunrë' tsutsu xtídza'gaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxintë runë' ca' ni.

Ridxinë' Jesús lahuë' Herodes, bönni' rinná bë'ë luyú Galilea

⁶ Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea. ⁷ Cate' gunözinë' nababë' Jesús ga ni' rinná bë'ë Herodes, gusöllë'ë Lë' lahuë' Herodes na', tu' zoë' ca' Herodes Jerusalén yugu' dza na'. ⁸ Cate' Herodes na' bilé'enë' Jesús, budzéjanë', tu' chiguca xidzé rë'ënë' ilé'enë' Lë' tu' chibiyönnë' le zían ca naca queë' Jesús, en runë' löza ilé'enë' tu' yöl-la' huáca gunë'. ⁹ Ní'irö Herodes gunábinë' Jesús le zían, pero Jesús biti' bi didza' ubi'ë. ¹⁰ Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidë'ë Jesús didza'. ¹¹ Ní'irö Herodes, en bönni' queë' röjáquië' gudil-la bulu'cá'anë' Jesús cá'asö, en para ulu'titjë' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato. ¹² Dza na' bulu'dzáguië' dxi'a Pilato, en Herodes, tu' zí'alö gula'lé luzë'ë tuë' ia'tué'.

Ta'chúguië' queë' Jesús gátie'
(Mt. 27:15-26; Mr. 15:6-15; Jn. 18:39-19:16)

13 Ní'irö butubë' Pilato yugu' bixúz unná bē', en bönni' dē lu ná'agaquiē', en bönachi lu yödzo, 14 ate' rē' légaquiē':

—Djuá'ali'-nē' bönni' ni lahua' neda', rnnali' queē' runē' ga tu'tsatsa bönachi, pero cate' gunabi yúdxida'-nē', ate' zóatēli' ca' ni, bití' bi budzólida' le naca xíguia' nabáguē'ē, yugu' lē na' ruzéguii'-nē' didza'. 15 Cate' gusól-la'a libí'ili' lahuē' Herodes, bití' bi budzölinē' le benē' bönni' ni le naca xíguia' nabáguē'ē para nu ichugu queē' gátie'. 16 Na'a usaca' zi'a-nē', ate' tödi na' usana'-nē'.

17 Run bayudxi tu le gunē' Pilato, usanē' lu ná'agaca bönachi tuē' bönni' nadzunē' cate' raca laní na', ca na' run cazē'. 18 Ní'irö gulu'ē zidzaj didza' yúgu'tē bönni' nacu'ē ni', ta'nnē':

—Bētiē' bönni' ni, en busanē' queētu' Barrabás.

19 Nadzunē' Barrabás na' lidxi guié tu' gudíl-lalenē' yúlahui' lu yödzo na', en tu' bētiē' bönachi.

20 Bulidzē' Pilato légaquiē' leyúbölö, tu' rē'ēnē' usanē' Jesús. 21 Leyúbölö gulu'ē zidzaj didza', ta'nnē':

—¡Budē'ē lē'e yaga cruz! ¡Budē'ē lē'e yaga cruz!

22 Ní'irö Pilato gudxē' légaquiē' le bunny luzuí, rnnē':

—¿Bizxi caz le ruá' dö' benē' bönni' ni? Bití' bi budzólida' nunē' le run ga nabáguē'ē xíguia' gátie'. Usaca' zi'a-nē', ate' ní'irö usana'-nē'.

23 Zidzajrö gulu'ē didza', ta'nabē' tē'ē Jesús lē'e yaga cruz. Tu' gula'bödxie' yenni' yugu' bönni' na', en yugu' bixúz unná bē', gula'délinē' gaca ca na' tē'ēnnē'. 24 Ní'irö Pilato guchúguiē' queē' Jesús, para gaca queē' ca na' ta'nabē'.

25 Busanē' quégaquiē' bönni' na' nadzunē' lidxi guié tu' gudíl-lalenē' yúlahui', en bētiē' bönachi, bönni' na'

chigula'nabë', ate' budödë' Jesús para gaca queë' ca na' tē'ennë'.

Dë'ë Jesús lë'e yaga cruz

(Mt. 27:32-44; Mr. 15:21-32; Jn. 19:17-27)

²⁶ Cate' ni' ta'chë'ë Jesús tsöjdá'gaquië' Lë' lë'e yaga cruz, gula'zönë' Simón, bönni' yödzö Cirene, suzë'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cúdzu'lë' Jesús.

²⁷ Bönachi zían, enca' yugu' nigula söjné'gaca Jesús, ta'bödxinu nigula na', en ta'bödxu yéchi'nu queë' Lë'. ²⁸ Ní'irö buécjë' Jesús, en ruyúë' lé'gacanu, ate' rë' lé'gacanu:

—Libí'ili' nigula Jerusalén. Biti' cödxili' quia' neda', pero guli'cödxu que quézili', en quégacabi' zxi'nili' ²⁹ tu' huadxín dza ila'nná: “Bica' bágaca yugu' nigula huödx, en nigula bití' guluá'anu-bi' bí'ido', en bití' bulu'gádxí'nu-bi' bí'ido'.” ³⁰ Ní'irö ila'sí lógaca ila'nná bönachi, ilë' yugu' guí'a sibi: “Guli'dubága' netu'”, en ilë' ca' yugu' guí'ado': “Guli'cachi' netu'.” ³¹ Channö caní tunë' quia' neda', naca' ca tu yaga ya'a, ¿naru' cabí ilúntërë' ca' queëli', nácali' ca yaga bidxi?

³² Gula'chë'ë ca' chopë' bönni' tuá' dö', para ilútië' lé'gaquië' tsözxön len Jesús. ³³ Cate' bila'dxinë' lataj nazí'i le Calavera, le rna len didza' xidza' Lataj Que Böga' Ícjaru', bulu'dë'ë Jesús lë'e yaga cruz. Bulu'dë'ë ca' lé'egaca yaga cruz chopë' bönni' tuá' dö'. Tuë' bulu'dë'ë cuita lë'ë ibëla Jesús, en ia'tué' bulu'dë'ë cuita lë'ë yögöla.

³⁴ Ní'irö Jesús rnnë':

—Xuz, buniti lo lé'gaquië', tu' cabí nözguequinë' bi tunë'.

Bönni' röjáquië' gudil-la nacu'ë ni' bulu'lë'ë que queëgaquië' le nácuë' Jesús, en bulu'quitjë' le gaca bë' lahui. ³⁵ Bönachi nacuá' ni' tu'yú, en yugu' bönni' dë lu ná'agaquië' bulu'titjë' Jesús, ta'nnë':

—Yugu' nu yúbölö busölë' bönni' ni. Na'a ralla' usölá cuinë' channö náquië' Cristo, bönni' gurö cazë' Dios.

³⁶ Yugu' bönni' na' röjáquië' gudil-la bulu'titjë' ca' Jesús. Gula'biguë'ë ga na' zoë', en bulu'guijë' Lë nupi zi, ³⁷ ta'nnë':

—Channö nacu' Li' bönni' inná bé'enë' bönachi judío, busölá cuinu'.

³⁸ Da' ca' lë'e yaga cruz icjlë' Jesús tu le nazúaj lu guichi lu didza' griego, en lu didza' latín, en lu didza' hebreo, le rnna caní: “Bönni' Rinná Bé'enë' Bönachi Judío.” ³⁹ Tuë' bönni' huiá' dö' na' dë'ë lë'e yaga cruz bulidza zi'ë Jesús, rnnë':

—Channö nacu' Li' Cristo, busölá cuinu', enca' netu'.

⁴⁰ Bubi'ë didza' ia'tuë' bönni' huiá' dö' na', en gudil-lë' luzë'ë na', rnnë':

—¿Naru' cabí rádxinu'-në' Dios? Lësca' li' narugu quiu' gátu'. ⁴¹ Le nácatë rë'u, le rál-la'sö gaca queëru' riguí'i rizáca'ru', ca na' sa'yéaj dö' biá'aru', pero Bönni' ni, biti' bi dö' nu'ë.

⁴² Ní'irö bönni' ni rë' Jesús:

—Yöjné neda' cate' idxinu' ga ni' inná bë'u.

⁴³ Jesús rë' lë':

—Le nácatë rea' li', na'a dza ni sóalenu' neda' lataj lachi quia'.

Ratië' Jesús

(Mt. 27:45-56; Mr. 15:33-41; Jn. 19:28-30)

44 Cate' bidxín idú huagubidza, guchul-la idútë yödzölió ga bidxinrö idú ridödi xihuö. 45 Guchul-la gubidza, ate' lari' nal-la' lu yudo' biröza' chopa dí'ilö. 46 Ní'irö bë'ë zidzaj didza' Jesús, rnnë':

—Xuz, rigu'a lu no'o bö' naca caza'.

Cate' budxi gunné' caní, birúajtë bö' naca cazë', gútië'.

47 Cate' bönni' rinná bé'enë' bönni' röjáquië' gudil-la bilé'enë' ca na' guca, gulu'ë Dios yöl-la' ba, rnnë':

—Le nácatë bönni' ni gúquië' bönni' tsahui'.

48 Cate' yúgu'të bönni' nacu'ë ni' tu'yúë' bila'lé'enë' lë na' guca, yöjhuöjgaquië' yödzö, ta'gapa' luchú'ugaquië' tu' tu'báninë'. 49 Zí'tu'sö bulu'gá'ana yúgu'të nupa ni' núnbë'gaca Jesús, en yugu' nigula na' yójacalennu Lë' cate' ni' gudë' luyú Galilea, ate' tu'yúë' lë ni raca.

Rigáchë'ë Jesús yeru ba

(Mt. 27:57-61; Mr. 15:42-47; Jn. 19:38-42)

50 Zoë' ca' ni' tu bönni' yödzö Arimatea que luyú Judea, lë' José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söröë'.

51 Biti' benë' tuz nupa na' gula'chugu queë' Jesús gátië', tu' ribözë' ca' José ni le rinná bë'ë Dios.

52 Ní'irö guyijë' José na' lahuë' Pilato, en gunabë' lataj u'ë Jesús. 53 Cate' chinuzötjë' Lë', buchölinë' Lë' lari', ate' gulu'ë Jesús yeru ba, le nadaj lë'e gu'á guiöj, ate' lu ba na', cuntu nu nagü'iguequinë'.

54 Dza na' naca dza tu'pë'ë que dza lá'ayi quégaquië' bönni' judío, tu' si' idxín dza na'.

55 Yójacanu ca' ni' nigula na' gula'zá'lennu Jesús, cate' ni' gudë' luyú Galilea, ate' bila'lé'enu yeru

ba na', en ca na guca, gula'gu'ë Lë' ni'. ⁵⁶ Cate' yöjhuó'jgacanu yu'u, bulu'pá'anu nóri rilá' zxixi, en yugu' le za rilá' zxixi. Ní'irö bulu'z'í ládxi'gacanu dza lá'ayi na' quégaquië' bönni' judío ca na' rinná bë' xibá queë' Dios.

24

Rubanë' Jesús lu yöl-la' guti

(Mt. 28:1-10; Mr. 16:1-8; Jn. 20:1-10)

¹ Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queë' Jesús. Nuá'gacanu yugu' le rilá' zxixi, lë na' chinupá'agacanu, ate' dzágagacanu légacanu ia'bálanu nigula. ² Cate' bila'dxinnu ni', bila'lé'enu chinadúa guiöj na' gudá' ga nu riyaza yeru ba queë'. ³ Cate' gula'yázanu yeru ba na', bití' bulu'dzölinu zoa Xanru' Jesús ni'. ⁴ Cate' ni' ta'bö'önu böniga ni'a que lë ni, chopë' bönni' nácugaquië' lari' rëpi yösa bení' la' bila'dxintë' ni', en gula'zuínë' ga na' nacuá'anu. ⁵ Ní'irö guládxinu, en bulu'zötaj ícjagacanu, tu'yunu lu yu, ate' chopë' gubáz lá'ayi na' të' légacanu, ta'nnë':

—¿Bizx que ruguílajli' nu zoa nabán xilataj nu nati? ⁶ Bití' zoë' ni, tu' chibubanë'. Guli'tsöjné lë na' chigudxi cazë' libí'ili' cate' ni' zoë' luyú Galilea. ⁷ Gunnë': "Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dë'ë neda' lë'e yaga cruz, ate' ubana' cate' gaca tsonna dza."

⁸ Ní'irö yöjné'gacanu didza' na' bë'ë Jesús, ⁹ ate' bulu'zá'anu ra' yeru ba na', yöjtíxjöi'iguequinu idxinéajtë' bönni' gubáz queë' Cristo, en

ia'zica'rë' ca', ca naca lë na' guca. ¹⁰ Nigula na' yöjtíxjöi'iguequinu bönni' gubáz na' yugu' lë ni, nácgaganu María Magdalena, en Juana, en María, xinë'ë Jacobo, en ia'bál-lanu nigula na' dzágagacanu légacanu. ¹¹ Guléquinë' bönni' gubáz na' tu'ínu didza' chixi, en bití' gula'yéajlë'ë légacanu.

¹² Ní'irö guyasë' Pedro, en carelö sa'yéajë' ra' yeru ba na'. Cate' buyüë' lu ba na', bilé'enë' yugu' lári'sö nacuá' ni', ate' ní'irö böajë' lidxë', rubáninë' ca naca lë na' guca.

Le guca la' nöza ridxintë Emaús

(Mr. 16:12-13)

¹³ La' dza ná'asö söjáquië' chopë', yú'ugaquië' nöza le ridxintë Emaús, le rö'ö ca chopa hora rizá'aru' Jerusalén. ¹⁴ Yú'ugacasë' ca' nöza, tu'ë didza' ca naca yúgu'të lë na' guca. ¹⁵ Tsanni ni' yú'ugaquië' nöza, tu'ë didza' la' légacasë', gubígui'ë gala' Lë cazë' Jesús, ate' gudálenë' légaquië' tsözxön. ¹⁶ Bití' bulu'únbë'ë Lë' tu' naca ca tu le nabaga' guiöj lógaquië'. ¹⁷ Ní'irö Jesús gunábinë' légaquië', rnnë':

—¿Bizxi didza' na' ru'íli' la' libí'isili' yú'uli' nöza?
¿Bizx que na' ruhuí'inili'?

¹⁸ Bubi'ë didza' bönni' na' lë' Cleofas, rë' Lë':

—¿Nácatso' bönni' zi'tu' lu yödzo Jerusalén, en tuzu' li' bití' nözinu' lë na' guca néaje nasi ni'?

¹⁹ Ní'irö Jesús rë' légaquië':

—¿Bizxi na' guca?

Të' Lë':

—Lë na' guca queë' Jesús, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxön benë' dxin, en bë'ë didza' lahuë' Dios, en lógaca yúgu'të bönachi. ²⁰ Yugu' bixúz

unná bé', len bönni' ta'nná bé'enë' netu' bulu'dödë' Lë', en gulunë' ga nu guchugu queë' gátie', ate' bulu'dë'ë Lë' lë'e yaga cruz. ²¹ Netu' bentu' löza gúquië' Lë' bönni' na' ral-la' huóá'uë' bönachi Israel, pero na'a chiguca tsonna dza cate' gulaca lë ni. ²² Ia'stú, bál-lanu nigula nútsa'gacanu netu' gulunnu ga gurö'ötu' böniga. Yöjácanu ra' yeru ba queë' cate' si' gulén gubidza na'a dza, ²³ en cate' biti' bulu'dzölinu Lë', buduhuöjgacanu, en gulënu netu' bila'lé'enu yugu' gubáz lá'ayi queë' Dios, nupa ni' gulë lé'gacanu zoë' nabanë' Jesús. ²⁴ Ní'irö bal-lë' bönni' luzá'atu' yöjáquië' ra' yeru ba na', en bila'lé'enë' naca ca na' gula'nnanu nigula na', pero biti' bila'lé'enë' Jesús.

²⁵ Ní'irö Jesús gudxë' légaquië':

—Libi'ili', bönni' biti' réajni'ininë'. Nazidi icja ládxi'do'oli' para cabí tséajlë'ëli' yúgu'të le gula'nnë' bönni' gulu'ë didza' uláz queë' Dios. ²⁶ ¿Naru' cabí ben bayudxi qui'i sáquë'ë Cristo yugu' lë ni, en tsázië' ga ni' tsépisëtë're'?

²⁷ Ní'irö gusí lahuë' Jesús riguíxjöi'inë' légaquië' yúgu'të le ru'í didza' ca naca queë' le nazúajgaca lu guichi lá'ayi, ca na' gusí lo bë'ë didza' Moisés ga bidxintë yugu' le gula'nnë' yúgu'të bönni' gulu'ë didza' uláz queë' Dios.

²⁸ Cate' bila'dxinë' yödzödo' ga na' söjáquië', benë' Jesús ca tu bönni' zéajtë're' zi'tu'. ²⁹ Gulunë' bayudxi ugá'analënë' légaquië', ta'nnë':

—Bugá'analën netu', tu' chiridzö' na'a, en chizóa gal-la.

Ní'irö guyázië' Jesús yu'u, en bugá'analënë' légaquië'. ³⁰ Cate' ni' Jesús rö'ë rágulënë' légaquië',

gudélë'ë yöta xtila, en gudxë' Dios: "Xclenu." Ní'irö buzzuxjé' le, en bë'ë quégaquië'. ³¹ La' ní'isö bidúa lë na' gubaga' guió'j lógaquië', ate' bulu'únbë'ë Jesús, ate' Lë' buniti cuinë' lógaquië'. ³² Ní'irö gulé luzé'ë tuë' ia'túë':

—¿Naru' cabí böála'tica' ládxi'do'oru' tsanni ni' ruí'ilenë' rë'u didza' la' nözä, en cate' ni' ruchila lá'anië' le nazúaj lu guichi lá'ayi?

³³ La' ní'isö gula'zuinë' yöjhuó'jgaquië' Jerusalén, ate' yöjxáca'gaquië' nudúbigaquië' idxinéajtë' bönni' gubáz queë' Jesús, en nupa nacuá'len légaquië'.

³⁴ Ní'irö yugu' bönni' na' nacu'ë ni' gulé' chopë' na': —Chibubán cazë' Xanru', en buluí'i lahuë', ate' bilé'enë' Simón Lë'.

³⁵ Ní'irö chopë' na' gula'guíxjö'ë ca na' guca quégaquië' la' nözä, en ca na' bulu'únbë'ë Jesús cate' ni' buzzuxjé' yöta xtila na'.

Bönni' usëda queë' Jesús tu'lé'enë' Lë'

(Mt. 28:16-20; Mr. 16:14-18; Jn. 20:19-23)

³⁶ Tsanni ni' tu'ë didza' ca nácagaca lë ni, la' yöjsóatë' Jesús gatsaj láhui'lö ga na' nacu'ë, ate' rë' légaquië':

—Gulí'sóa dxi ládxi'li'.

³⁷ Ní'irö guladxi gula'dzöbinë' tu' téquinë' bixín ta'lé'enë'. ³⁸ Jesús rë' légaquië':

—¿Bizx que rő'öli' böniga? ¿Bizx que rizá' ládxi'li' yugu' lë ni? ³⁹ Buli'yútsöca' na'a, en ni'a. Neda' caz ni. Gulí'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

⁴⁰ Ni' ruí'së' ca' didza' ni, buluí'inë' légaquië' në'ë, en ni'ë. ⁴¹ Tu' tu'dzéjaguequinë' biti'

gula'yéajlë'ë, en gula'bö'ë baniga. Que lë ni na' Jesús gudxë' légaquië':

—¿Dë queëli' ni le gahua'?

⁴² Ní'irö bulu'nödzejë' queë' láti'do'oba' böla chinégui'ba', en tu quíxí'ba' buz. ⁴³ Guzxí'ë Jesús le, en gudahuë' lógaquië'. ⁴⁴ Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunniá': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazí'i le Yugu' Salmo, ca ral-la' gaca quia' neda'.

⁴⁵ Ní'irö buzéajni'inë' légaquië' lë na' nazúajgaca lu guichi lá'ayi. ⁴⁶ Rë' légaquië':

—Caní nazúaj lu guichí ca run bayudxi gaca queë' Cristo, qui'i sáquë'ë, en ubanë' lu yöl-la' guti cate' gaca tsonna dza, ⁴⁷ ate' idútë yödzölió ral-la' gaca libán ca naca quia' neda' para ulu'bí'i ládxi'gaca bönachi para uniti lahuë' Dios dul-la' nabága'gaquië'. Lu yödzö Jerusalén isí lo gaca libán na' ⁴⁸ ate' libí'i cázali' na' bilé'eli' yugu' lë ni ral-la' gunli' ba nali que. ⁴⁹ Buli'yútsöca', isöl-la'a queëli' le guzxí' lu në'ë Xuza' gunnë' queëli', pero buli'gá'anasö Jerusalén cate' idxinrö queëli' yöl-la' huáca na' za' yehua' yubá.

Ruhuëpë' Jesús yehua' yubá

(Mr. 16:19-20)

⁵⁰ Ní'irö Jesús guchë'ë yugu' bönni' dá'gaquië' Lë', söjáquië' yödzö Betania, ate' ni' guchisa në'ë, en bulidza tsáhuë'ë légaquië'. ⁵¹ Tsanni ni' rulidza tsáhui'së' ca' légaquië', buzá'atë' ga na' nacu'ë, buëpë' yehua' yubá. ⁵² Gudödi gula'yéaj

ládxi'gaquië' Lë', lu yöl-la' rudzeja quégaquië'
yöjhuǒjgaquië' Jerusalén. ⁵³ Gula'cuá'tica'së' chila
yudo', ta'gu'ë Dios yöl-la' ba, en tun zxönë' Lë'. ¡Ca'
naca!

CXXX

Didza' cubi rucá¹ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

58bf86df-ae22-508c-81dc-936dbf138c25